

# ዮሃንሲ ፩ ዓፌዳ ሚሺራቸው ቃላ ጌሉዋ

ዮሃንሲ ፩ ዓፌዳ ሚሺራቸው፣ ዩሱሲ አሹዋ ማዪዳ አሳ ጊዲዋን ቤቱዳ ደዑዋ ያሳ ቃላ ጊዲያዋ ቆንጨሴ። ሃ ማፃፋይ ባሬ ሁጹው ቆንጨሴያዋዳን ሃ ሚሺራቸው ቃላይ ፩ፌቴዳዌ፣ አ ናባቢያ አሳይ ዩሱሲ አሳ አሺያ ጳሊያ ጊዲዳ ያናዋ ጌቲቲዳ ያሳ ናዓ ጊዲያዋ አማናና ማላኔ አኒ አማኖ ጋሱዋን ሜዲና ደዑ ኡንቲንቲሲ ደዓናዋ ኡንቲንቲ ኤራና ማላ ፩ፌቴዳ (20:31)።

ሚሺራቸው ቃላው ኮይሮ ሻኩ ሜዲና ያሳ ቃላይኔ ዩሱሲኔ ኢቱዋ ጊዲያዋ ኦዲ ሲሚዳ፣ ዩሱሲ አሺያዋ ጊዲዳ ያና ጌቲቲዳ ያሳ ናዓ ጊዲያዋ ቤሲያ ዲማ ዲማ ማላታቱዋ ሺሼ። ሄዋፔ ካሊዳ ቃሲ ሃ ማላታቱዋፔ ቤቲዳ አይፊያ ኦዲያ ታሪካቱ ካሊኖ። ሃ ከፊሊ ኢቲ ኢቲ አሳይ ዩሱሳን አማኒዳ፣ አ ካሊያዋንታ ጊዳዳዋ ኦዳ፤ ሃራቱ ቃሲ አ አያው ኢዳዳንቲኔ አኒ አያው አማኖኮ ጌዳንቶ ኦዲኖ። (ሺምፑዋ 13-17) ዩሱሲ ኦይቄቲዳ ኦማርሲ አው አ ካሊያዋንቲና አይ ኬና ሚኖ ኢቲፔቲላይ ደዒንቲኔ፣ ቃሲ ኢ ካቄታናው ማቲዳ ዋንቲላ ጋላሲ ኡንቲንቲሲ ጊጌታና ማላኔ ሚናና ማላ ኢ ሃሳዬዳ ቃላ ኦዲኖ። ወርሴላ ሺምፓቱ ዩሱሲ ኦይቄቲዳዋኔ ፒርዳው ሺቄዳዋ፣ አ ካቄዋኔ አ ዳንዲዋ፣ ቃሲካ ዳንዲዋፔ ጉዩያን ባሬና ካሊያዋንቲሲ ኢ ቆንጨዳ ሃኖታ ኦዲኖ።

ዮሃንሲ ጎዳ ዩሱሲ ከሪሰቶሳ ባጋና ቤቲያ ሜዲና ደዑዋ ቆንጨያን ቤሲያ ሃ አጾ ከካቲላይ ሃዒፔ ደሚዳ ዩሱሲ ኦጌ፣ ቱማኔ ደዖ ጊዲያዋ አማኒያዋንቲሳ። ዮሃንሲ ፩ ዓፌዳ ሚሺራቸው ቃላ ሃራቱዋፔ ዲማዩያዌ፣ አያና ቱማቲላቱዋ ታማሪሳናው ደዑዋ ኡባን አሳይ ሜዜቲዳ ቃላቱዋ ጎዒቲያ ዲራሳ። ሄዋንቲካ፣ ሃላ፣ ሶሉዋ፣ ፖዑዋ፣ ሄንላንቻ፣ ዶርሳ፣ ዋዩኒያ ሚላ፣ ዋዩኒያ አይፊያኔ ሄዋንታ ማላቲያዋንታ።

ዋሹማዳ ኦይቄቲዳ ሚሺራቲ ታሪኪያ 7:53-8:11 ጮራ ቢሌላቲኔ ቤኒ ማፃፋቱ ባሬንቲን ጉጂኪኖ፤ ሃራቱ ዮሃንሳ ሚሺራቸውን 21:24 ጉዩያን ጌሊሲኖ፤ ሃራንቲ ቃሲ ሉቃሳ ሚሺራቸው 21:38 ጉዩያን ጌሊሲኖ፤ ኢቲ ቤኒ ፩ፌቴዳ ቢሌላይ ዮሃንሳ ሚሺራቸው 7:36 ጉዩያን ጌሊሴዳ።

**ሺምፓቱዋ ኡባቱዋሲ ኢሜቲዳ ቃንሳ ቆፋቱዋ**

ሃ ማፃፋ ፃፌዳዋ ቆፋ (1:1-18)

ፃማቂያ ዮሀንሳኔ ዬሱሳ ኮይሮ ካሌዳዋንታ (1:19-51)

ዬሱሳ ኦሱዋ ዶሜላ (2:1-12:50)

ዬሩሳላሜኒኔ ኢዚ ዩሹዋን ወርሴላ ጋላሳቱዋን ሃኔዳ ዬሱሳ ኦሱዋ (13:1-19:42)

ጎዳ ዬሱሳ ዴንዲዋኔ ቆንጨፍላ (20:1-31)

ወርሴላ ቁቲያ፣ ጋሊላን ዛሪዴ ባሬና ካሊያዋንቱሲ ዬሱሲ ቆንጨፍዳዋ (21:1-25)

**ዴዑዋ ቃላ**

1 ቃላይ ኮይሮ ዴዒ፤ ቃላይካ ያሳና ኢቲፔ ዴዒ፤ ቃላይካ ያሳ።  
2 ኢ ኮይሮፔካ ያሳና ዴዒ። 3 ኡባባይ ቃላ ባጋና ሜዴቲዳ።  
ሜዴቲዳባኒ ኡባባኒ ኢ ባይናን ኢቲባይኔ ሜዴቲቤና። 4 ኢኒ ዴዑ ዴዒ፤ ዴዑ ኣሳው ፖዑዋ። 5 ፖዑ ዲማኒ ፖዒ፤ ዲማይ ፖዑዋ ያኒቤና።

6 ያሳፔ ከቲቲ ዬዳ ኣ ሱንሳይ ዮሀንሳ ጌቲቲያ ኢቲ ቢታኒ ዴዒ።  
7 ኣሳይ ኡባይ ኣ ባጋና ኣማናና ማላ፣ ፖዑዋባ ማርካታናው ዬዳ። 8 ፖዑዋባ ማርካታናው ዬዳፔ ኣቲን፣ ኢ ባሬ ሁጳው ፖዑዋ ጊዳና። 9 ኢካ ቱሙ ፖዑዋ ጊዴዳዌ ኣሳው ፖዒሳናው ሃ ሳባ ዪያዋ።

10 ቃላይ ኣላሚያን ዴዒ፤ ያሳይ ቃላን ኣላሚያ ሜዴዳ፤ ሺን ኣላሚ ኣ ኤሪቤና። 11 ኢ ባሬ ባጋቱዋኮ ዬዳ፤ ሺን ኡንቲንቲ ኣ ሺሺ ኣከቤይኪና። 12 ጊዶፔ ኣቲን ኢ ባሬና ሺሺ ኣኩዳ ኡባቶ፣ ባሬ ሱንሳኒ ኣማኔዳዋንቶ፣ ያሳ ናና ጊዳና ማላ፣ ማታ ኢሜዳ። 13 ኡንቲንቲ ያሳፔ ዬሌቲዲኖፔ ኣቲን፣ ኣሳይ ዬሊያ ማራኒ ዋይ ኣሹዋ ሺኒያን ዋይ ኣቱማ ኣሳ ሺኒያ ፃላላን ዬሌቲቤይኪና።

14 ቃላይ ኣሳ ጊዲዳ፣ ኣቶ ከካቲላኒኔ ቱማቲላን ኩሚዴ ኑ ጊዲዋን ዴዒዳ። ኮኒ፣ ኢ ባሬ ኣቦ ኢቲ ናባ ጊዲዳ ኣኩዳ ኣው ዴዒያ ባሬ ኣወዋ ቦንቸዋ ቤዒዳ።

15 ዮሀንሲ ኣባ ባሬ ኮሻ ቶቁ ኦሊዳ፣ «ታኒ፣ ታፔ ካላ ዪያዌ ታፔ ቦላ፤ ኣዪሲ ጎፔ፣ ታ ዬሌታናፔ ካሴና ኢ ዴዒያዋ» ጋዴ ሂንቲንቶ ኦዶዌ ሃዋ» ያጊ ማርካቲዳ።

16 ኮኒ ኡባይ ኣ ኩሜንሳ ኣቶ ከካቲላን ፓላሃዳ ኣንጂዋ ኣኩዳ። 17 ያሳይ ሂጊያ ሙሴ ባጋና ኢሜዳ፤ ሺን ኣቶ ከካቲላይኔ ቱማቲላይ ዬሱሲ ከሪሰቶሳ ባጋና ዬዳ። 18 ያሳ ቤዒዳ ኣሳይ

አኒኔ ባዋ፤ ባሬ አዉዋ ማታን ዴዒያ ባሬ ሁጹው ያሳ ጊዴዳዌ ኢቲ ናዓ ፃላላይ አባ ማርካቴዳ።

ፃማቂያ ዮሀንሳ ማርካቴሳ  
(ማት 3:1-12፤ ማር 1:1-8፤ ሉቅ 3:1-18)

19 ዬሩሳሌሜን ዴዒያ አዲሁዳቱዋ አዲሲያዋንቱ ቄሳቱዋኔ ለዋቱዋ ዮሀንሳኮ፡ «ኔኒ ኦኔ?» ጊዴ ኦ ኦቻና ማላ ከቲና፡ ዮሀንሲ ኦንቱንቱሲ ማርካቴዳ ማርካቴሳይ ሃዋ።

20 ዮሀንሲ፡ «ታኒ ከሪሰቶሳ ጊዲኬ» ያጊዴ ጌሺ ማርካቴዳዋፕ ኣቲን፡ ማርካቴሳ ኢደቤና።

21 ኦንቱንቱ፡ «ያቲና፡ ኔኒ ኦኔ? ኔኒ ኤላሴ?» ያጊዴ ኦቹዲና።

ዮሀንሲ፡ «ኣ ጊዲኬ» ያጊዳ።

ቃሲካ ኦንቱንቱ፡ «ኔኒ ናቤ?» ያጊዴ ኦቹዲና።

ዮሀንሲ፡ «ጊዲኬ» ያጊ ዛሬዳ።

22 ኦንቱንቱ፡ «ያቲና ኔኒ ኦኔ? ኦኒ ኦና ከቲዳዋንቶ ኦዳና ማላ፡ ኔኒ ኔና ኦና ጋይ?» ያጊዲና።

23 ዮሀንሲ ዛሬዳ፡ «ናቢያ ኢሳያሴ ጌዳዋዳን፡ ዋራን ባሬ ቃላ ቶቄ ኡዲዳ፡

ሳዳ ኦጊያ ሲቲ ኦላቲ!፤  
ጊያ ኮሻይ ታዋ»  
ያጊዳ።

24 ቃሲ ፓሪሳዋቱ ከቲዳ አሳቱ 25 ዮሀንሳ፡ «ኔኒ ከሪሰቶሳ ዋይ፡ ኤላሳ ዋይ ናቢያ ጊዳና ቆዮፕ፡ ያቲና አዲሲ ፃማቃይ?» ያጊዴ ኦቹዲና።

26 ዮሀንሲ፡ «ታኒ ሃላን ፃማቃይ፤ ሺን ሂንቱንቱ ኤሬናዌ ኢቱ ሃዋኒ ሂንቱንቱ ጊዲዋን ዴዒ። 27 ኢ ታፕ ካላ ዬ። ታኒ ኣ ጫማ ቃሹዋ ቢላናዉካ ቤሲኬ» ያጊ ዛሬዳ።

28 ሃዌ ኡባይ ዮርዳኖሳ ሻፋፕ ሄፊንላ ባጋ ዮሀንሲ ፃማቂያሳ ቢታኒያን ሃኔዳ።

ያሳ ኦርጌ ዶርሳ

29 የሃኒሲ ዋንቴላ ጋላሲ ዩሱሲ ባሬኮ ዩያዋ ቤዒዳ፡ «የሳ ኦርጌ ደርሳ፡ \* አላሚያ አሳ ናጋራ ቋዩሲያዌ፡ ሃዌሽ! 30 ታኒ፡ ስታፔ ካላ ኢቱ ያናዋ፤ ኢ ታፔ ቦላ፤ አዩሲ ጎፔ፡ ታ ዩሌታናፔ ካሴና ኢ ዳዒያዋ) ጋዳ ኦዳዳዌ ሃዋ። 31 ኢ ኦኔንቶ ታኒ ኤሪኬ፤ ሽን ኢሰራዔሊያ አሳው አ ቆንጨሳናው ሃላን ፃማቃዳ ያዲ» ያጌዳ።

32 የሃኒሲ ማርካቲዳ፡ «ጌሻ አያናይ ሳሉዋፔ ሃራጲያዳን ዋዲሽናኔ አ ቦላን ኡቲሽን፡ ታኒ ቤዒዳ። 33 ታኒ አ ኤሪኬ፤ ሽን ሃላኒ ፃማቃና ማላ ታና ከቲዳ ያሳይ፡ ጌሻ አያናይ ዋዲዳ፡ ኢቲ አሳ ቦላ ሸምፕሽን፡ ኔኒ ቤዒና፤ ኢካ ጌሻ አያናን ፃማቁ) ያጌዳ ታው ኦዳዳ። 34 ታኒ ሃዋ ቤዒዳ፤ ኢ ያሳ ናዒ ጌዲያዋካ ማርካታይ» ያጌዳ።

**ዩሱሲ ኮይር ባሬና ካሊያዋንታ ደሬዳ**

35 ዋንቴላ ጋላሲ የሃኒሲ ሽሬቲዳካ ባሬና ካሊያዋንቲፔ ላዒቱዋና ኢቲፔ ኤቁዳ፤ 36 ኢ ዩሱሲ አዲሽን ቤዒዳ፡ «የሳ ደርሳይ ሃዌሽ!» ያጌዳ።

37 የሃኒሳ ካሊያ ላዒቱ የሃኒሲ ጌያዋ ሲሲዳ፡ ዩሱሳ ካሌዲኖ። 38 ዩሱሲ ባሬና ካሊያዋንታ ጉዬ ሲሚ ቤዒዳ፡ «አያ ኮዩቲ?» ያጌ ኦቼዳ።

ኡንቲንቲ ዛሪዳ፡ «ሬቢ፡ ኔኒ ሃቃን ዳዒይ?» ያጌዲኖ። «ሬቢ» ጉሳይ «ታማሪሲያዋ» ጌያዋ።

39 ዩሱሲ ኡንቲንታ፡ «ሃ ዩዳ ቤዒቲ» ያጌዳ። ኡንቲንቲ ቢዳ፡ ኢ ዳዒያሳ ቤዒዲኖ፤ ሄ ጋላሲ ሳዒይ ታው ሳቲ ሄራ ጌዲያ ዲራው፡ ኡንቲንቲ አናና ፔሼዲኖ።

40 የሃኒሲ ጌዳዋ ሲሲዳ፡ ዩሱሳ ካሌዳ ላዐ አሳቱዋፔ ኢቲ፡ ሲሞና ጳዲርሳ ኢሻ ኢንዲራሳ። 41 ኢንዲራሴ ኮይር ባሬ ኢሻ ሲሞና ዳሚዳ፡ «ኑኒ ያሳይ ከቲዳዋና ጋኬቲዳ» ያጌዳ። ሃዋ ጉሳይ «ከሪሰቶሳ» ጌያዋ። 42 ኢንዲራሴ ሲሞና ዩሱሳኮ አሄዳ።

---

\* 1:29 ያሳ ኦርጌ ደርሳ፡ ፓሲጋ (ኬሱዋ)፡ አዩሁዳ አሳቱዋ ፓይዳዋን ኒሳን ጌቲቲያ አገና ጌዲዳ ቶጲያ አሳ ፓይዳዋን ላፑኒያ ሆሰፑኒያ አገናቱዋ። አዩሁዳ አሳን ፓሲጋ ጌቲቶዌ፡ ያሳይ ኢሰራዔሊያ አሳቱዋ ገብፃፔ ዋልቃማ ማላታን ኬሴዳ ዋዲያ ጌዲያ ዲራሳ። ዋግ 23:5-8 ያለቲ። ያሳ ኦርጌ ደርሳ፡ ኦራላ ጫቁዋን ከሪሰቶሳን ያሴቶ ጋሱ፡ ኢ ሃ አላሚያ አሳ ሃይቁዋሲ ባሬና አሊ አሚዳ ሜዲና ሙራፔ ኬሲ አኮ ዲራሳ። 1ቆር 5:7፤ 1ጳፀ 1:18-19 ያለቲ።

ዬሱሲ ሲሞና በዒዳ፣ «ኔኒ ዮሃንሳ ናዓ ሲሞና፤ ኔ ሱንሳይ ከፋ ጌቲታና» ያጌዳ። «ከፋ» ጌያዋ ቢሌላይ «ጳጳርሳ» ዋይ «ዛላ» ጌያዋ።

**ዬሱሲ ፒሊጶሳኔ ናቲናዔላ ጃጌዳ**

43 ዋንቴላ ጋላሲ ዬሱሲ ጋሊላ ባናው ቆፋ ቃቹዳ፤ እ. ፒሊጶሳና ጋኬቲዳ፣ «ታና ካላ!» ያጌዳ። 44 ፒሊጶሲ፣ እንዲራሲኔ ጳጳርሴ ዳዔዳ በቴሳይዳ ጌቲቲያ ካታማፔ ዬዳ አሳ።

45 ፒሊጶሲ ናቲናዔላና ጋኬቲዳ፣ «ሙሴ ማፃፋቱዋኒኔ ናባቱዋ ማፃፋቱዋን ተ አባይ ፃፊቱዳዋዳን፣ ዮሴፎ ናዓ ዬሱሲ ናዚሬቲ ካታማን ዳዒያዋና ኑኒ ጋኬቲዳ» ያጌ ኦዳዳ።

46 ናቲናዔሊ ዛሬዳ፣ «ናዚሬቲ ካታማፔ ሎዖባይ ከሳናው ዳንዳዪ?» ያጌዳ።

ፒሊጶሲ፣ «ያዳ በዓ» ያጌዳ።

47 ናቲናዔሊ ባሬኮ ዪያዋ ዬሱሲ በዒዳ፣ «ማካላይ ባይና ቱሙ ኢሰራዔሊያ አሳይ ሃዋ!» ያጌዳ።

48 ናቲናዔሊ ዬሱሳ፣ «ኔኒ ታና ሃቃን ኤራይ?» ያጌ ኦቹዳ።

ዬሱሲ ዛሬዳ፣ «ፒሊጶሲ ኔና ጃሳናፔ ካሴ፣ ኔኒ ባላሲያ ጌቲቲያ ሚላፔ ሂርኪና ዳዒሲን፣ ታኒ ኔና በዓዲ» ያጌዳ።

49 ናቲናዔሊ ዛሬዳ፣ «ታማሪሲያዎ፣ ኔኒ ያሳ ናዓ! ኔኒ ኢሰራዔሊያ ካቲያ!» ያጌዳ።

50 ዬሱሲ፣ «ታኒ ኔና ባላሲያ ጌቲቲያ ሚላፔ ሂርኪና በዓዲ ጌዳ ዲራው አማናይ? ኔኒ ሃዋፔ አጂያዋ በዓና!» ያጌዳ።

51 ቃሲካ ዬሱሲ፣ «ታኒ ሂንቴንቴሲ ቱሙዋ ኦዳይ፤ ሳሉ ዳዬቲና፣ ያሳ ኪታንቻቱ ታ ቦላ፣ አሳ ናዓ ቦላ፣ ፑዳ ከሲሺናኔ ዳጌ ዋጂሺና፣ ሂንቴንቴ በዓና» ያጌዳ።

## 2

**ዬሱሲ ቃና ካታማ ቡላቻሳ በዳ**

1 ሄዜንሳ ጋላሲ ጋሊላ ጋዲያን ቃና ጌቲቲያ ካታማን ቡላቻይ ቡላቹቲዳ፤ ዬሱሳ ዳያ ሄ ቡላቻን ዳዓው። 2 ዬሱሲካ ባሬና ካሊያዋንቱና ኢቲፔ ሄ ቡላቻ ጃሴቲዳ። 3 ዋዪኒያ ኡሻይ ዉሪዲጊና፣ ዬሱሳ ዳያ አ፣ «ኡንቴንቴሲ ዋዪኒያ ኡሻይ ዉሪዲጌዳ» ያጋ ኦቻዳ።

---

† 1:45 ሙሴ ማፃፋቱዋኒኔ ናባቱዋ ማፃፋቱዋን፣ አዪሁዳቱዋ ማፃፋ፣ ኢጫ ጫቁዋ።  
1:51 ደሞ 28:12

4 ዬሱሲ ዛሬዳ፡ «ታ ዳዬ፡ ሃዌ ታ ኦሱዋ ጊዲያ ዲራው፡ ኔ ያያና ኮሼና። ታ ዋዲ \* ቢር ጋከቤና» ያጌዳ።

5 ዬሱሳ ዳያ ኪቴቲያዋንቱሲ፡ «ኢ ሂንቴንቱሲ ኦዲያዋ ኣያ ጊደፔኔ ኦሊቱ» ያጋ ኦዳዲ።

6 እዪሁዳቱ ካሴ ኦሊያ ደያዳን፡ ማቻ ዋጋው ኢቱ ኢቱ ያቱ ፃሪሙሲያ ኦይቂያ ኡሱፑን ሹቻ ባላቱ ሄዋን ደዒኖ። 7 ዬሱሲ ኪቴቲያዋንታ፡ «ባላቱዋኒ ሃላ ኩንሊቱ» ያጌዳ፤ ጌቱቶዋዳንካ ኡንቱንቱ ባላቱዋኒ ደና ጋካናው ሃላ ኩንሊዲኖ። 8 ዬሱሲ ኡንቱንታ፡ «ሃዒ ዲቂዳ፡ ቡላቻ ካፖ ኢሚቱ» ያጌዳ፤ ኡንቱንቱ ኣው ኣፊዳ ኢሚዲኖ።

9 ቡላቻ ካፑ ዋዪኒያ ኡሻ ጊዳዳ ሃላ ጋንዲ ያሊዳ፡ ሃቃፔ ዬዳንቶ ኤሪቤና፤ ሸን ሃላ ኩንሊዳ ኦሳንቻቱ ኤሪኖ። ቡላቻ ካፑ ማቻቶ ኣኪያዋ ያሲዳ፡ 10 «ኦኒኔ ኣዪፌ ጊዳዳ ዋዪኒያ ኡሻ ኢማላ ኣሳ ካሴቲዳ ኡሼ፤ ያቲዳ ኣሳይ ዳሪሲ ኡሼዳዋፔ ፑዪያን፡ ቂራሪያ ኡሼ። ሸን ኔኒ ኣዪፌ ጊዳዳ ዋዪኒያ ኡሻ ሃና ጋካናው ናጋዳ!» ያጌዳ።

11 ዬሱሲ ባሬ ኦሌዳ ዋልቃማ ማላታቱዋፔ ሃዋ ኮይሩዋ ጋሊላ ጋዲያን ቃና ጌቱቲያ ሄራን ኦሌዳ፤ ሄዋን ባሬ ቦንቹዋ ኢ ቆንጨሲና፡ ኣ ካሊያዋንቱ ኣኒ ኣማኔዲኖ።

12 ሄዋፔ ፑዪያን፡ ዬሱሲ ባሬ ዳዪና፡ ባሬ ኢሻቱዋናኔ ባሬና ካሊያዋንቱና ኢቲፔ ቂፊሪናሆማ ጌቱቲያ ካታማ ቢዳ ኣማሬዳ ጋላሳ ታኬዲኖ።

**ዮሱሲ ጌሻ ጎሊያ ጊቢያፔ ዛሊዲያዋንታ ኬሴዳ**

(ማት 21:12-13፤ ማር 11:15-17፤ ሉቅ 19:45-46)

13 እዪሁዳቱ ቦንቹያ ፓሲጋ ባላ ጋላሳይ ማታቲና፡ ዬሱሲ ዬሩሳላሚ ቤዳ። 14 ጌሻ ጎሊያ ጊቢያን ሚዛ፡ ደርሳኔ ደጎማቱዋ ዛሊዲያ ኣሳ ዳሜዳ፤ ቃሲ ሃራቱ ባሬንቱ ኦይዲያን ኡቲዳ፡ ሚሻ ላሚያዋንታ ዳሜዳ። 15 ኢ ጎላ ጂራሬያ ደቂዳ፡ ኣሳ ኡባ ደርሳናኔ ሚያና ጌሻ ጎሊያ ጊቢያፔ ካሬው ኬሲዳ ዬዳሪሴዳ። ሚሻ ላሚያዋንቱ ኦይዲያካ ኣሊ ዬጊዳ፡ ኡንቱንቱ ሚሻ ላሊዳ። 16 ደጎሙዋ ዛሊዲያዋንታ ኢ፡ «ሃ ደጎማቱዋ ሃዋፔ ኬሲቲ፤ ታ ኣቡ ጎሊያ ጌያ ኦሳፒቲ!» ያጌዳ።

17 ዬሱሳ ካሊያዋንቱ ያሳ ማፃፋን፡ «ታኒ ኔ ጎሌው ሴሌቲያ ሴላይ ታና ታማዳን ጉዳ» ጌቱቲዳ ፃፊቲዳዋ ሃሳዬዲኖ።

\* 2:4 ታ ዋዲ፡ ሃዋ ጉሳይ ዬሱሳ ቱሙ ቦንቹ ቤዳታናው ቤሴኔ ኢ ያሳ ናዓ ጊደቂ ኤሬታናው ቤሴ ጊያዋ። 2:17 ማዝ 69:9

18 ሃዋፔ ገዬ፣ አዪሁዳ አሳ አዪሲያዋንቱ ዛሪዳ፣ «ኔው ሃዋ ኦላናው ዳንዳዪያ ማታይ ዳዒያዋ ኑና አያ ማላታ ቤሳኒ?» ያገደደ።

19 ዬሱሲ፣ «ሃ ጌሻ ጎሊያ ኮሊቲ፤ ታኒ ሄዙ ጋላሳኒ ዛሪዳ ከፃና» ያገደደ።

20 ቃሲካ አዪሁዳ አሳ አዪሲያዋንቱ፣ «ሃ ጌሻ ጎሊያ ከፃናው አይታማኔ ኡሱቸን ላይላ አኬዳ፤ ሺን ኔኒ ሄዙ ጋላሳኒ ከፃኒ?» ያገደደ።

21 ሺን ኢ ሃሳዬዳ ጌሻ ጎሊ ባሬ አሳቲላባ። 22 ሃዋ ደራው፣ ዬሱሲ ሃይቁዋፔ ዳንዳዳዋፔ ጉዪያን፣ ዬሱሳ ካሊያዋንቱ ኢ ሃዋ ጌዳዋ ሃሳዬዲኖ። ቃሲ ኡንቲንቱ ያሳ ማፃፋይ ጌዳዋኔ ዬሱሲ ሃሳዬዳዋ አማኔዲኖ።

23 ፓሲጋ ባላ ቦንቲያ ዎዳ፣ ዬሱሲ ዩሩሳላሜን ዳዒሺን፣ ኢ አሉዳ ማላታ ቤዒዳ፣ ጮራ አሳይ አ አማኔዲኖ። 24 ሺን ዬሱሲ አሳ ኡባ ኤሪያ ደራው፣ ሃዋንታ አማኒቤና። 25 አሳባ ኦኒኔ አው ማርካታና ማላ ኮዪቤና፤ አዪሲ ጎፔ፣ አሳ ዎዛናኒ አዬ ዳዒንቶ፣ ኢ ባሬ ሁጳው ኤሪያ ደራሳ።

### 3

#### ዬሱሳኔ ኒቆዲሞሳ

1 ፓሪሳዋቱዋፔ ገደዳ ካቸዋ ኒቆዲሞሳ ጌቲቲያ ኢቲ ቢታኒ ዳዒ። 2 ኒቆዲሞሲ ቃማ ዬሱሳኮ ዪዳ፣ «ታማሪሲያዎ፣ ኔኒ ኑና ታማሪሳና ማላ ያሳይ ከቲዳ ገዲያዋ ኑኒ ኤሪቶ፤ አዪሲ ጎፔ፣ ያሳይ አናና ዳዒያ አሳፔ አቲን፣ ሃ ኔኒ ኦሊያ ዎልቃማ ማላታቱዋ ኦላናው ዳንዳዪያ አሳይ ባዋ» ያገደደ።

3 ዬሱሲ ዛሪዳ፣ «ታኒ ኔው ቱሙዋ ኦዳይ፤ አሳይ ላዒንሉዋ ዬሌታና ቆዮፔ፣ ያሳ ካዉቲላ ቤዒናው ዳንዳዪና» ያገደደ።

4 ኒቆዲሞሲ፣ «ጨማ አሳይ ዋኒዳ ላዒንሉዋ ዬሌታናው ዳንዳዪ? ባሬ ዳይ ኡሉዋ ሲሚ ጌሊዳ፣ ላዒንሉዋ ዬሌታናው አሳይ ዳንዳዪ?» ያገደደ።

5 ዬሱሲ ዛሪዳ፣ «ታኒ ኔው ቱሙዋ ኦዳይ፤ አሳይ ሃላፔኔ ጌሻ አያናፔ ዬሌታና ቆዮፔ፣ ያሳ ካዉቲላ ጌላናው ዳንዳዪና።

6 አሳይ አሹዋን አሳፔ ዬሌቲ፤ ሺን አሳይ አያናኒ ጌሻ አያናፔ ዬሌቲ፤ 7 ሂንቲንቲ ላዒንሉዋ ዬሌታናው ቤሴ) ጋዳ ታኒ ኦዳዳ ደራው፣ ማላሌቶፓ። 8 ጫርኩ ባሬ ኮዬዳሳ ጫርኩ። ኔኒ አ ኮሹንቻ ሲሳሳ፤ ሺን ኢ ሃቃፔ ዪንቶ ዎይ ሃቃ ቢንቶ ኤራካ። ጌሻ አያናፔ ዬሌቲዳ ኡባይ ሃዋ ማላ» ያገደደ።

9 ኒቆዲሞሲ፣ «ሃዋ ዋኒዳ ሃናናው ዳንዳዪ?» ያገደደ ኦቼዳ።

10 ዬሱሲ ዛሬዳ፡ «ኔኒ ኢሰራዔላቱዋ ታማሪሲያዋ ገደዳ ሃዋ ኤሪኪ? 11 ታኒ ኔው ቱሙዋ ኦዳይ፤ ኑኒ ኤሪያዋ ሃሳዬቶኔ ቤዔዳዋ ማርካቲቶ፤ ሺን ኑኒ ማርካቲያዋ ሂንቲንቱ ኣኪኪታ። 12 ታኒ ሂንቲንቲሲ ሳባባ ኦዲና፡ ኣማኔናዋንታ ገደፔ፡ ሳሉዋባ ኦዲና ዋኒ ኣማናኒቱ? 13 ሳሉዋፔ ዋጄዳ ታፔ ኣቲን፡ ሳሉዋ ኬሴዳዌ ኦኒኔ ባዋ፤ ሳሉዋን ዴዒያ ኣሳ ናዒይ ታና።

14-15 «ሙሴ ዋራን ፃንቁማሉዋ ሾሻ ሱሌዳዋዳን፡ ታና ኣማኔዳ ኡባይ ሜጲና ዴዑዋ ኣካና ማላ፡ ታኒ ኣሳ ናዒይ ማሰቃሊያ ቦላ ፑዴ ዴንዳና ቤሴ።

16 «ፆሳ ናዒ ኣማኒያ ኡባይ ሜጲና ዴዑዋ ኣካናፔ ኣቲን፡ ጳዬና ማላ፡ ፆሳይ ሃ ኣላሚያ ኣሳ ሎይሊ ሲቄዳ ዲራው፡ ባሬ ማፂ ኢቲ ናዒ ኣሚዳ፡ 17 ኣዪሲ ጎፔ፡ ፆሳይ ባሬ ናዒ ሃ ኣላሚያ ኣሳ ፐርዳናው ኪቲቤና፤ ሺን ኡንቲንታ ኣ ባጋና ኣሻናው ኪቲዳ።

18 «ኣ ናዒ ኣማኒያ ኦኒኔ ፐርዴቲና፤ ሺን ናዒን ኣማኔና ኦኒኔ፡ ፆሳ ናዒ ኢቲዋ ኣማኒቤና ዲራው፡ ሃዒካ ፐርዴቲ ኡቲዳ። 19 ኣሳ ቦላ ዪያ ፐርዳይ ሃዋ፡ ፖው ሃ ኣላሚያ ዬዳ፤ ሺን ኣሳ ኪታይ ኢታ ገደዳ ዲራው፡ ፖውዋፔ ኣሊዳ፡ ጳማ ሲቄዳ። 20 ኢታባ ኦሊያ ኦኒኔ ፖውዋ ኢፂ፤ ኣዪሲ ጎፔ፡ ባሬ ኪታይ ቆንጨና ማላ፡ ፖውዋኮ ሺቄና። 21 ሺን ቱሙዋ ኦሊያ ኦኒኔ ፆሳይ ኣዛዜዳዋዳን፡ ኢ ኦሊዳዋ ፖው ቆንጨሳና ማላ፡ ፖውዋኮ ሺቄ» ያጌዳ።

**ዬሱሳኔ ፃማቂያ ዮሀንሳ**

22 ሄዋፔ ጉዪያን፡ ዬሱሳኔ ኣ ካሊያዋንቱ ዪሁዳ ጋዲያ ቤዲና፤ ዬሱሳኔ ሄ ጋዲያን ኡንቲንቲና ኣማራዳ ዋዲያ ኡቲዳ፡ ኣሳ ፃማቂዳ ዴዒ።

23 ቃሲ ዮሀንሲ ሳሌሜ ማታን ዴዒያ ሄናና ገያ ሳን ዋጋ ሃላይ ዴዒያ ዲራው፡ ኣሳይ ኣኮ ዪና ፃማቄ። 24 ሄዋ ሃኔዳዌ ዮሀንሲ ቃሺታናፔ ካሴና።

25 ሄዋፔ ጉዪያን፡ ዮሀንሳ ካሊያዋንቲና ኣማራዳ ኣዪሁዳቲዋ ሜቻ ዋጋባ \* ፓሉሜቲዲና። 26 ኡንቲንቲ ዮሀንሳኮ ቢዳ፡ «ታማሪሲያዋ፡ ዮርዳናሳ ሻፋፔ ሄፊንፋን ኔናና ዴዒያዌ፡ ኔኒ ኣባ ማርካቶዌ፡ ቤዓ ሃዒ ፃማቄ፤ ኣሳይ ኡባይካ ኣኮ ቤ» ያጌዲና።

27 ዮሀንሲ ዛሬዳ፡ «ፆሳይ ኢማና ጳዮፔ፡ ኣሳይ ኣይኔ ኣካናው ዳንዳዬና። 28 ታኒ ኪሪሰቶሳ ገደኪኬ፤ ሺን ታኒ ኣፔ ሲንፋው ኪቲታዲ» ጌዳዋሲ ሂንቲ ሂንቲንቲ ሁጹው ማርካ። 29 ሚሺራ

---

3:14-15 ገይ 21:9 \* 3:25 ኣዪሁዳቲዋ ሜቻ ዋጋባ፡ ሃዋ ጉሳይ ኣዪዳቲ ባሬንቱ ጎይናና ጋላናው ኦሊያ ዲማ ዲማ ባሬንታ ሜቻባይኔ ባሬንቲ ሳኒያ ሜጨያ ዋጋቲ ዴዒያዋ ቤሴ።



ማጫወና ደዲያ ኡራይ እካ ሚሺራ፤ ሄ ሚሺራ ሚያታይ ኡቁዳ፤ ኢ ጊያዋ ሲሲያዌ ኣ ሃሳያን ዳሮ ናሹቲ። ሄዋ ዲራው፣ ሃዌ ታ ናሹቻይ ፖሌቲዳ። 30 ኢ ዳሪና ታ ጉፃና ቤሴ» ያጌዳ።

31 ቦላፔ ዪያዌ ኡባፔ ቦላ። ሳዓፔ ቤቲዳዌ ሳዓሳ። ኢካ ሳዓባ ሃሳዬ። ሳሉዋፔ ዪያዌ ኡባፔ ቦላ። 32 ኢ ባሬ ቤዔዳባኔ ሲሴዳባ ማርካቲ፤ ሺን ኣ ማርካቲፋ ኣኪያዌ ባዋ። 33 ኣ ማርካቲፋ ኣኪያ ኦኒኔ ያሳይ ቱማንቻ ጊዲያዋ ሄዋን ማርካቲ። 34 ያሳይ ከቲዳዌ ያሳ ቃላ ኦዳ፤ ኣዪሲ ጎፔ፣ ያሳይ ባሬ ጌሻ ኣያና ፓላሂሲዳ ኢሜ። 35 ያሳይ ባሬ ናዓ ሲቁዳ ኡባባ ኣ ኩሺያን ዋሌዳ። 36 ናዓ ኣማኒያ ኡራው ሜዲና ዳዑ ዳዔ፤ ሺን ናዓ ኣማኔናዋ ቦላ ያሳ ሃንቁ ዳዓናዋፔ ኣቲን፣ ኢ ዳዑዋ ቤዔና።

### 4

#### ዬሱሳኔ ሳማሪያ ሚሺራቶ

1-3 ዬሱሲ ጥሃሊሳዋፔ ዳሪያ ባሬና ካሊያዋንታ ባሬኮ ሺሼኔ ፃማቁ ጊያዋ ፓሪሳዋቱ ሲሴዳዋ ዬሱሲ ኤሬዳ ዋዳ፣ ዪሁዳ ኣጊዳ፣ ጋሊላ ቤዳ፤ ጊዳፔኔ፣ ዬሱሳ ካሊያዋንቲ ፃማቁዳዋፔ ኣቲን፣ ዬሱሲ ባሬ ሁጳው ኦናኔ ፃማቁቤና። 4 ጋሊላ ቢዳ፣ ሳማሪያና ኣቋናዌ ኣ ኣሸናባ ጊዳዳ።

5 ሄዋ ዲራው፣ ያዪቆቢ ባሬ ናዓ ዮሴፎ ኢሚዳ ጋዲያ ማታን ዳዲያ ሲካሮ ጌቲቲያ ሳማሪያ ካታማ ቤዳ። 6 ሄ ሳዓን ያዪቆባ ሃላ ኦላይ ዳዔ፤ ዬሱሲ ሃሚታን ዳቡሪዳ፣ ሄ ሃላ ኦላ ማታን ኡቲዳ። ሄ ዋዳ ሳዓይ ኡሱፑን ሳቲያ ሄራ።

7 ሳማሪያ ሚሺራታ ሃላ ዲቃናው ዬዳዉና ዬሱሲ፣ «ታና ሃላ ኡሻሪኪ!» ያጌዳ። 8 ዬሱሳ ካሊያዋንቲ ቁማ ሻማናው ካታማ ቤዲና።

9 ሄ ሚሺራታ ዛራዳ ኣ፣ «ኔኒ ኣዪሁዳ ኣሳ ጊዳዳ፣ ሳማሪያ ማጫ ኣሳ ጊዳዳ ታና፣ ዋታ ዳዑዋ ኢሚያ ሃላ ኡሻ ጋይ?» ያጋዲ፤ ኣዪሲ ጎፔ፣ ኣዪሁዳቶኔ ሳማሪያ ኣሳው ኢቲፔቲፋይ ባይና ዲራሳ።

10 ዬሱሲ ዛራዳ ኢዞ፣ «ኔኒ ያሳ ኢሞታኔ ቃሲ ኔና ታና ሃላ ኡሻ» ጊያዌ ኦኔንቶ ኤሪያዋ ጊዲንቶ፣ ኣ ዋሳናሳ፤ ኢካ ኔው ዳዑዋ ኢሚያ ሃላ ኢማና» ያጌዳ።

11 ሚሺራታ ዛራዳ፣ «ጎዳው፣ ኔው ዲቁያባይ ባዋ፤ ኦላይካ ጨሙዋ። ያቲና፣ ዳዑዋ ኢሚያ ሃላ ሃቃፔ ኣካኒ?» 12 ኦሲ ሃ

4:5 ደዋ 33:19፤ ኢያ 24:32

4:9 ኤዝር 4:1-5፤ ናህ 4:1-2

ሃላ ኦላ ኢሜዳ ኑ አወዋ ያዩቆባፔ ኔኒ ዳራይ? ኢ፥ አ ናናይኔ አ ማሂ ሃዋፔ ኡሹዲኖ» ያጋዱ።

13 ዬሱሲ ዛሪዳ፥ «ሃ ሃላፔ ኡሹያ ኦኒኔ ላዔንሉዋ ሳሜታናዋ።

14 ሺን ታኒ ኢሚያ ሃላ ኡሹያ ኦኒኔ ላዔንሉዋ ሳሜቴና። ታኒ ኢሚያ ሃላይ ሄ አ ጊደን ሜዲና ዴዑዋሲ ፑልቴያ ፑልቴዋ ጊዳናዋ» ያጌዳ።

15 ሚሺራታ፥ «ጎዳው፥ ታኒ ሳሜቴና ማላኔ ሃላ ቲካናወካ ሃ ዬና ማላ፥ ታው ሄ ሃላ ኢማ!» ያጋዱ።

16 ዬሱሲ ኢዞ፥ «ባዴ ኔ አሲና ጃሳዴ ሃ ሰማ» ያጌዳ።

17 ሚሺራታ ዛሪዳ፥ «ታው አሲናይ ባዋ» ያጋዱ።

ዬሱሲ፥ «ታው አሲናይ ባዋ ጊያዋን ቱሙዋ ጋዳ። 18 ኔኒ ኢቼቹ አሲና ጌላዳ፤ ሃሊ ኔናና ዴዒያ ቢታኒ ኔ አሲና ጊዳና። ኔኒ ሃሊ ታው ኦዴዳዌ ቱማ» ያጌዳ።

19 ሚሺራታ ቃይ፥ «ጎዳው፥ ኔኒ ናቢያ ጊዲያዋ ታ ሃሊ ኤራዲ፤ 20 ኑ ሳማሪያ አሳ አዋቱ ሃ ዴሪያን \* ጎዩኔዲና፤ ሺን አዪሁዳቱ ሂንቴንቴ አሳይ ያሳው ጎዩናናው ቤሲያ ሳሳይ ዬሩሳላሜና ያጌታ» ያጋዱ።

21 ዬሱሲ፥ «ሃ ሚሺራቴ፥ ታና አማና፤ ሃ ዴሪያን ዋይ ዬሩሳላሜን አወዋ ያሳው ሂንቴንቴ ጎዩኔና ዋዲ ያናዋ።

22 ሂንቴንቴ ሳማሪያ አሳይ ሂንቴ ኤሪናባው ጎዩኒታ፤ ያሳይ ኑና አዪሁዳቱዋ ጎዔቴዳ አቶቴላ አሂያ ዲራው፥ ኑኒ ኑ ኤሪያዋ ጎዩኔቶ። 23 ሺን አወዋ ያሳው ቱሙዋፔ ጎዩኒያዋንቴ አ፥ ጌሻ አያና ዋልቃኒኔ ያሳ ያሳቴላዳን ጎዩኒያ ዋዲ ማታቴዳ፤ ኡባ ሃሊካ ጋከዳ። አዪሲ ጎፔ፥ አሳ ባሪው ጎዩናና ማላ፥ አወ ያሳይካ ሃ ኦጊያን ጎዩኒያዋንታ ኮዬ። 24 ያሳይ አያና፤ አው ጎዩኒያዋንቴካ ጌሻ አያና ዋልቃኒ ያሳ ያሳቴላዳን ጎዩናናው ቤሴ» ያጌዳ።

25 ሚሺራታ፥ «ማሲሂያ ጌቴቴያ ኦኩቶዌ ያናዋ ታኒ ኤራይ። ኢ ዪያ ዋዴ ኑሲ ኡባባ ኦዳናዋ» ያጋዱ።

26 ዬሱሲ፥ «ሃ ኔናና ሃሳዪያዌ ታኒ አ» ያጌዳ።

27 ሃዋ ኡንቴንቴ ሃሳዪሺን፥ ዬሱሳ ካሊያዋንቴ ቤዳሳፔ ሲሜዲኖ። ዬሱሲ ሚሺራቴና ሃሳዪሺን ኡንቴንቴ ቤዒዴ ዳሪሲ ማላሌቴዲኖ፤ ሺን ሚሺራቶ፥ «አያ ኮያይ?» ዋይ ዬሱሳ፥ «አናና አዪሲ ሃሳያይ?» ጊዴ ኦቾዌ ኦኒኔ ባዋ።

28 ሄዋፔ ጉዪያን፥ ሚሺራታ ባሪ ሃላ ኦቱዋ አጋ ባሻ ጉዬ ካታማ ባዴ አሳው፥ 29 «ታኒ ኦሎዳዋ ኡባ ታው ኦዴዳ ቢታኒያ

\* 4:20 ሃ ዴሪያን፥ ጊያዌ ዴሪያ ጌሪዛና ጊዲዴ ሴኬማ ጌቴቴያ ካታማ ማታን ዴዒያዋ።

በዓናው ዳንዲቲ፤ ሄዌ ከሪስቶሳ ጊዳንዳሻ?» ያጋዲ። 30 አሳይ ካታማፕ ኬሲዳ፣ ዩሱሳኮ ቤዳ።

31 ሄዌ ሃኒሺን፣ አ ካሊያዋንቱ ዩሱሳ፣ «ጉላባ ማሪኪ!» ያጊዳ ዋሴዲኖ።

32 ሺን ኢ፣ «ታው ሂንቴንቱ ኤሬና ቁማይ ታኒ ሚያዌ ዳዔ» ያጊዳ።

33 ሄዋ ዲራው፣ አ ካሊያዋንቱ ባሬንቱ ጊዳን፣ «አው ሚያባ አሄዳ አሳይ ዳዓንዳሻ?» ያጊዳ።

34 ዩሱሲ ኡንቱንቱሲ፣ «ታ ቁማይ ታና ከቲዳዋ ሸኒያ ኡዲሳኔ አ ኦሱዋ ፖሉሳ። 35 ሂንቴንቱ፣ «አይዲ አገናፕ ጉዩያን፣ ካላይ ጫኬታናዋ» ገኪቲዬ? ታኒ ሂንቴንቱሲ ኦዲይ፤ ገሻ ሎይሌ ያሊቲ፤ ካላይ ጫካ ቤሴዳ። 36 ዜሪያዌኔ ጫኪያዌ ኢቲፕ ናሽታና ማላ፣ ጫኪያዌ ዲርጉዋ አኬኔ ካላ ሜዲና ዳዖ ሸሸ። 37 ሃ ጋሱዋን፣ «ኢቲ ዜሬ፤ ቃሲ አቲ ጫኬ» ጊያ ሃሳያይ ቱማ። 38 ሂንቴንቱ ዲቡሪቤናዋ ጫካና ማላ፣ ታኒ ሂንቴንታ ከታዲ፤ ሃራቱ ኦሊ ዲቡራዲኖ፤ ሂንቴንቱ ሃራቱዋ ዲቡራን ጌሌዲታ» ያጊዳ።

39 ሚሺራታ፣ «ኢ ታኒ ኦሌዳ ኡባባ ኦዳዳ» ጋዴ ማርካቲዳ ዲራው፣ ሄ ካታማን ዳዒያ ሳማሪያ አሳፕ ጮራይ ዩሱሳ አማኔዳ። 40 ሳማሪያ አሳይ ዩሱሳኮ ዩዳ ዋዴ፣ ባሬንቱ ማታን ጋሚዓና ማላ፣ ዩሱሳ ዋሲና ኢ ያኒ ላዑ ጋላሳ ኡቲዳ።

41 ኢ ኦዲያ ቃላ ዲራው፣ ካሱዋፕ ጮራ አሳይ አማኔዳ፤ 42 ቃሲ ኡንቱንቱ ሚሺራቶ፣ «ኮኒ ኮ ሁጳው ኢ ጊያዋ ሲሲዳ አማኔዳዋፕ አቲን፣ ኔኒ ማርካቲዳ ዲራሳ ጊዳና፤ ኢ ቱሙ አላሚያ አሳ አሺያዋ ጊዲያዋካ ኮኒ ኤሬደ» ያጊዳ።

**ዩሱሲ አቲ ካፑዋ ናዓ ፓሌዳ**

43 ላዑ ጋላሳፕ ጉዩያን፣ ዩሱሲ ሳማሪያፕ ኬሲዳ፣ ጋሊላ ጋዲያ ቤዳ። 44 አዩሲ ጎፕ፣ ኢ ባሬ ሁጳው፣ «ናቢ ባሬ ጋዲያን ቦንቹቲና» ያጊ ዦዳዳ። 45 ዩሱሲ ጋሊላ ጋኬዳ ዋዴ፣ ጋሊላ አሳይ አ ሞኬዳ፤ ፓሲጋ ቦንቹያ ጋላሲ ኡንቱንቱ ዩራሳላሜን ዳዒያ ዲራው፣ ኢ ኦሌዳ ኡባባ ቤዔዲኖ።

46 ዩሱሲ ሃላ ዋዩኒያ ኡሻ ኬሴዳ፣ ጋሊላን ዳዒያ ቃና ካታማ ቤዳ። ቁሬሪናሆማን አ ናዓይ ሳኬቲያ፣ ካቲያ ጎሌን ኦሊያ ኢቲ ካፑ ዳዔ። 47 ዩሱሲ ዩሁዳፕ ጋሊላ ዩዳዋ ሄ ካፑ ሲሲዳ፣ አኮ ዩዳ ሃይቃናው ማቲዳ ባሬ ናዓ ቢዳ ፓላና ማላ፣ ዩሱሳ ዋሴዳ።

48 ዩሱሲ ሄ ካፑዋ፣ «ጾሳይ ኦሊያ ማላታኔ ሄቾ ጊሲያባ ቤዔናኒ ዳዒዳ፣ ሂንቴንቱ አዩኔ አማኒቢታ» ያጊዳ።

49 ሄ ካፑ ዛሬዎ፡ «ሳዳው፡ ታ ናዓይ ሃይቄናን ዳዒሺን፡ ታናና ባሪኪ» ያጌዳ።

50 ዬሱሲ፡ «ባ፤ ኔ ናዓይ ፓፃ ዳዓናዋ!» ያጌዳ።

ሄ ካፑ ዬሱሲ ጌዳዋ አማኒዳ ቤዳ። 51 ኢ ባሬ ጎሌ ቢሺን፡ አ ቆማቱ አናና ኦሊያን ጋኬቲዳ አ፡ «ኔ ናዓይ ፓፃ ዳዓ» ጌዲኖ።

52 ኢ ባሬ ቆማቱዋ ባሬ ናዓው አይ ሳቲያን ኬኬዴንቶ ኦቸና ኤንቱንቱ፡ «ዚኖ ላፑ ሳቲያን ቆፀ አ አጌዳ» ያጌዲኖ። 53 ናዓ አዉ ዬሱሲ ባሬው፡ «ኔ ናዓይ ፓፃ ዳዓናዋ» ጌዳዌ ሄ ሳቲያን ጌዳዳዋ ሃሳዬዳ። ሄዋ ዲራው፡ ኢኔ አ ሶይ አሳይ ኡባይ አማኔዲኖ።

54 ሃዌ ዬሱሲ ዪሁዳፕ ጋለላ ዪዳ ኦሌዳ ላዔንሶ ማላታ።

### 5

#### ዬሱሲ ጉንዳ ቢታኒያ ዳጋቲ ኡቴዳ ሃላ ማታን ፓሌዳ

1 ሄዋፕ ጉዪያን፡ ዬሱሲ አዪሁዳቱ ቦንቸያ ባላው ዬሩሳላሜ ቤዳ። 2 ዬሩሳላሜን ዶርሳ ፔንጊያ ማታን ኢብራዩስዔ ቃላን ቤቴሳይዳ ጌቴቲያ ዳጋቲ ኡቴዳ ሃላይ ዳዔ፤ ሄ ዳጋቲ ኡቴዳ ሃላ ዩዪ አዴዳ ኢቸሹ ካሻይ ዳዔ። 3 ሄዋን ጮራ ሃርጋንቻቱ፡ ቆቃቱ፡ ዋባቱኔ ሲሌዳዋንቱ ጊሴዲኖ። [ሃላይ ቃዲያዋ ናጊኖ። 4 አዪሲ ጎፕ፡ ኢቲ ኢቲ ጌዳ ጎዳ ኪታንቻይ ሄ ዳጋቲዳ ሃላኮ ጌሊዳ፡ ሃላ ቃሌ፤ ሃላይ ቃዲያዋፕ ጉዪያን፡ ኮይሮ ጌሌዳ ኡራይ ባሬና ኦይቄዳ አይ ሃርጊያፕካ ፓዔ።] \* 5 ሄዋን ሃታማኔ ሆሰፑን ላይላ ሳኬቴዳ ኢቲ ቢታኒ ዳዔ። 6 ሄ ቢታኒ ሄዋን ጊሴዳዋ ዬሱሲ ቤዒዳ፡ ዳሮ ዋዲያ ሳኬቴዳዋካ ኤሪዳ ቢታኒያ፡ «ፓፃናው ኮያይ?» ያጌዳ።

7 ሳኬቴያ ቢታኒ ዛሬዎ፡ «ሳዳው፡ ሃላይ ቃዲያ ዋዔ፡ ታና ሃላን ዬጊያ አሳይ ጳዬዳ፤ ታኒ ጌላና ሃኒያ ዋዔ፡ ሃራ ኡራይ ታፕ ካሴቲዳ ጌሊ አጌ» ያጌዳ።

8 ዬሱሲ አ፡ «ዳንዳ ኤቃ፤ ኔኒ ጊሶዋ ቶካዳ ባ» ያጌዳ።

9 ቢታኒ ኤሌካ ፓዒ አጌዳ፤ ባሬ ጊሱዋ ቶኪዳ ቤዳ።

ሄዌ ሃኔዳዌ ሳምባታ ጋላሳና። 10 ሄዋ ዲራው፡ አዪሁዳቱ ፓዔዳ ቢታኒያ፡ «ሃቸ ሳዓይ ሳምባታ፤ ኔኒ ኔ ጊሱዋ ቶካ ቢያዌ ዋጋ ጊዳና» ያጌዲኖ።

11 ሺን ቢታኒ፡ «ታና ፓሌዳዌ፡ ሳኔ ጊሱዋ ቶካዳ ባ» ያጌዳ። ጌዳ ኤንቱንቱሲ ዛሬዳ።

\* 5:4 ሃ ፓይዳ ኢቲ ቤኒ ኮይሮቲዳ ዓፌቲዳ ጌሻ ማፃፋቱዋን ባዋ። 5:10 ናህ 13:19፤ ኤርሞ 17:21

12 ኡንቱንቱ አ፡ «ኔና፡ ህ ጊሱዋ ቶካዴ ባ፡ ጌዳዌ ኢ ኦኔ?» ጊዴ ኦቼዲኖ።

13 ሺን ሄዋን ጮራ አሳይ ዳዒያ ዲራውኔ፡ ዬሱሲካ ጌሜቲዳ ዲራው፡ ቢታኒ ባሬና ፓሌዳዌ ኦኔንቶ ኤሬና። 14 ዬሱሲ ጉዬፔ ሄ ቢታኒያ ጌሻ ጎሊያን ዳሚዴ፡ «ቤዓ፡ ኔኒ ሃራ ፓፃዳ፤ ሃዋፔካ ኢታባይ ኔና ጋኬና ማላ፡ ላዒንሶ ናጋራ ኦሳፓ» ያጌዳ። 15 ሄዋፔ ጉዬያን፡ ቢታኒ ቢዴ፡ ባሬና ፓሌዳዌ ዬሱሳ ጊዲያዋ አዪሁዳ አሳ ካፓቶ ኦዳዳ።

16 ዬሱሲ ሃዋ ሳምባታን ኦሌዳ ዲራው፡ ኡንቱንቱ ዬሱሳ ዬዳሳን ዋዪሱዋ ደሚዲኖ። 17 ዬሱሲ ዛሬዴ ኡንቱንቱሲ፡ «ታ አቡ ኡባ ዎዴ ኦሌ፤ ታኒካ ኦላናው ቤሴ» ያጌዳ።

18 ሄዋ ዲራው፡ ዬሱሲ ሳምባታ ጋላሳ ቦንቹና ዲራ ፃላላሳ ጊዴናን፡ ባሬና ያሳና ቃራዪዴ፡ «ያሳይ ታ አባ» ጌዳ ዲራው፡ አዪሁዳ አሳ ካፓቱ አ ዎቆናው ካሴዋፔ ሚኒሲዴ ኮዪኖ።

**ያሳ ናዓ ማታ**

19 ዬሱሲ ዛሬዴ ኡንቱንቱሲ፡ «ታኒ ሂንቱንቱሲ ቱሙዋ ኦዳይ፤ ናዓይ ባሬካ አይኔ ኦሌና። ኢ ባሬ አቡ ኦሌሺን ቤዒያዎ ፃላላ ኦሌ፤ አዉ ኦሌያዎ ናዓይካ ኦሌ። 20 አዪሲ ጎፔ፡ አዉ ባሬ ናዓ ሲቁ፤ ቃሲ ኢ ኦሌያ ኦሱዋ ኡባባ ባሬ ናዓ ቤሴ። ኡባ ሂንቱንቱ ማላሌታና ጋካናው፡ ኢ ሃዋፔ አቋያ ኦሱዋካ ባሬ ናዓ ቤሳናዎ። 21 ጋሱኔ፡ አዉ ሃይቄዳዎንታ ሃይቄዋፔ ዴንሊዴ ሸምፔዋና ዎሊያዎዳን፡ ናዓይካ ቃሲ ባሬ ኮዮዎንታ ሸምፔዋና ዎሌ። 22-23 አሳይ ኡባይ አዉዋ ቦንቹያዎዳን፡ ናዓካ ቦንቻና ማላ፡ አዉ ፒርዳ ኡባ ናዓው አሚዳዎፔ አቲን፡ ኢ ኦናኔ ፒርዴና፤ ናዓ ቦንቹና ኡራይ፡ አ ከቲዳ አዉዋካ ቦንቹና።

24 «ታኒ ሂንቱንቱሲ ቱሙዋ ኦዳይ፤ ታ ቃላ ሲሲያዎኔ ታና ከቲዳዎን አማኒያዎ ሜቋና ዴዑ ዴዔ። ሃይቄዋፔ ዴዎ ኢ ፒኔዳዋፔ አቲን፡ ፒርዴቲና። 25 ታኒ ሂንቱንቱሲ ቱሙዋ ኦዳይ፤ ሃይቄዳ አሳይ ያሳ ናዓ ኮሻ ሲሲያ ዎዲ ያናዎ፤ ሄዎኔካ ሃዓ። ሄ ኮሻ ሲሲያዎንቱ ሸምፔዋና ዴዓና። 26 አዪሲ ጎፔ፡ አዎ ዴዑዋ አሚያ ዎሊቃይ ዴዒያዎዳን፡ ዴዑዋ አሚያ ሄ ዎሊቃ ባሬ ናዓዉካ አሚዳ። 27 ያሳ አዉ ባሬ ናዓው ፒርዲያ ማታ አሚዳ፤ አዪሲ ጎፔ፡ ናዓይ አሳ ናዓ።

28 «ሃዋን ማላሌቶፒቲ፤ አዪሲ ጎፔ፡ ዲፋዎን ዴዒያዎንቱ አ ኮሻ ሲሲያ ዎዲ ዬ። 29 ሲሲዴ ኡንቱንቱ ዲፋዋፔ ጋፃ

ከሳና፤ ሎዖባ አሌዳዋንቱ ደዑዋን ደዓናው ደንዳና፤ ቃሲ ኢታባ አሌዳዋንቱ ፒርዳታናው ደንዳናዋንታ።

**ዬሱሳሲ ማርካቴዳ አሳቱዋ**

30 «ታኒ ታፔ አይኔ አላናው ደንዳዩከ፤ ያሳይ ታው ኦዳዳዋዳን ፒርዳይ። ታ ፒርዳይ ቱማ፤ አዩሲ ጎፔ፤ ታኒ ታና ከቴዳዋ ሸኒያ ፖሊያዋፔ አቲን፤ ታኒ ደሲያዋ አሊከ።

31 «ታኒ ታ ሁጵው ታባ ማርካቶፔ፤ ታ ማርካቴላይ ቱማ ጊደና። 32 ታባ ማርካቴያዌ ሃራይ ዳዔ፤ ኢ ታባ ማርካቴያዌ ቱማ ጊዲያዋ ታኒ ኤራይ።

33 «ሂንቴንቱ የሃኒሳኮ አሳ ከቲና፤ ኢ ኡንቴንቶ ቱሙዋ ማርካቴዳ። 34 ታኒ ሂዋ ሂንቴንታ አቲና ጋይ ጊያዋፔ አቲን፤ አሳ ማርካቴላይ ታው ኮሺና ጊደና። 35 የሃኒሲ ሙቃዳዳን፤ ኤጄዳኔ ፖሲሴዳ፤ ሂንቴንቱካ አማሬዳ ዋዲያ አ ፖዑዋን ናሽታናው ኮዬዲታ።

36 «ሺን ታው የሃኒሳዋፔ አጲያ ማርካቴላይ ዳዔ፤ አዩሲ ጎፔ፤ ታኒ ወርሳናው ታ አቡ ታው ኢማዳ ከታይ፤ ሃ ታኒ አሊያዌ፤ ኢ ታና ከቴዳዋ ጊዲያዋ ማርካቴ።

37 «ቃሲ ታና ከቴዳ ታ አቡ ባሬ ሁጵው ታባ ማርካቴ። ሂንቴንቱ አ ኮሻ አይኔ ሲሲቤይኪታ፤ አ ማላካ ቤዒቤይኪታ። 38 ኢ ከቴዳዋ አማኔና ዲራው፤ አ ቃላይ ሂንቴንቱ ዋዛናን ባዋ።

39 «ያሳ ማፃፋቱዋፔ ሜጲና ደዑዋ ዳሚያዋ ሂንቴው ማላቲና፤ ኡንቴንታ ቢዲታ፤ ኡንቴንቱካ ታባ ማርካቴያዋንታ። 40 ሺን ደዑዋ ዳማናው ታኮ ዩያዋ ሂንቴንቱ ኮዩኪታ።

41 «ታኒ አሳፔ ቦንቹዋ ኮዩከ። 42 ሺን ታኒ ሂንቴንቱ ዋዛናን ያሳ ሰቁ ባይናዋ ኤራይ። 43 ታኒ ታ አቡ ሱንላን ያዲ፤ ሺን ታና አኪቤይኪታ። ሺን ሃራ አሳይ ባሬ ሱንላን ዩያ ዋዳ፤ አ አኪታ። 44 ሂንቴንቱ ኢቱ ኢቱዋ ቦንቹታ፤ ሺን ኢቲ ያሳፔ ዩያ ቦንቹዋ ኮዩኪታ። ያቲና፤ ዋኒዳ አማናናው ዳንዳዩቱ?

45 «ታኒ ታ አቡ ሲንላን ሂንቴንታ ዋቲያዋ ሂንቴው ማላቶፖ፤ ሂንቴንታ ዋቲያዌ፤ ሂንቴ ሂደታ ዋሊያ ሙሳ። 46 ሂንቴንቱ ሙሳ አማኔዳባ ጊዲንቶ፤ ታናካ አማናኒታ፤ አዩሲ ጎፔ፤ ታባ ፃፌዳዌ አ። 47 ሺን ሂንቴንቱ ኢ ፃፌዳዋ አማኔናን ኢያፔ፤ ታኒ ጊያዋ ዋቲ አማናኒቱ?» ያጌዳ።

# 6

ዮሱሲ 5000 እሳ ሚዜዳ  
(ማጥ 14:13-21፤ ማር 6:30-44፤ ሉቅ 9:10-17)

1 ሄዋፔ ጉዩያን፣ ዮሱሲ ጋሊላ አባፔ ዋይ ዒቢሪያደሳ አባፔ ሄሬንላ ፒኔዳ። 2 ኢ ሃርጋንቻቱዋ ቦላ ኦሌዳ ዋልቃማ ማላታ ቤዔዳ ዲራው፣ ጮራ አሳይ ኦ ካሌዳ። 3 ዮሱሲ ዳሪያ ኬሲዳ፣ ያኒ ባሬና ካሊያዋንቱና ኢቲፔ ኡቴዳ። 4 አዩሁዳቱ ቦንቺያ ፓሲጋ ጋላሳይ ጋኬዳ። 5 ዮሱሲ ሲንሳኮ ዒሊዳ፣ ጮራ አሳይ ባሬኮ ዩያዋ ቤዒዳ ፒሊጶሳ፣ «ሃ አሳ ኡባ ሚዛናው ገዲያ ቁማ ሃቃፔ ሻማኔ?» ያጌዳ። 6 ኢ ሄዋ ፒሊጶሳ ፓጫናው ጌዳ፤ አዩሲ ጎፔ፣ ኢ ባሬ ሁጾው ኣያ ኦላና ቤሲንቶ ኦላናባ ኤሬ።

7 ፒሊጶሲ ዛሬዳ ዮሱሳ፣ «ሁጲያን ሁጲያን፣ ሃራይ ኣቶ ኢቲ ኢቲ ባርሱዋ ጋላናው፣ ላዑ ዌቱ ዲናሪያን ሻሜዳ ኡኪላይካ ገዴና» ያጌዳ።

8 ቃሲ ዮሱሳ ካሊያዋንቱፔ ኢቱ፣ ሲሞኒ ጳዒርሳ ኢሻይ ኢንዲራሲ። 9 «ባንጋ ኡኪላ ኢቺሹኔ ላዑ ሞሊ ዳዳ፤ ኢቲ ናባይ ሃዋን ዳዔ፤ ሺን ሃ አሳ ኡባው ሄዌ ዋቲ ገዳኔ?» ያጌዳ።

10 ዮሱሲ ባሬና ካሊያዋንታ፣ «አሳይ ኡታናዳን ኡዲቲ» ያጌዳ። ሄ ሳባን ዳር ማታይ ዳዔ። አሳይ ኡባይ ኡቴዳ፤ አቱማ አሳይ ኢቺሹ ሻዓ ገዲያዋ። 11 ዮሱሲ ኡኪላ ኣኬዳ፤ ያሳ ጋላቲዳ፣ ሄዋን ኡቴዳ አሳው ገሼዳ። ሞሊያካ ሄዋዳን ኦሊና አሳይ ባሬ ኮዩዳዋ ከና ሜዳ። 12 ኡንቲንቲ ኡባይ ካሌዳዋፔ ጉዩያን፣ ዮሱሲ ባሬና ካሊያዋንታ «ኢቲባይካ ጮ ባዬና ማላ፣ አቲዳ ደካ ሺሺቲ» ያጌዳ። 13 ሄዋ ዲራው፣ ኡንቲንቲ ኡባካ ሺሺዲኖ፤ አሳይ ካሊና አቲዳ ባንጋ ኡኪላ ደካ ሺሺዳ፣ ታማኔ ላዑ ዛሞቤሊያ ኩንሌዲኖ።

14 አሳይ ዮሱሲ ኦሌዳ ዋልቃማ ማላታ ቤዔዳ ዋዳ፣ «ሃዌ ቱሙዋፔ ሃ ሳባ ያና ጌዳ ናቢያ» ያጌዲኖ። 15 ኡንቲንቲ ዩዴ ባሬና ዋልቃን ኦይቂ ካቲያ ኦላናው ሃኒያዋ ዮሱሲ ኤሪዳ፣ ባሬካ ዳሪያ ቦላ ሺሬቲዳ ኬሴዳ።

ዮሱሲ አባ ቦላን ሃሜቲዳ ቤዳ  
(ማጥ 14:22-33፤ ማር 6:45-52)

16 ሳባይ ኦማሪሴዳ ዋዳ፣ ዮሱሳ ካሊያዋንቲ አባኮ ቤዲኖ፤ 17 ሳባይ ቃሜዳ፤ ሺን ዮሱሲ ኡንቲንቲኮ ሄ ሳቲ ጋካናው ዩቤና፤ ሄዋሲ ኡንቲንቲ ዋንገሪያን ጌሊዳ፣ አባ ፒኒ ሄሬንላ ቂሬሪናሆማ ቤዲኖ። 18 ዋልቃማ ጫርኩ ጫርኬዳ ዲራው፣ አባይ ቃዌዳ፤

19 ኢቲ ሳቲያ ኬና ኡንቱንቱ ኣባ ሻሳዋፔ ጉዩያን፣ ዩሱሲ ኣባ ቦላና ሃሚቲዴ ዩያዋ ቤዒዴ ያዩዲኖ። 20 ሺን ኢ፣ «ያዮፕቲ፣ ታናቲ!» ያጌዲ። 21 ኡንቱንቱ ዋንጊሪያን ኣ ጌሊሳናው ኮዩዲኖ፣ ዋንጊሪ ኡንቱንቱ ቢያሳ ኣባ ጋፃ ኤሌካ ጋኪ ኣጌዲ።

**ዩሱሲ ዴዑዋ ኡኪላ**

22 ዋንቲላ ጋላሲ፣ ኣባፔ ሄፊንላና ኣቲዳ ጮራ ኣሳይ ኣባ ቦላ ኢቲ ዋንጊሪያ ፃላላይ ዴዒያዋ ቤዒዲኖ፣ ዩሱሲ ባሬና ካሊያዋንቲና ዋንጊሪያን ጌሊዴ፣ ኡንቱንቲና ቤናን፣ ኡንቱንቲ ባሬካ ቤዳዋ ኣኬኬዲኖ። 23 ሺን ፃቢሪያደሳፔ ሃራ ዋንጊራቲ ዩሱሲ ያሳ ጋላቲና፣ ኣሳይ ኡኪላ ሜዳሳ ማታ ዩዲኖ። 24 ኣሳይ ዩሱሲ ዋይ ኣ ካሊያዋንቲ ሄዋን ባይናዋ ቤዒዴ፣ ዩሱሳ ኮያናው ዋንጊሪያን ጌሊዴ፣ ቁፊሪናሆማ ቤዲኖ።

25 ኣሳይ ዩሱሳ ኣባፔ ሄፊንላን ዴሜዳ ዋይ፣ «ታማሪሲያዎ፣ ሃዋ ኣዉዴ ያዲ?» ያጌዲኖ።

26 ዩሱሲ ዛሪዴ፣ «ታኒ ሂንቲንቲሲ ቱሙዋ ኦዳይ፣ ሂንቲንቲ ታና ኮዩያዋ ኡኪላ ሜዳ ዲራሳኔ ካሌዳ ዲራሳ ጊዲያዋፔ ኣቲን፣ ዋልቃማ ማላታ ቤዒዳ ዲራሳ ጊዴና። 27 ሜዲና ዴዑዋ ቁማው፣ ታኒ ኣሳ ናሳይ ሂንቲንቲሲ ኢማናዎ፣ ኦሲፔፔ ኣቲን፣ ሳሚያ ቁማው ኦላፕቲ፣ ኣዩሲ ጎፔ፣ ኣዉ ያሳይ ሄዋ ዲሺሳናው ማታፋ ኣታሚ ዋሌዳ» ያጌዲ።

28 ሄዋፔ ጉዩያን ኡንቱንቲ፣ «ኮኒ ያሳ ኦሱዋ ኦላናው ኣያ ኦላናው ቤሲ?» ያጌዴ ዩሱሳ ኦቹዲኖ።

29 ዩሱሲ ዛሪዴ፣ «ሂንቲንቲ ኦላና ማላ፣ ያሳይ ኮዩያ ኪታይ ሃዋ፣ ኢ ኪቲዳዋን ኣማኒቲ» ያጌዲ።

30 ኡንቱንቲ ዛሪዴ፣ «ኮኒ ቤዒዴ፣ ኔናን ኣማናና ማላ፣ ኣይ ዋልቃማ ማላታ ኦላኒ? ኣያ ኪቲታኒ? 31 ያሳ ማፃፋን፣ «ኡንቱንቲ ማና \* ማላ ሳሉዋፔ ኡኪላ ኢሜዳ» ያጌቲ ፃፊቶዋዳን፣ ኦ ኣዋቲ ሜላ ቢታን ማና ሜዲኖ» ያጌዲኖ።

32 ዩሱሲ፣ «ታኒ ሂንቲንቲሲ ቱሙዋ ኦዳይ፣ ሂንቲንቲሲ ሳሉዋፔ ቱሙ ኡኪላ ኢሚያዋ ታ ኣባፔ ኣቲን፣ ሂንቲንቲሲ ሳሉዋፔ ኡኪላ ኢሜዳዋ ሙሳ ጊዴና። 33 ኣዩሲ ጎፔ፣ ቱማ ጊዴዳ ያሳ ኡኪላይ፣ ሳሉዋፔ ዋዲያዋ ሃ ኣላሚያ ኣሳው ዴዑዋ ኢሜ» ያጌዲ።

---

\* 6:31 ማና፡ ኢሰራዒሊያ ኣሳይ ጊብፂ ጋዲያፔ ኬሲ ካናኔ ቢዴ ሜላ ቢታን ሃሜቲዴ ቢያ ዋይ፣ ኡንቱንቲ ማናዳን ያሳይ ኢሜዳ ማልዒያ ቁማ። ማና ጉሳይ ኢብራዩስኒያ ቃላን «ሃዌ ኣዩ?» ጊያዋ። 6:31 ኬስ 16:4፣ 15፣ ማዝ 78:24



34 ኡንቲንቲ ዛሪዳ፡ «ጎዳው፡ ኑካ ሄ ኡኪላ ኡባ ዎዴ ኢማ» ያጌዲኖ።

35 ዬሱሲ፡ «ታኒ ዴዑዎ ኡኪላ፤ ታኮ ዪያ ኡራይ ኡባካ ኮሻቲና። ቃሲ ታና ኣማኒያ ኡራይ ኣይኔ ሳሜቲና። 36 ሺን ታኒ ሂንቲንቲሲ ኦዴዳዎዳን፡ ሂንቲንቲ ታና ቤዔዲታ፤ ሺን ኣማኒኪታ። 37 ታ ኣቡ ታው ኢሚያ ኡባይ ታኮ ያናዎ፤ ቃሲ ታኮ ዪያ ኦናኔ ኡባካ ታኒ ካሪ ዬዲኬ። 38 ኣዪሲ ጎፔ፡ ታኒ ታና ከቲዳዎ ሺኒያ ፖላናው ሳሉዋፔ ያዲፔ ኣቲን፡ ታ ሺኒያ ፖላናው ያቤይኬ። 39 ታና ከቲዳዎ ኮዪያዌ ሃዎ፤ ታኒ ኢ ታው ኢሜዳ ኡባቲዋካ ወርሴላ ጋላሲ ዴንላናፔ ኣቲን፡ ኢቲዋካ ባዪዛና ማላ ኮዬና። 40 ኣዪሲ ጎፔ፡ ታ ኣቡ ኮዪያዌ ሃዎ፤ ታና ናዓ ቤዔዲ፡ ኣማኒያ ኡባቲ ሜዲና ዴዑዎ ኣካናዋንታ፤ ታኒካ ሄ ኡባቲዋ ወርሴላ ጋላሲ ዴንላና» ያጌዲኖ።

41 ዬሱሲ፡ «ታኒ ሳሉዋፔ ዎዴዳ ኡኪላ» ጌዳ ዲራው፡ ኣዪሁዳቲ ኣ ቦላ ዙዙሚዲኖ። 42 ኡንቲንቲ፡ «ሃዌ ኮኒ ኣ ኣወዋኔ ኣ ኣቶ ኤሪያ ዮሴፎ ናዓ ዬሱሳ ገዴኔ? ያቲና፡ ኢ ዋጊዴ፡ <ታኒ ሳሉዋፔ ዎዴዳ> ጋናው ዳንዳዪ?» ያጌዲኖ።

43 ዬሱሲ ዛሪዳ፡ «ኢቲ ኢቲዋና ዙዙሚያዎ ኣገቲ። 44 ታና ከቲዳ ታ ኣቡ ታኮ ኣሄዳ ኣሳፔ ኣቲን፡ ታኮ ያናው ዴንዳዪያ ኣሳይ ባዎ፤ ታኒካ ወርሴላ ጋላሲ ኣ ዴንላና። 45 ናባቲ <የሳይ ኣሳ ኡባ ታማሪሳና> ያጊዴ ፃፊዲኖ፤ ኣወ ጊያዎ ሲሲያዌኔ ኣወዋፔ ታማሪያዌ ኦኒኔ ታኮ ዬ። 46 ያሳ ማታፔ ዬዳዎፔ ኣቲን፡ ያሳ ቤዔዳ ኣሳይ ባዎ፤ ኣ ፃላላይ ያሳ ቤዔዳ።

47 «ታኒ ሂንቲንቲሲ ቱሙዎ ኦዲይ፤ ታና ኣማኒያ ኡራው ሜዲና ዴዑ ዴዔ። 48 ታኒ ዴዑዎ ኡኪላ። 49 ሂንቲንቲ ኣዎቲ ሜላ ቢታን ማና ሜዲኖ፤ ሺን ሃይቄዲኖ። 50 ኣሳይ ኣፔ ሚዴ ሃይቄና ኡኪላይ ሳሉዋፔ ዪያዌ ሃዎ። 51 ሳሉዋፔ ዎዴዳ ዴዑዎ ኡኪላይ ታና፤ ኦኒኔ ሃ ኡኪላፔ ሞፔ፡ ሜዲናው ዴዓናዎ፤ ቃሲ ሃ ኣላሚያ ኣሳው ዴዎ ገዳና ማላ፡ ታኒ ኢማና ኡኪላይ ታ ኣሹዋ» ያጌዲኖ።

52 ኣዪሁዳቲ፡ «ሃ ቢታኒ ባሪ ኣሹዋ ኮኒ ማና ማላ፡ ኮሲ ዎቲዴ ኢማናው ዳንዳዪ?» ያጊዴ ባሪንቲ ጊዲዋን ፓሉሜቲዲኖ።

53 ሄዎ ዲራው፡ ዬሱሲ ኡንቲንቲ፡ «ታኒ ሂንቲንቲሲ ቱሙዎ ኦዲይ፤ ታ ኣሹዋ፡ ኣሳ ናዓ ኣሹዋ፡ ሂንቲንቲ ማና ዳዮፔ፡ ቃሲ ታ ሱላካ ኡሻና ዳዮፔ፡ ሂንቲው ዴዑ ባዎ። 54 ታ ኣሹዎ ሚያ ኡራውኔ፡ ታ ሱላ ኡሺያ ኡራው ሜዲና ዴዑ ዴዔ። ታኒ ወርሴላ ጋላሲ ኡንቲንቲ ዴንላና። 55 ኣዪሲ ጎፔ፡ ታ ኣሹ ቱሙ ቁማ፤ ታ ሱላይካ ቱሙ ኡሻ። 56 ታ ኣሹዎ ሚያ ኡራይኔ ታ ሱላ ኡሺያ

ኡራይ ታናን ዳዔ፤ ታኒካ አናኒ ዳዓይ። 57 ደዑዋ አዉ ታና ኪቲና፤ ታኒ ኣ ጋሱዋን ዳዒያዎዳን፤ ታና ሚያ ኡራይካ ታ ጋሱዋን ዳዓና። 58 ሳሉዋፔ ዎዴዳ ኡኪሳይ ሃዎ፤ ሂንቴንቱ ኣዎቱ ሚዴ ሃይቁዳ ማና ማላ ጊዳና፤ ሃ ኡኪሳ ሚያ ኡራይ ሜዲናው ዳዓና» ያጌዳ።  
 59 ዬሱሲ ቂፊሪናሆማ ካታማን ኣዪሁዳ ዋሳ ጎሌን ታማሪሲዳ፤ ሃዎ ኦዳዳ።

**ሜዲና ዳዑዋ ቃላ**

60 ዬሱሳ ካሊያዎንቱፔ ዳሪያ ባጋይ ሄዎ ሲሴዳ ዎዳ፤ «ሃዎ ጌሌና ቲሚርቲያ፤ ሃዎ ኦኒ ኣካናዌ?» ያጌዲኖ።

61 ሺን ዬሱሲ ባሪና ካሊያዎንቱ ሄዎ ዙዙሜዳዎ ኤሪዳ፤ «ሃዎ ሂንቴንታ ቆቢ? 62 ሲሚ ታኒ፤ ኣሳ ናዓይ፤ ካሴ ዳዒያሳ ፑዳ ኬሲሺን ቤዒንቶ ኣያ ጋኒቱ? 63 ጌሻ ኣያናይ ዳዑዋ ኢሚ፤ ኣሳ ሚኖታይ ኣይኔ ጎዔና። ታኒ ሂንቴንቱሲ ኦዳዳ ቃላይ ኣያናኔ ዳዑዋ። 64 ሺን ሂንቴንቱ ጊዲዋን ኣማኔናዎንቱ ዳዒና» ያጌዳ፤ ኣዪሲ ጎፔ፤ ኣማኔናዎንቱ ሃቃዎንቱንቶኔ ባሪና ኣሊ ኢማናዌ ኦኔንቶ ዬሱሲ ኮይርፔ ደሚዳ ኤሪዳ። 65 ቃሲካ ዬሱሲ፤ «ታ ኣቡፔ ጊዳና ቆዮፔ ኦኒኔ ታኮ ያናው ዳንዳዬና ያጋዳ ታ ኦዳዳዎ ሄዎ ዲራሳ» ያጌዳ።

66 ሄዎ ጋሱዋን፤ ዬሱሳ ካሊያዎንቱፔ ጮራቱ ኣ ኣጊዳ፤ ጉዬ ሲሜዲኖ፤ ላዔንዳ ኣ ካሊቤይኪና። 67 ዬሱሲ ቃሲ ታማኔ ላዑ ባሪና ካሊያዎንታ፤ «ሂንቴካ ኣጊዳ ባናው ኮዩቱ?» ያጌዳ።

68 ሲሞኒ ጳዒርሴ ዛሪዳ፤ «ጎዳው፤ ኦኒ ኦኮ ባኔ? ኔው ሜዲና ዳዑዋ ቃላይ ዳዔ። 69 ኔኒ ያሳ ጌሻ ጊዲያዎ ኦኒ ኣማኔቶኔ ኤሪቶ» ያጌዳ።

70 ዬሱሲ ኡንቱንታ፤ «ታኒ ሂንቴንታ ታማኔ ላዓቱዎ ደራቤይኪታ? ቃሲ ሂንቴፔ ኢቱ ፃላሂያ» ያጌዳ። 71 ዬሱሲ ሄዎ ሲሞና ናዓ ዪሁዳ ኣስቆርታ ተ ጌ፤ ኣዪሲ ጎፔ፤ ዪሁዳይ ዬሱሳ ካሊያ ታማኔ ላዓቱዎፔ ኢቱዎ፤ ኢ ዬሱሳ ኣሊ ኢማናዎ።

**7**

**ዬሱሲ ዳሲያ ባላሲ ዬሩሳላሜ ቤዳ**

1 ሄዎፔ ጉዬ፤ ዬሱሲ ጋሊላን ያ ሃ ዩዩዳ፤ ኣዪሁዳቱ ኣ ዎቆናው ኮዩያ ዲራው፤ ዪሁዳን ዩያና ኮዩቤና። 2 ኣዪሁዳቱ ቦንቲያ ዳሲያ ባላይ ጋኪ ኡቲዳ። 3 ሄዎ ዲራው፤ ዬሱሳ ኢሻቱ ኣ፤

---

† 6:71 ኣስቆርታ፡ ሃ ቃላ ቢሌላይ፡ «ዎራቲያ ቢታኒያ» ዎይ «ሃይቆ ኣሊ ኢሚያ ቢታኒያ» ጊያዎ። 7:2 ዎግ 23:34፤ ዛር 16:13

«ኔና ካሊያዋንቱ ኔኒ ኦሊያዋ ቤዓና ማላ፣ ሃዋፔ ዴንዳዴ ዪሁዳ ገዲያ ባ። 4 አዪሲ ሳፔ፣ ባሬው ኤሬታናው ኮዪያ አሳይ ኦኒኔ ባሬ ኦሱዋ ገንጭና። ኔኒ ሃዋንታ ኦሊና፣ ኔባ አላሚያ ኡባይ ኤር!» ያጌዲና። 5 አዪሲ ሳፔ፣ ሃራይ አቶ አ ኢሻቱካ አ አማኒቤይኪና።

6 ዬሱሲ ኡንቱንታ፣ «ታው ኢንጃቲያ ዎዲ ጋኪቤና፤ ሺን ሂንቱንቱሲ አይ ዎዴካ ኢንጃቲ። 7 ሳዓይ ሂንቱንታ ኢፃናው ዳንዳዬና፤ ሺን ታኒ ሳዓ ኪታይ ኢታ ጊዲያዎ ማርካቲያ ዲራው፣ ታና ኢፃዳ። 8 ባላ ቦንቺያሳ ሂንቱንቱ ቢቲ፤ ታው ኢንጃቲያ ዎዲ ጋኪቤና ዲራው፣ ታኒ ባላ ቦንቺያሳ ባናዌ ቢራ» ያጌዳ። 9 ኢ ሃዋ ጊዳ፣ ጋሊላን አቲዳ።

**ዬሱሲ ዳሲያ ባላሳን ቤቲዳ**

10 ሺን አ ኢሻቱ ባላ ጋላሳ ቦንቺያሳ ቤዳዋፔ ጉዪያን፣ ኢካ አሳይ ቤዔናን ጌማን ያ ቤዳ። 11 አዪሁዳቱ ባላ ጋላሳ ቦንቺያሳን አ ኮዪኖኔ፣ «ኢ ሃቃን ዳዒ?» ያጌዳ፣ አ ላቢና።

12 አሳ ጊዲያን ዳር ዙዙንሳይ ዴንዳዳ። አማሬዳ አሳይ፣ «ኢ ሎፆ አሳ» ያጌ፤ ሃራቱ ቃሲ፣ «አ፣ ኢ አሳ ባሌሌ» ያጌና። 13 ሺን አዪሁዳቱ ያዬዳ ዲራው፣ ኦኒኔ አባ ቆንጨያን ሃሳዬና።

14 ባላ ቦንቺያ ጋላሳ ባጋን፣ ዬሱሲ ጌሻ ጎሊያ ቢዳ፣ ታማሪሱዋ ደሚዳ። 15 አዪሁዳቱ ማላሌሌቲዳ፣ «ሃ ቢታኒ አይኔ ታማሪናን ሃዋ ከና ዋኒ ኤሬዳ?» ያጌዲና።

16 ሄዋ ዲራው፣ ዬሱሲ ዛሪዳ፣ «ታና ታማሪሲያዌ ታና ኪቲዳ ያሳ ማታፔ ዪያዋፔ አቲን፣ ታዋ ጊዳና። 17 ያሳ ሺኒያ ኦላናው ደሲያ ኦኒኔ ሃ ታኒ ታማሪሲያዌ ያሳ ማታፔ ዪንቶ ዎይ ቃሲ ታኒ ታፔ ሃሳያዪታንቶ ኤራና። 18 ባሬዋ ሃሳዪያ ኡራይ ባሬ ሁጺያሲ ቦንቺዋ ኮዬ፤ ሺን ባሬና ኪቲዳዌ ቦንቺታና ማላ ኮዪያ ኡራይ ቱማንቻ፤ አኒ ዎርደባይ ባዋ። 19 ሙሴ ሂንቱንቱሲ ሂጊያ አሚቤኔ? ሺን ሂንቱፔ ኢቱኔ ሂጊያ ናጌና። ታና አዪሲ ዎጳናው ኮዪቲ?» ያጌዳ።

20 አሳይ ዛሪዳ፣ «ኔናን ፃላሂ ዳዔ፤ ኔና ዎጳናው ኦኒ ኮዬዳዌ?» ያጌዳ።

21 ዬሱሲ፣ «ታኒ ኢቲ ዎልቃማባ ኦሊና፣ ሂንቱንቱ ኡባይ ማላሌቲዲታ። 22 ሂንቱንቱ ናና ሂንቱንቱ ደካላና ማላ፣ ሙሴ ሂንቱንታ አዛዜዳ። ሺን ደካሉሳይ ሂንቱንቱ አዋቱዋና ዬዳዋፔ አቲን፣ ሙሴና ዪቤና፤ ሄዋሲ ሂንቱንቱ ሳምባታን አቱማ ናና ደካሊታ። 23 ሙሴ ሂጊ አዛዜዳ ዲራው፣ ሂንቱንቱ ሳምባታን

ደካሊያዎ ገደፍ፣ ያተና ታኒ ኢቲ አሳው ኩሜንላ ቦላ ፓሌዳ ዲራው፣ ታና አዩሲ ሃንቁቲቲ? 24 ቱሙ ፐርዳ ፐርዲቲፍ ኣቲን፣ አሳ ዳሙዋ ዩሊዳ ፐርደፐቲ» ያጌዳ።

**ሃዌ ኪሪሰቶሴ?**

25 ሃዋ ዲራው፣ ዩሩሳላሜ አሳፕ ኢቲ ኢቲ፣ «ኡንቱንቱ ዋቋናው ኮዩያ ቢታኒ ሃዋ ገዳኔ? 26 ቤዒቲ፣ ቆንጨያን ኢ ሃሳዬ፤ ኡንቱንቱ አ አይኔ ገኪኖ። ሃዌ ኪሪሰቶሳ ገዲያዎ ኑ ካፓቱ ቱሙ ኤሪኖሻ? 27 ሺን ኮኒ አ ሃቃፕ ዩዳንቶ ኤርይቲ፤ ኪሪሰቶሴ ዩያ ዋዳ፣ ኢ ሃቃፕ ዩንቶኔ ኦኒኔ ኤሪና» ያጌዲኖ።

28 ሃዋፕ ጉዩያን፣ ዩሱሲ ጌሻ ጎሊያን ታማሪሲዳ፣ ባሬ ቃላ ቋቁ ኡዲዳ፣ «ሂንቱንቱ ታና ኤሪታ፤ ቃሲ ታኒ ሃቃፕ ዩዳንቶካ ኤሪታ። ታኒ ታ ሺኒያን ያቤይኬ፤ ሺን ታና ኪቲዳዌ ቱማንቻ፤ ሂንቱንቱ አ ኤሪኪታ። 29 ሺን ታኒ አ ኤሪይ፤ አዩሲ ጎፕ፣ ኢ ታና ኪቲና፣ ታኒ አ ማታፕ ያዲ» ያጌዳ።

30 ሃዋ ዲራው፣ ኡንቱንቱ አ ኦይቃናው ኮዩዲኖ፤ ሺን አ ዋዲ ቢር ጋኪቤና ዲራው፣ ኦኒኔ አ ቦላ ኩሺያ ዋሊቤና። 31 ሺን ዳር አሳይ ዩሱሳ አማኒዳ፣ «ኪሪሰቶሴ ዩያ ዋዳ፣ ሃ ቢታኒ ኦሌዳ ማሳታፕ ዳሪያዎ ኦላኔዬ?» ያጌዲኖ።

**ዩሱሳ ኦይቃናው ዋታዳራቱ ኪቲቲዲኖ**

32 ፓሪሳዋቱ ዳር አሳይ ዩሱሳባ ዙዙሚያዎ ሲሴዲኖ፤ ቁሳቱዎ ካፓቲኔ ፓሪሳዋቱ አ ኦይቁ ቃሺሳናው አማሬዳ ዋታዳራቱዎ ኪቲዲኖ።

33 ዩሱሴ፣ «ታኒ ሂንቲናና ላፋ ጋሚዳና፤ ሃዋፕ ጉዩያን፣ ታና ኪቲዳዋኮ ባና። 34 ሂንቱንቱ ታና ኮያና፤ ሺን ዳሚኪታ፤ አዩሲ ጎፕ፣ ታኒ ዳዒያ ሳዓ ሂንቱንቱ ባናው ዳንዳዩኪታ» ያጌዳ።

35 አዩሁዳቲ ኢቲ ኢቲዋና፣ «ሃዌ ኮኒ አ ዳሜናሳ ሃቃ ባና ሃኒ? አዩሁዳቲ ዳዒያ ገሪኬ ካታማ ቢዳ፣ ገሪኬ አሳቱዎ ታማሪሳና ሃኒ? 36 ኢ፣ «ሂንቲ ታና ኮያና፤ ሺን ዳሚኪታ» ቃሲ፣ «ታኒ ዳዒያሳ ሂንቱንቱ ባናው ዳንዳዩኪታ» ያጌ፤ ሃዋ ገያዌ ዋገያዌ?» ያጌዲኖ።

**ዴዑዋ አሚያ ሃላ**

37 ሄ ባላ ጋላሳ ቦንቺያ ጋላሳፕ ዋናቲያ ወርሴላ ጋላሳኒ ዩሱሴ ዳንዲ ኤቁዳ፣ ባሬ ቃላ ቋቁ ኡዲዳ፣ «ሳሜቲዳ ኡራይ ኦኒኔ ታኮ ዩዳ ኡሾ። 38 ታናን አማኒያዎ፣ ያሳ ማፃፋይ ገያዋዳን፣ አ ኡሉዋፕ ዴዑዋ አሚያ ሃላ ፑልቱ ጎጋናዎ» ያጌዳ። 39 ኢ

ሄዎ አ አማኔዳዋንቱ አካና ጌሻ አያናባ ሃሳዬዳ። ዬሱሲ ቢሮ ባሬ ቦንቹዋኮ ኬሲቤና \* ዲራው፣ ሄ ዎዴ ጌሻ አያናይ ኡንቱንቶ አሜቲቤና።

**አሳ ጊደን ማዴቲዳ ጳልቄሳ**

40 ሄ አሳፔ ዳሪያ ባጋይ ኢ ጊያዎ ሲሲዳ፣ «ቱሙ ሃዌ ናጌቲያ ናቢያ» ያጌዲኖ።

41 ሃራንቱ፣ «ሃዌ ኪሪሰቶሳ» ያጌዲኖ።

ሺን ሃራንቱ ቃሲ፣ «ኪሪሰቶሲ ጋሊላፔ ዬና። 42 ያሳ ማፃፋይ፣ «ኪሪሰቶሲ ዳዊቱ ዛሪያፔ፣ ዳዊቱ ዴዔዳ ቤቴሊሄሜ ካታማፔ ያና ጌኔዬ?» ያጌዲኖ። 43 ዬሱሳ ጋሱዋን አሳይ ባሬ ጊዲዋን ሻኬቱዳ። 44 ሄ አሳፔ ኢቱ ኢቱ አ ኦይቃናው ኮዬዲኖ፤ ሺን ኩሺያኒኔ አ ቦቹቤይኪኖ።

45 ጌሻ ጎሊያ ናጊያዋንቱ ቄሳቱዋ ካፓቱዋኮኔ ፓሪሳዋቱዋኮ ሲሚ ዬዳ ዎዴ ኡንቱንቱ ናጊያዋንታ፣ «አዪሲ አ አሂቤይኪቱ?» ያጊዴ ኦቹዲኖ።

46 ጌሻ ጎሊያ ናጊያዋንቱ ኡንቱንቱሲ፣ «ሃ ቢታኒ ሃሳዬዳዋዳን፣ ኡባካ ኦኒኔ ሃሳዪቤና!» ያጊዴ ዛሬዲኖ።

47 ፓሪሳዋቱ ዛሪዳ፣ «ኢ ሂንቱናካ ባሌሉዋ? 48 ካፓቱዋፔ ዎይ ፓሪሳዋቱዋፔ አ አማኔዳ አሳይ ዴዒ? 49 ሺን ሂጊያ ኤሬና ሃ አሳይ ሸቄቲዳዋ» ያጌዲኖ።

50 ኡንቱንቱፔ ኢቱ ካሴና ዬሱሳኮ ቤዳ ኒቆዲሞሲ ኡንቱንታ፣

51 «ኢቲ ኡራይ ጊያባ ሲሴናን ዎይ ኢ አያ ኦፊዴንቶ ኤሬናን ዴዒዳ፣ ካሴቲዳ አ ቦላ ፒርዲያዌ ኑ ሂጊያን ዴዒ?» ያጌዳ።

52 ኡንቱንቱ ዛሪዳ አ፣ «ኔኒካ ቃሲ ጋሊላ ጋዲያ አሴ? ጋሊላ ጋዲያፔ ናቢ ቤቴናዋ ያሳ ማፃፋቱዋ ቢዳዴ ኤራ» ያጌዲኖ።

**ዎሹማዴ አይቄቲዳ ሚሺራቶ**

53 አሳይ ኡባይ አጊዳ፣ ባሬ ሶይ ባሬ ሶይ ቤዳ።

**8**

1 ሺን ዬሱሲ ዎጋራ ሚሳን ኤሬቲዳ ዴሪያኮ ቤዳ። 2 ዎንቱሳ ጋሊሲ ጉራን ጌሻ ጎሊያ ሲሜዳ፤ ኡባ አሳይ አኮ ዪና፣ ኡቲዴ ኡንቱንታ ታማሪሱዋ ደሚዳ። 3 ሙሴ ሂጊያ ታማሪሲያዋንቱኔ

\* 7:39 ዬሱሲ ቢሮ ባሬ ቦንቹዋኮ ኬሲቤና፣ የሃኒሳ ሚሺራቶዎ ቃላን፣ ዬሱሳው ኩሚንሳ ቦንቹ አሜቲዳዳ፣ ኢ ማሰቃሊያ ቦላን ካቄቲዳ ዎዴኔ ባሬ አቡ ኡሸቻ ባጋን ኡታናው ሃይቁዋ ዶኒዴ ዴንዴዳ ዎዲያና ጊዲያዎ ቆንጫሴ። 7:42 2ሳዎ 7:12፤ ሚክ 5:2

ፓሪሳዎቹ ዋሹሚሺን ኮይቁቲዳ ኢቲ ሚሺራቶ አኮ አሄዲኖ። ኢንቴንቴ አሳ ኡባ ሲንሳን ኢዞ ኤሲዳ ዩሱሳ። 4 «ታማሪሲያዎ፣ ሃ ሚሺራታ ዋሹማዳ ኮይቁታዲ። 5 ሂጊያ ቦላን ሙሴ ሃኒ ማላ ማጫ አሳ ሹቻን ጫዳና ማላ፣ ኑና አዛዜዳ። ያቲና ኔኒ ዋጋይ?» ያጌዲኖ።

6 ኢንቴንቴ ሄዋ ጌዳዌ ዩሱሳ ሞቲያዎ ዳሚዳ አ ፓጫናሳ፤ ሺን ዩሱሲ ሆኪዳ። ባሬ ቢራዲያን ቢታ ቦላ ፃፌዳ። 7 ኢንቴንቴ አ ኦቺዳ አጌናን ኢፂና፣ ፑዳ ዶቁ ጊዳ፣ «ሂንቴንቴ ጊዲዋን ናጋራ ኦሊቤና አሳይ ካሴቲዳ፣ ኢዞ ሹቻን ጫዳ» ያጌዳ። 8 ቃሲካ ሆኪዳ፣ ቢታ ቦላ ፃፌዳ።

9 ኢንቴንቴ ሄዋ ሲሴዳ ዎዳ፣ ካሴቲዳ ጨማቲ ኬሲና፣ ኢቲ ኢቲ ኬሲዳ ወሬዲኖ፤ አ ሲንሳን ሚሺራታ ኤቃ ዳሲሺን፣ ዩሱሲ ባሬ ፃላላ አቲዳ። 10 ኢ ፑዳ ዶቁ ጊዳ ሚሺራቶ፣ «ሚሺራቲ፣ አሳቲ ሃቃን ዳሲኖ? ኦኒኔ ኔ ቦላ ፐርዲቤኔ?» ያጌዳ።

11 ሚሺራታ፣ «ጎዳው፣ ኦኒኔ ታ ቦላ ፐርዲቤና» ያጋዲ። ዩሱሲ ኢዞ፣ «ታኒካ ኔ ቦላ ፐርዲኬ፤ ባ፤ ላዔንሳዳ ናጋራ አላፓ» ያጌዳ። \*

12 ቃሲካ ዩሱሲ አሳው፣ «ታኒ አላሚው ፖዑዋ፤ ታና ካሊያ ኦኒኔ ዳዑዋ አሚያ ፖዑዋ ዳማናፔ አቲን፣ ቋሚኒ ኡባካ ሃሚቲና» ያጌዳ ሃሳዩዳ።

13 ሄዋፔ ጉዬ ፓሪሳዎቹ፣ «ኔኒ ኔባ ማርካታሳ፤ ኔ ማርካቲላይ ቱማ ጊዳና» ያጌዲኖ።

14 ዩሱሲ ዛሪዳ፣ «ታኒ ታባ ማርካቶፔካ፣ ታ ማርካቲላይ ቱማ፤ አዩሲ ጎፔ፣ ታኒ ሃቃፔ ያዲታንቶኔ ቃሲ ሃቃ ባይታንቶ ኤራይ፤ ሺን ሂንቴንቴ ኤሪኪታ። 15 አሳይ ፐርዲያ ኦጊያን ሂንቴንቴ ፐርዲታ፤ ታኒ ኢቲ ኡራ ቦላካ ፐርዲኬ። 16 ሺን ታኒ ፐርዲያዎ ጊዳፔኔ፣ ታ ፐርዲይ ቱማ፤ አዩሲ ጎፔ፣ ታና ኪቲዳ ታ አቡ ታና ዳዔፔ አቲን፣ ታኒ ታሬካ ዳሲኬ። 17 ላዑ አሳ ማርካቲላይ ቱማ ጊዲያዌ ሂንቴንቴ ሂጊያን ፃፌቲ ኡቲዳ።

18 ታኒ ታባ ታ ሁጳው ማርካታዲ፤ ቃሲ ታና ኪቲዳ ታ አቡካ ታባ ማርካቲ» ያጌዳ።

19 ኢንቴንቴ፣ «ኔ አቡ ሃቃን ዳሲ?» ያጌዳ ዩሱሳ አቺዲኖ። ዩሱሲ ዛሪዳ፣ «ሂንቴንቴ ታናካ ዎይ ታ አባካ ኤሪኪታ፤ ታና ኤሪዳዎ ጊዲንቶ፣ ታ አባካ ኤሪኪታ» ያጌዳ።

---

8:5 ዎግ 20:10፤ ዛር 22:22-24 \* 8:11 ኢቲ ኢቲ ቤኒ ፃፌቲዳ ገሻ ማፃፋቱዋን ሃ ፓይዲ ባዎ። 8:17 ዛር 19:15

20 ዩሱሲ ጌሻ ጎሊያ ታማሪሲዳ፡ አሞታ ሚሻይ ኡቲያ ሳጂኒያ ማታን ሄዋ ሃሳዬዳ። አ ኦኒኔ ኦይቂቤና፤ አዩሲ ጎፔ፡ አ ዎዲ ቢሮ ጋኪዲጊቤና።

**አማኔናን ኢዳዎንቱሲ አሜቲዳ ሚኖ አኬኪሱዋ**

21 ቃሲካ ዩሱሲ ኡንቱንታ፡ «ታኒ ባና ሂንቱንቱ ታና ኮያና፤ ሺን ሂንቱንቱ፡ ሂንቱንቱ ናጋራን ሃይቃኒታ። ታኒ ቢያ ሳዓካ ባናው ሂንቱንቱ ዳንዳዩኪታ» ያጌዳ።

22 አዩሁዳቱ፡ «ኢ፡ <ታኒ ቢያሳ ሂንቱንቱ ባናው ዳንዳይኪታ> ያጌ፤ ኢ ባሬና ባሬካ ዎቆኔዬ?» ያጌዲኖ።

23 ዩሱሲ ዛሬዳ፡ «ሂንቱንቱ ጋርሳ አሳ፤ ታኒ ቦላ አሳ። ሂንቱንቱ ሃ አላሚያ አሳ፤ ታኒ ሃ አላሚያ አሳ ጊዲኬ።

24 ሂንቱንቱ፡ ሂንቱንቱ ናጋራን ሃዩቃናዋ ታኒ ሂንቱንቱሲ ኦዳዳዌ ሃዋሳ፤ ታኒ ታና ተ ጊዲያዋ ሂንቱንቱ አማናና ቆዮ፣ ሂንቱንቱ፡ ሂንቱንቱ ናጋራን ሃያኒታ» ያጌዳ።

25 ኡንቱንቱ፡ «ኔኒ ኦኔ?» ያጌዳ ኦቼዲኖ።

ዩሱሲ ዛሬዳ፡ «ታኒ ታና። 26 ታኒ ሂንቱባ ሃሳዩያባይኔ ፒሮዲያባይ ዳሮባይ ዴዔ። ሺን ታና ከቲዳዌ ቱማንቻ፤ ቃሲ ታኒ አፔ ሲሴዳዋ አላሚያ አሳው ኦዳይ» ያጌዳ።

27 ኢ ባሬ አወዋባ ሃሳዩያዋ ኡንቱንቱ አኬኪቤይኪኖ። 28 ሄዋ ዲራው፡ ዩሱሲ ኡንቱንታ፡ «ታና አሳ ናሳ ሂንቱንቱ ማሰቃሊያ ቦላ ፑዴ ዴንሊያ ዎዴ፡ ታኒ ታና ጊዲያዋኔ ቃሲ ታኒ ታ አቡ ታና ታማሪሴዳዋዳን ሃሳዩያዋፔ አቲን፡ ታ ሺኒያን አይኔ ኦሌናዋ ሂንቱንቱ ኤራኒታ። 29 ቃሲ ታና ከቲዳዌ ታናና ዴዔ፤ ታኒ ኡባ ዎዴ አ ናሽቺያዋ ኦሊያ ዲራው፡ ኢ ታ ፃላላ አጊቤና» ያጌዳ።

30 ዩሱሲ ሄዋ ሃሳዩሺን ሲሴዳ ዳሮ አሳይ አ አማኔዲኖ።

**ናጋራ አይሌቲላፔ ላዓ ኬሳ**

31 ዩሱሲ ባሬና አማኔዳ አዩሁዳቱዋ፡ «ሂንቱንቱ ታኒ ታማሪሲያዋ አዛዜቶፔ፡ ቱሙ ታና ካሊያዋንታ። 32 ሂንቱንቱ ቱማቲላካ ኤራኒታ፤ ቃሲ ቱማቲላይ ሂንቱንታ አይሌቲላፔ ኬሳናዋ» ያጌዳ።

33 ኡንቱንቱ ዛሬዳ፡ «ኑኒ አብራሃሞ ዛሬ፤ ኑኒ አሲኔካ አይሌቲቤይኮ። ያቲና ኔኒ ዋጋዴ፡ ለይሌቲላፔ ሂንቱንቱ ኬሳኒታ ጋይ?» ያጌዲኖ።

---

† 8:24 ታኒ ታና፡ አዩሁዳ አሳሲ ዎልቃማኔ ጌሻ ጊዴዳ ያሳ ሱንላይ «ያሀዌሀ» ጊዲዳ፡ ሃዋ ቢላላይካ ታኒ ታና ጊያዋ።

34 ዬሱሲ: «ታሲ ሂንቴንቴሲ ቱሙዋ ኦዳይ፤ ናጋራ ኦሊያ ኦኒኔ ናጋራ ኣይሊያ። 35 ኣይሊ ኡባ ዋዴ ሶዪን ዴዔና፤ ሺን ናዓይ ማዳናው ጎሌን ዴዔ። 36 ናዓይ ሂንቴንጋ ኣይሌቴላፔ ኬሶፔ፡ ሂንቴንጌ ኣይሌቴላፔ ቱሙ ኬሳኒታ። 37 ሂንቴንጌ ኣብራሃዋ ዛሬ ገዲያዋ ታኒ ኤሪይ፤ ሺን ታ ታማሪሲያዋ ሂንቴንጌ ኣኬና ዲራው፡ ታና ዋዳናው ኮዪታ። 38 ታኒ ታ ኣቡ ታና ቤሴዳዋ ሃሳያይ፤ ቃሲ ሂንቴንጌካ ሂንቴንጌ ኣዉዋፔ ሲሴዳዋ ኦሊታ» ያጌዲ።

39 ኡንቴንጌ ዛሬዳ፡ «ኑ ኣቡ ኣብራሃማ» ያጌዲኖ።

ዬሱሲ ኡንቴንጌታ፡ «ሂንቴንጌ ኣብራሃዋ ናና ገዴዴንቶ፡ ኢ ኦሊዳ ኦሱዋ ማላ ኦላኒታ። 40 ሺን ያሳፔ ሲሴዳ ቱሙዋ ኦዳዳ ታና ሂንቴንጌ ዋዳናው ኮዪታ፤ ኣብራሃማ ሄዋዳን ኦሊቤና። 41 ሂንቴንጌ፡ ሂንቴንጌ ኣዉ ኦሊዳዋ ኦሊታ» ያጌዲ።

ኡንቴንጌ ዛሬዳ፡ «ኑኒ ዋሹማን ዲቃላቴላ ዬሌቴቤይኮ፤ ኦሲ ኢቴ ኣዉ፡ ያሳ ያላላይ ዴዔ» ያጌዲኖ።

42 ዬሱሲ ኡንቴንጌታ፡ «ሂንቴንጌ ያሳ ናና ቱሙ ገዴዴንቶ፡ ታና ሲቃና፤ ኣዪሲ ጎፔ፡ ታኒ ያሳ ማታፔ ያዴ ሃዋን ዴዓይ። ታና ኢ ከቴዳዋፔ ኦቴን፡ ታኒ ታ ሼኒያን ያቤይኬ። 43 ታኒ ታማሪሲያዋ ሂንቴንጌ ኣኬከናዋ ኣያሶ? ታኒ ታማሪሲያዋ ሂንቴንጌ ኣኬና ዲራሳ። 44 ሂንቴንጌ፡ ሂንቴንጌ ኣዉዋ ኢታ ኣያና ናና፤ ቃሲ ሂንቴንጌ፡ ሂንቴንጌ ኣዉ ኣሞቴያዋ ኦላናው ኮዪታ። ኢ ካሴፔ ደሚዳ፡ ሸምፑዋ ዋዴዳዋ፤ ቱማቴላይ ኣኒ ባይና ዲራው፡ ቱማቴላኮ ሸቂ ኤሬና። ኢ ዋርዲዋ ሃሳዪያ ዋዴ፡ ባሬፔ ሃሳዬ፤ ኣዪሲ ጎፔ፤ ኢ ዋርዳንቻኔ ቃሲ ዋርደካ ኣዉዋ። 45 ሺን ታኒ ቱሙዋ ሃሳዪያ ዲራው፡ ሂንቴንጌ ታና ኣማኒኪታ። 46 ሂንቴፔ ታና ናጋራ ኦሊሺን ቤዓዲ ጋናው ዳንዳዪያዋ ኦኒ? ታኒ ቱሙዋ ሃሳዪያዋ ገደፔ፡ ታና ኣዪሲ ኣማኒኪቴ? 47 ያሳ ኣሳ ገዴዳ ኡሪይ ያሳይ ገያዋ ሲሴ፤ ሂንቴንጌ ያሳ ኣሳ ገዴና ዲራው፡ ያሳይ ገያዋ ሲሲኪታ» ያጌዲ።

**ዬሱሲ ኣብራሃዋፔ ካሴናካ ዴዔ**

48 ኣዪሁዳቱ ዛሬዳ፡ «ኑኒ ኔና፡ «ኔኒ ሳማሪያ ኣሳ፤ ኔናን ኢታ ኣያናይ ዴዔ» ገዴ ባዪዜዶ?» ያጌዲኖ።

49 ዬሱሲ ኡንቴንጌታ፡ «ታ ቦላ ኢታ ኣያናይ ባዋ። ታኒ ታ ኣባ ቦንቻይ፤ ሺን ሂንቴንጌ ታና ካዉሺታ። 50 ታኒ ታ ሁጲያሲ ቦንቻዋ ኮዪኬ፤ ሄዋ ታው ኮዪያዎኔ ፐርዲያዎ ዴዔ። 51 ታኒ ሂንቴንጌሲ ቱሙዋ ኦዳይ፤ ታኒ ታማሪሲያዋ ናገያ ኦኒኔ ኡባካ ሃይቁና» ያጌዲ።



52 አዩሁዳቱ ዛሪዳ፡ «ኔ ቦላ ኢታ አያናይ ዳዒያዎ ኑኒ ሃዒ ኤራድ። አብራሃሜ ሃይቄዳ፤ ናባቱ ሃይቄዳኖ፤ ሺን ኔኒ፡ ታ ቃላ ናጊያ ኦኒኔ ኡባካ ሃይቄና) ያጋ። 53 ኔኒ ሃይቄዳ ኑ አዉዎ አብራሃሞፔ ዳራይ? ናባቱ ቃሲ ሃይቄዳኖ። ኔኒ ኔና ኦና ጋዴ ቆፓይ?» ያጌዲኖ።

54 ዩሱሲ፡ «ታኒ ታና ቦንቸፕ፡ ታ ቦንቸ ማላ፤ ሂንቴንቱ ኑ ያሳ ጊያ ታ አቡ ታና ቦንቸ። 55 ሂንቴንቱ አ ኤራና ጳዮፔካ፡ ታኒ አ ኤራይ። ታኒ አ ኤሪኬ ጎፔ፡ ሂንቴንቱዋዳን ዎርዶ ጊዳይ፤ ሺን ታኒ አ ኤራይ፤ ቃሲ አ ቃላካ ናጋይ። 56 ሂንቴንቱ አዉ አብራሃሜ፡ ታ ዩሳ ዎዲያ ቤዓናው ላሞቴዳ፤ ቤዒዳካ ናሹቴዳ» ያጌዳ።

57 አዩሁዳቱ ዛሪዳ አ፡ «ኔው ሃራይ አቶ አሻታሙ ላይላ ኩሚቤናዌ አብራሃማ ቤዓዲ?» ያጌዲኖ።

58 ዩሱሲ ኡንቱንታ፡ «ታኒ ሂንቴንቱሲ ቱሙዎ ኦዳይ፤ አብራሃሞ ዩሌታናፔካ ካሴ ታኒ ታና» ያጌዳ።

59 ሄዎ ዲራው፡ ኡንቱንቱ ዩሱሳ ጫዳናው ሹቻ አኩዲኖ፤ ሺን ዩሱሲ ኡንቱንቱፔ ጌሜቲዳ፡ ጌሻ ጎሊያፔ ቤዳ።

# 9

## ዩሱሲ ቆቃ ጊዲዳ ዩሌቲዳ ቢታኒያ ፓሌዳ

1 ዩሱሲ ቢዳ፡ ዩሌቶዳፔ ቆቃ ጊዲዳ ዳዒያ ኢቲ ቢታኒያ ቤዔዳ። 2 ዩሱሳ ካሊያዎንቱ ዩሱሳ፡ «ታማሪሲያዎ፡ ሃ ቢታኒ ቆቃ ጊዲዳ ዩሌታናዳን፡ ናጋራ ኦሌዳዌ ኦኒ? ኢ ኦሌዳዬ? ዎይ አ ዩሌዳዎንቱ ኦሌዲኖ?» ያጌዳ ኦቸዲኖ።

3 ዩሱሲ፡ «ያሳ ከታይ አ ቦላን ቆንጫና ማላ ቆቄዳፔ አቲን፡ ኢ ዎይ አ ዳያኔ አ አቡ ናጋራ ኦሌቤይኪኖ። 4 ኦኒ ሳዓይ ቃሜናን ዳዒሺን፡ ታና ከቲዳዎ ኦሱዎ አላናው ቤሴ። ኦኒኔ ኦላናው ዳንዳዬና ቃማይ ዩ። 5 ታኒ አላሚያን ዳዓዳ አላሚው ፖ?» ያጌዳ።

6 ዩሱሲ ሄዎ ጊዳ፡ ሳዓን ጨቹዳ፤ ባሬ ጨቻኒ ጉላ ኡርቃ ሹጊሲዳ፡ ሄ ኡርቃኒ ቆቃ ቢታኒያ አይፊያ ኦኪዳ፡ 7 «ባዳ ሳሊሆማ ጊያ ዳጋቲዳ ሃላን ኔ አይፊያ ማጫ» ያጌዳ። «ሳሊሆማ» ጊያዌ «ከቲቲዳዎ» ጉሳ፡ ሄዎ ዲራው፡ ቢታኒ ቢዳ፡ ባሬ አይፊያ ማጫቴዳ፡ ዪሊዳ ሲሜዳ።

8 ቢታኒያ ሹራቱኔ ቢታኒ ካሴ ዎሲሺን ቤዔዳ አሳይ፡ «ሃዌ ኡቲዳ ዎሲያ ቢታኒያ ጊዳኔዬ?» ያጌዲኖ።

9 ቃሲ አማራዳዎንቱ፡ «ሃዌ አቴኔ» ያጌዲኖ።

ሃራንቱ ቃሲ፡ «ቱይቲ፡ ሃዌ አ ማላቲያዋፍ አቲን፡ አ ጊዴና» ያጌዲኖ።

ሺን ቢታኒ፡ «ታኒ አቱ» ያጌዲኖ።

10 ኡንቱንቱ ቢታኒያ፡ «ያቲና፡ ኔ አይፊ ዋኒ ያሌዴ?» ያጌዴ ኦቼዲኖ።

11 ኢ ዛሪዴ፡ «ዩሱሳ ጌቱቲያ ቢታኒ ጉላ ኡርቃ ሹጊሲዴ፡ ታ አይፊያ ኦኪዴ፡ ሳሊሆማ ጌቱቲያ ዳጋቱዳ ሃላኒ ባዴ ኔ አይፊያ ሜጩታ» ያጌዲኖ። ታኒ ባዴ ሜጩታዴ ያላዲ» ያጌዲኖ።

12 ኡንቱንቱ አ፡ «ኢ ሃቃን ዴዒ?» ያጌዴ ኦቼዲኖ።

ቢታኒ፡ «ታኒ ኤሪኬ» ያጌዲኖ።

13 ኡንቱንቱ ካሴ ቆቂዴ ያሌዳ ቢታኒያ ፓሪሳዋቱዋኮ አፊዲኖ። 14 ዩሱሲ ኡርቃ ሹጊሲዴ፡ ቢታኒያ አይፊያ ፓሌዳ ጋላሳይ ሳሞባታ ጋላሳ። 15 ሄዋ ዲራው፡ ቢታኒ ዋኒ ያሌዴንቶኔ ፓሪሳዋቱ አ ጉጂዴ ኦቼዲኖ። ቢታኒ ኡንቱንቱሲ፡ «ኢ ታ አይፊያን ጉላ ኡርቃ ዋሌዳ። ታ አይፊያ ሜጩታዴ ሃዒ ያላዲ» ያጌዲኖ።

16 ፓሪሳዋቱዋፍ ኢቱ ኢቱ፡ «ሃዋ ኦሌዳ ቢታኒ ሳሞባታ ሂጊያ ናጌና ዲራው፡ ያሳ ማታፍ ዩቤና» ያጌዲኖ።

ሺን ሃራንቱ፡ «ናጋራንቻ አሳይ ሃዋ ማላ ዋልቃማ ማላታ ዋኒ አላናው ዳንዳዩ?» ያጌዴ ኡንቱንቱ ባሬንቱ ጊዲዋን ሻኬቱዲኖ።

17 ሄዋ ዲራው፡ ፓሪሳዋቱ ቢታኒያ ኢቲ ካላ ጉጂዴ፡ «ኢ ኔ አይፊያ ዶዬዳ ዲራው፡ አባ ዋጋይ?» ያጌዲኖ።

ቢታኒ፡ «ኢ ናቢያ» ያጌዲኖ።

18 አዩሁዳቱ ሄ ያሌዳ ቢታኒያ አቶኔ አዉዋ ያሲዴ ኦቻና ጋካናው፡ ቢታኒ ቆቃ ጊዴዳዋኔ ሃዒ ኢ ያሊያዋ አማኒቤይኪኖ።

19 አዩሁዳቱ አ አቶኔ አዉዋ፡ «ሂንቱንቱ፡ ለቆቃ ጊዲዴ ዩሌቱዳ» ጊያ ሂንቱንቱ ናባይ ሃዌ? ያቲና፡ ሃዒ ዋኒዴ ያሌዴ?» ያጌዴ ኦቼዲኖ።

20 ቢታኒያ ዳያኔ አዉ፡ «ሃዌ ኑ ናባ ጊዴዳዋኔ ቆቃ ጊዲዴ ዩሌቱዳዋ ኮኒ ኤሬቶ። 21 ሺን ሃዒ ኢ ዋኒ ያሌዴንቶ፡ ኮኒ ኤርኮ። አ ኦቼቲ፤ ኢ ዶንዛ አሳ፤ ባሬባ ሃሳያናው ዳንዳዩ!» ያጌዲኖ። 22 ቢታኒያ ዳያኔ አዉ አዩሁዳቶ ያዬዳ ዲራው፡ ሄዋ ጌዲኖ፤ አዩሲ ጎፔ፡ አዩሁዳቱ ዩሱሲ ኪሪሰቶሳ ያጌዴ ማርካቲያ ኡሪሪ ዴዎፔ፡ ሄ ኡራ አዩሁዳ ዋሳ ጎሊያፔ ኬሳናው ካሴት ቆፋ ቃቺ ዋሌዲኖ።

23 አ ዳያኔ አዉ፡ «ኢ ዶንዛ አሳ፤ አ ኦቼቲ!» ጌዳዌ ሃዋሳ።

24 ሄዋ ዲራው፡ ቆቃ ገዲዳ ዩሌቴዳ ቢታኒያ ኢንቴንቴ ለዒንሱዋ ፀሲዳ፡ «ዖሳ ጋላታ፤ ሃ ቢታኒ ናጋራንቻ ገዲያዋ ኮኒ ኤሬቶ» ያጌዲኖ።

25 ቢታኒ፡ «ኢ ናጋራንቻ ገዲያዋን፡ ገደናዋ ኤሪኬ፤ ታኒ ቆቃ ገዲያዋን ሃዒ ፀሊያዋ ሄ ኢቲባ ኤራይ» ያጌዲኖ።

26 ኢንቴንቴ ዛሪዳ ቢታኒያ፡ «ኢ ኔው አያ ኦሌዳ? ኢ ኔ አይፊያ ዋቲ ፓሌዳ?» ያጌዲኖ።

27 ኢ ኢንቴንቴ፡ «ታኒ ሂንቴንቴሲ ኦዳዲ፤ ሲሲቤይኪታ። አዪሲ ለዒንሱዋ ሲሳናው ኮዪቴ? ሂንቴካ ዩሱሳ ካሊያዋንታ ገዲናው ኮዪቴ?» ያጌዲኖ።

28 ኢንቴንቴ አ ቦሪዳ፡ «ኔኒ ሄ ቢታኒያ ካሊያዋ፤ ኮኒ ሙሳ ካሊያዋንታ። 29 ዖሳይ ሙሴሲ ሃሳዬዳዋ ኮኒ ኤሬቶ፤ ሺን ሃ ቢታኒያ ገደፔ፡ ኢ ሃቃፔ ዩዴንቶኔ ኮኒ ኤርኮ» ያጌዲኖ።

30 ቢታኒ፡ «ኢ ሃቃፔ ዩዴንቶኔ ሂንቴንቴ ኤሪናዌ ማላሊሲያዋ፤ ሺን ኢ ታ አይፊያ ፓሌዳ! 31 ዖሳው ያዪያ ኡራይኔ ዖሳይ ኮዪያዋ ኦሊያ ኡራይ ዴዖፔ፡ ሄ ኡራባ ዖሳይ ሲሲያዋፔ አቲን፡ ናጋራንቻቱዋባ ሲሴና። 32 ቆቃ ገዲዳ ዩሌቴዳ አሳ አይፊያ ኮኒኔ ፓሊና፡ ሳባይ ሜዴቶዴፔ ዶሚና፡ ሲሴቲ ኤሪና። 33 ሃ ቢታኒ ዖሳፔ ዩቤናዋ ገዲንቶ፡ ኢቲባኔ ኦሳናዉካ ዳንዳዬና» ያጌዲኖ።

34 ኢንቴንቴ ዛሪዳ አው፡ «ኔኒ ናጋራን ዩሌታዴ ዲጩዳዌ ኮና ታማሪሳናው ኮያይ?» ያጌዲኖ፤ አዪሁዳ ዋሳ ጎሊያፔ ካሬ አ ኬሴዲኖ።

**ዋዘና ቆቃቴላ**

35 ኢንቴንቴ ቢታኒያ ካሬ ኬሴዳዋ ዩሱሲ ሲሴዳ፤ ዩሱሲ ቢታኒያ ዴሚዳ፡ «አሳ ናባ አማናይ?» ያጌዲኖ።

36 ቢታኒ ዩሱሳ፡ «ጎዳው፡ ታኒ አ አማናናዳን ኢ ኦኔ? ታው ኦዳሪኪ!» ያጌዲኖ።

37 ዩሱሲ ቢታኒያ፡ «ኔኒ አ ቤባዳ፤ ሃ ኔናና ሃሳዪያዌካ አ» ያጌዲኖ።

38 ቢታኒ ዛሪዳ፡ «ጎዳው፡ አማናይ» ያጌዲኖ ዩሱሳው ጎዪኔዳ።

39 ዩሱሲ፡ «ቆቃቴ ፀላና ማላኔ ፀሊያዋንቴ ቆቃና ማላ፡ ታኒ ፒርዳናው ሃ ሳባ ያዲ» ያጌዲኖ።

40 አናና ዴዒያ ፓሪሳዋቱ ሄዋ ሲሲዳ፡ «ኮኒካ ቆቄዬ?» ያጌዲኖ ኦቹዲኖ።

41 ዩሱሲ፡ «ሂንቴንቴ ቆቃ ገዴዴንቶ፡ ሂንቴንቴሲ ናጋራ ገዴና፤ ሺን ሃዒ ሂንቴንቴ፡ (ኮኒ ፀሌቶ) ያጌታ፤ ሂንቴንቴ ናጋራና ዴዒታ» ያጌዲኖ።

# 10

## ዩሱሲ ሎዖ ሄንጻንቻ

1 ዩሱሲ፡ «ታኒ ሂንቱንቱሲ ቱሙዋ ኦዳይ፤ ደርሳ ሲኩዋ ፔንጊያና ጌሌናን ሃራሳና ጌሊያ ኦኒኔ ካይሱዋኔ ፓኑዋ። 2 ሺን ፔንጊያና ጌሊያዌ ደርሳ ሄሚያ አሳ። 3 ፔንጊያ ናጊያዌ አው ፔንጊያ ዶዬ፤ ደርሳቱካ ኦ ኮሻ ሲሳና፤ ኢ ባሬ ደርሳቱዋ ኡንቱንቱ ሱንጻን ሱንጻን ፃሲዳ፡ ካሬ ካሌላና። 4 ኢ ባሬዋንታ ካሬ ከሴዳዋፔ ጉዩያን፡ ኡንቱንቱፔ ሲንጻና ሃሚቱ፤ ኡንቱንቱካ ኦ ኮሻ ኤሪያ ዲራው፡ ኦ ካሊኖ። 5 ሃራ ኡራ ኮሻ ኡንቱንቱ ኤሬና ዲራው፡ ኦፔ ባቃታናፔ ኦቲን፡ ኦ ጌዱዋ ካሊኪኖ» ያጌዳ።

6 ዩሱሲ ኡንቱንቱሲ ሃ ለሚሱዋ ኦዳይ፤ ሺን ኢ ኡንቱንቱሲ አይ ኦዲንቱኔካ ኡንቱንቱ ኦከከቤይኪኖ።

7 ዩሱሲ ቃሲካ ኡንቱንቱሲ፡ «ታኒ ሂንቱንቱሲ ቱሙዋ ኦዳይ፤ ታኒ ደርሳቶ ጌሊያ ፔንጊያ። 8 ታፔ ካሴ ዩዳ ኡባይ ካዩሱዋኔ ፓኑዋ፤ ሺን ደርሳቱ ኡንቱንቱ ጊያዋ ሲሲቤኪኪኖ። 9 ፔንጊ ታና፤ ታናን ጌሊያ ኦኒኔ ኦታናዋ። ኢ ጌላናኔ ከሳና፤ ቃሲ ሎዖ ማታይ ዴዲያ ሳባካ ዴማናዋ። 10 ካዩሱ ዉዳናው፡ ዋቆናውኔ ቆዩሳናው ዩያዋፔ ኦቲን፡ ሃራባው ዩና፤ ታኒ ኡንቱንቱሲ ዴቡ ዴዳና ማላኔ ኩሚዳ ፓላሃና ማላ ያዲ።

11 «ታኒ ደርሳ ሎይላ ሄሚያዋ፤ ደርሳ ሎይላ ሄሚያዌ ሄ ደርሳቱዋ ዲራው ሃይቄ። 12 ሚሻ ኦኪዳ ሄሚያ ኡራይ ዋሊያ ዩያዎዴ ቤዲዳ፡ ደርሳቱዋ ዩጊ ባሺዳ ባቃቱ። ኦዩሲ ጎፔ፡ ደርሳቱ ኦዋንታ ጊዲኪኖ፤ ቃሲ ኢካ ደርሳቱዋ ሄሚያዋ ጊዴና። ሄዎ ዲራው፡ ደርሳቱዋ ኦይቄኔ ላሌ። 13 ሻሉዋ ኦኪዳ ሄሚያዌ ባሬ ሻሎ ሄሚያ ዲራውኔ ደርሳባይ ኦ ቆፌሌና ዲራው፡ ደርሳቱዋ ኦጊዳ ባቃቱ።

14-15 «ታኒ ደርሳ ሎይላ ሄሚያዋ፤ ታ ኦኩ ታና ኤሪያዋዳን፡ ታኒካ ቃሲ ታ ኦባ ኤራይ። ሄዋዳንካ፡ ታኒ ታ ደርሳቱዋ ኤራይ፤ ታ ደርሳቱካ ታና ኤሪና። ቃሲ ታኒ ታ ደርሳቱዋ ዲራው፡ ሃይቃናው ኮያዲ። 16 ሃ ሲኩዋን ባይና ሃራ ደርሳቱካ ታው ዴዲኖ። ታኒ ኡንቱንታካ ኦሃናው ቤሴ። ቃሲ ኡንቱንቱ ታ ኮሻ ሲሳና፤ ኢቲ ዉዲ ዴዳና፤ ሄሚያዌካ ኢቱዋ ጊዳናዋ።

17 «ታኒ ታ ሺምፑዋ ዛራዴ ኦካና ማላ፡ ኦላዴ ኢማናው ኮዩያ ዲራው፡ ታ ኦኩ ታና ሲቄ። 18 ታኒ ደሳይ ታ ሺምፑዋ ኦላ ኢሚያዋፔ ኦቲን፡ ታፔ ኦኒኔ ኦኪና። ታው ታ ሺምፑዋ ኦላ ኢሚያ ማታይ ዴዴ፤ ቃሲ ዛራዴ ኦካናዉካ ማታይ ዴዴ። ታኒ ሃ ኦዛዙዋ ታ ኦዉዋፔ ኦካዲ» ያጌዳ።

19 ህ ሃሳያ ዲራው፡ አዪሁዳቱዋ ጊዲዋን ቃሲካ ሻኩ ማዴቲዳ። 20 ኡንቱንቱፔ ዳሪያ ባጋይ፡ «ኣኒ ፃላሂ ዴዔ! ኢ ጎዬ! ኣ ሃሳያ ኣዪሲ ሲሲቲ?» ያጌዲኖ።

21 ሃራቱ ቃሲ፡ «ፃላሂ ኦይቄዳ ኣሳይ ሃዋዳን ሃሳዬና፤ ፃላሂ ቆቃ ኣሳ ኣይፊያ ያሊሳናው ዳንዳዪዬ?» ያጌዲኖ።

**ዬሱሲ ኢጻቴዳ**

22 ዬሩሳላሜን ጌሻ ጎሊያ ኣንጂሴዳ ጋላሳ ሃሳዪሲያ ባላይ ጋኡዳ፤ ሳዓይ ህ ዎዴ ባልጉዋ። 23 ዬሱሲ ጌሻ ጎሊያን ሶሎሞና ባራንዳን፡ ያኔ ሃኔ ሃማቲ። 24 ኣዪሁዳቱ ዬሱሳ ማታን ዩዩ ኣጲዳ፡ «ኔኒ ኑና ኣዉዴ ጋካናው ሲጲሳዴ ዎላኒ? ኔኒ ኪሪሰቶሳ ጊደፔ፡ ኑሲ ጌሻዴ ኦዳ» ያጌዲኖ።

25 ዬሱሲ ኡንቱንቱሲ ዛሪዴ፡ «ታኒ ሂንቲንቱሲ ኦዳዲ፤ ሺን ታና ኣማኒኪታ፤ ታኒ ታ ኣቡ ሱንላን ኦሊያ ኪታይ ታባ ማርካቲ።

26 ሺን ሂንቲንቱ ታ ዶርሳ ጊዴና ዲራው ኣማኒኪታ። 27 ታ ዶርሳቱ ታ ኮሻ ሲሲኖ፤ ታኒ ኡንቱንታ ኤራይ፤ ኡንቱንቱካ ታና ካሊኖ። 28 ታኒ ኡንቱንቱሲ ማዲና ደቡዋ ኢማይ፤ ቃሲ ኡንቱንቱ ኡባካ ሃይቁኪኖ። ኣኒኔ ታ ኩሺያፔ ኡንቱንታ ዎሊ ኣካናው ዳንዳዪዬ። 29 ኡንቱንታ ታው ኢማዳ ታ ኣቡ ኦፔኔ \* ኣጲ፤ ኣኒኔ ታ ኣቡ ኩሺያፔ ኡንቱንታ ዎሊ ኣካናው ዳንዳዪዬ። 30 ታኔ ታ ኣቡ ኢቱዋ» ያጌዳ።

31 ኣዪሁዳቱ ዬሱሳ ጫዳናው ቃሲካ ሹቻ ዴንጤዲኖ። 32 ዬሱሲ ኡንቱንታ፡ «ታኒ ኦላናው ታ ኣቡ ታው ኢማዳ ዳር ሎዎ ኦሱዋ ሂንቲንታ ቤሳዲ፤ ሄዋንቱፔ ሃቃዋንቱ ዲራው፡ ታና ሹቻን ጫዳናው ኮዩቲ?» ያጌዳ።

33 ኣዪሁዳቱ ዛሪዴ፡ «ኔኒ ኔና ሎዎ ኦሱዋ ዲራው፡ ሹቻን ጫዳናው ኮዮኮ፤ ሺን ኔኒ ያሳ ቦላ ቦሪያ ቃላ ሃሳዪያ ዲራውኔ ቃሲ ኣሳ ጊዳዴ ኔ ሁጲያ ያሳ ኦሌዳ ዲራው፡ ጫዳናው ኮዩቶ!» ያጌዲኖ።

34 ዬሱሲ ዛሪዴ፡ «ሂንቲንቱ ሂጊያን ያሳይ፡ ሂንቲ ያሳቱዋ) ጌዳዋ ፃፊቲቤኔ? 35 ያሳ ማፃፋቱዋ ላማናው ዳንዳዪዬና፤ ያሳይ ባሬ ቃላይ ዬዳ ኣሳቱ፡ ሳሳቱዋ) ጊዴ ያሴዳዋ ጊደፔ፡

36 ታኒ፡ ሓኒ ያሳ ናና) ጌዳ ዲራው፡ ታ ኣቡ ኣንጂዴ፡ ሳዓ ኪቲዳ ታና፡ ያሳ ቦላ ቦሪያ ቃላ ሃሳያ) ያጌቲ? 37 ታኒ ታ ኣቡ ኦሊያዋ ኦላና ጳዮፔ፡ ታና ኣማኖፔ፡ ጊዴ ሹን ታኒ ኦሊያዋ ጊደፔ፡ ሃራይ ኣቶ ሂንቲንቱ ታና ኣማናና ጳዮፔካ፡ ታ ኣቡ ታናን

\* 10:29 ኦፔኔ፡ ኣባፔ ጉሳ። 10:33 ዎግ 24:16 10:34 ማዝ 82:6

ዳዲያዎን ታኒካ ታ ኣቡን ዳዲያዎ ኤራናዲኔ ኣከካናዳን፡ ታ ኣሱዋ ኣማኒቱ» ያጌዳ።

39 ቃሲካ ኡንቱንቱ ኣ ኦይቃናው ኮዬዲኖ፤ ሺን ኢ ኡንቱንቱ፤ ኬሲ ኣኪዴ ቤዳ።

40 ዮሀንሲ ካሴ ፃማቂያሳ ዮርዳኖሳ ሻፋፔ ሄፊንሳ ዬሱሲ ፒኒዴ፡ ያኒ ዴዔዳ። 41 ዳሮ ኣሳይ ዬሱሳኮ ዪዴ፡ «ዮሀንሲ ዎልቃማ ማላታ ኦሊቤና፤ ሺን ኢ ሃ ቢታኒያሳ ሃሳዬዳባይ ኡባይ ቱማ» ያጌዲኖ። 42 ያኒ ዳሮ ኣሳይ ዬሱሳ ኣማኔዳ።

# 11

## ኣለዓዛራ ሃይቁዎ

1 ቢታኒያ ጊያ ቁሪ ካታማን ኣለዓዛራ ጊያ ኣቲ ቢታኒ ሃርጌዳ፤ ሄ ካታማይ ማይራማኔ ኢዚ ሚቻታ ማርታ ዴዔዳ ካታማ። 2 ጎዳ ጌዲያ ሺቱዎ ኦካዴ፡ ባሬ ቢናናን ኣ ጌዲያ ቁጩዳወና ሄ ማይራዎ፤ ሃርጌዳዎ ቃሲ ኢዚ ኣሻ ኣለዓዛራ። 3 ሄዎ ዲራው፡ ሚቻቱ፡ «ጎዳው፡ ኔኒ ሲቂያዌ ሃርጌዳ» ጌዴ ዬሱሳው ኪቱዲኖ።

4 ዬሱሲ ሄዎ ሲሴዳ ዎዴ፡ «ታኒ ያሳ ናባይ ሃርጊያ ጋሱዎን ቦንቹታና ማላ፡ ያሳ ቦንቹዋሲ ሃ ሃርጊ ኣለዓዛራ ኦይቁዳ፤ ኣቲን፡ ዎዲያ ሃርጊያ ጌዴና» ያጌዳ።

5 ዬሱሲ ማርቶ፡ ኢዚ ሚቻቶኔ ኣለዓዛራ ሲቁ፤ 6 ኣለዓዛር ሃርጌዳዎ ዬሱሲ ሲሴዳ ዎዴ፡ ባሬ ዳዲያ ሳዓን ላዑ ጋላሳ ፔሼዳ። 7 ሄዎ፤ ጉዩያን፡ ዬሱሲ ባሬና ካሊያዎንታ «ላዔንሱዎ ዪሁዳ ጋዲያ ቦይቱ» ያጌዳ።

8 ዬሱሳ ካሊያዎንቱ ዛሬዴ፡ «ታማሪሲያዎ፡ ጉላ ዎዲያ፤ ካሴ ኣዪሁዳቱ ኔና ሹቻን ጫዳናው ኮዬዲኖ፤ ቃሲካ ያ ባኒ?» ያጌዲኖ።

9 ዬሱሲ፡ «ኣቲ ጋላሳን ታማኔ ላዑ ሳቲ ዴዔኔዬ? ጋላሲ ሃማቲያ ኣሳይ ቆቤቱና፤ ኣዪሲ ጎፔ፡ ኢ ሃ ሳዓ ፖዑዎ ቤዔ።

10 ሺን ቃማ ሃማቲያ ኡራይ ዴጎፔ፡ ፖዑ ኣኒ ባይና ዲራው፡ ቆቤቱ» ያጌዳ። 11 ዬሱሲ ሄዎ ጌዳዎ፤ ጉዩያን፡ ቃሲካ ኡንቱንቱሲ፡ «ኮ ዳቡ ኣለዓዛር ጌሚዲሼዳ፤ ሺን ጌሚዲሹዎ፤ ኣ ዴንሳናው ታኒ ባይ» ያጌዳ።

12 ዬሱሳ ካሊያዎንቱ ዛሬዴ፡ «ጎዳው፡ ኢ ጌሚዲሹዳዎ ጊዳፔ፡ ኣው ሎዓናዎ» ያጌዲኖ።

13 ኣለዓዛር ሃይቁዳዎ ዬሱሲ ኦዴዳ፤ ሺን ኣለዓዛር ጌሚዲሹዴ ጊሴዳዎ ኦዴዳ ጊዴ፡ ኡንቱንቱ ቆፔዲኖ። 14 ሄዎ ዲራው፡ ዬሱሲ ጌሼዴ ኡንቱንታ፡ «ኣለዓዛር ሃይቁዳ፡

15 ሂንቴንቴ አማናና ማላ፡ ታኒ ሄ ሳዓን ዳዔናዎ፡ ሂንቴንቴ ዲራው ናሼታይ። ሺን ዳንዲቴ፤ አኮ ቦይቴ» ያጌዳ።

16 ሄዋፔ ጉዩያን፡ ማንቲያ ጌቴቲያ ቶማሲ ባሬ ለጌላቱዋ ዬሱሳ ካሊያዋንታ፡ «ዬሱሳና ሃይቃናው ኑኒካ ቃሲ ቦይቴ!» ያጌዳ።

**ዬሱሲ፡ ዳንዲዋኔ ዳዑዋ**

17 ዬሱሲ ጋኪያ ዎዳ፡ አለባዛራው ሞጌቶዴፔ ኦይዲ ጋላሳ ጊዳዳዋ ዳሜዳ። 18 ቢታኒያ ካታማይ ዬሩሳላሜፔ ሄዙ ከሎ ሚቲሪያ ከና ሃኬ። 19 ዳሮ አዩሁዳቱ ማርቶኔ ማይራዋ አንቲንቴ አሻይ ሃይቁዳዎ ማንሌላናው ዬዲኖ።

20 ማርታ ዬሱሲ ዬዳዋ ሲሳዳ፡ አ ሞካናው ከሳዲ፤ ሺን ማይራማ ጎሌን አታዲ። 21 ማርታ ዬሱሳ፡ «ጎዳው፡ ኔኒ ሃዋን ዳዔዳዋ ጊዲንቶ፡ ታ አሻይ ሃይቁና። 22 ሺን ኔኒ ዋሲያዋ አይ ጊደፔኔ፡ ያሳይ ኔው ሃራይ አቶ ሃዒካ አማናዋ ታኒ ኤራይ» ያጋዲ።

23 ዬሱሲ፡ «ኔ አሻይ ሃይቁዋፔ ዳንዳና» ያጌዳ።

24 ማርታ፡ «ዎዲያ ወርሴላን \* ዳንዲዋ ጋላሲ፡ ኢ ሃይቁዋፔ ዳንዳናዋ ታኒ ኤራይ» ያጋዲ።

25 ዬሱሲ ኢዚው፡ «ታኒ ዳንዲዋኔ ዳዑዋ፤ ታና አማኒያ ኡራይ ሃራይ አቶ፡ ሃይቆፔካ ዳዑዋን ዳዓናዋ። 26 ቃሲ ዳዑዋን ዳዒያ ኡራይኔ ታና አማኒያ ኡራይ ኡባይ ኡባካ ሃይቁና፤ ሄዋ ኔኒ አማናይ?» ያጌዳ።

27 ማርታ ዛራዳ፡ «ጎዳው፡ ኤ ታኒ አማናይ፤ ኔኒ ያሳ ናዓ፡ ሳዓ ያናው ዳዒያ ከሪሰቶሳ ጊዲያዋ ታኒ አማናይ» ያጋዲ።

28 ማርታ ሄዋ ጌዳዋፔ ጉዩያን፡ ባዳ ባሬ ሚቻቲው ጌማን ያሳዳ፡ «ታማሪሲያዌ ዩዳ፡ ኔና ኮዬ» ያጋዲ። 29 ማይራማ ሄዋ ሲሴዳ ዎዳ፡ ኤሌላ ዳንዳ ኤቃዳ ዬሱሳኮ ባዲ። 30 ዬሱሲ ማርታ አ ሞኬዳ ሳዓን ዳዔፔ አቲን፡ ቢሮ ቄሪ ካታማ ጋኪቤና። 31 ማይራዋ ማንሌላዳ፡ ጎሌን ኢዚና ዳዒያ አዩሁዳቱ፡ ኢዛ ኤሌካ ዳንዳ ኤቃዳ ካሬ ከሲያዋ ቤዒዳ፡ አለባዛር ሞጌቱዳ ዲፋዋ ባዳ ያኒ ዬካናው ሃናው ያጌዳ፡ ኢዛ ካሊዳ ኬሴዲኖ።

32 ማይራማ ዬሱሲ ዳዒያሳ ባዳ ዬሱሳ ቤዒዳ ዎዳ፡ አ ጌዲያ ቦላን ኩንዳዲ፤ «ጎዳው፡ ኔኒ ሃዋን ዳዔዳዋ ጊዲንቶ፡ ታ አሻይ ሃይቁና ሺን!» ያጋዲ።

\* 11:24 ዎዲያ ወርሴላን፡ ያሳይ አሳ ዜሬላ ኡባ ፒርዳው ሺሺያ ዎዳ ጉሳ።

33 ዬሱሲ ኢዛ ዩኪያዎኔ ቃሲ ኢዚና ዬዳ አዪሁዳቱካ ዩኪያዎ ቤዒዳ፡ ባሬ ዎዛናን ዳሮ ሴሌቲዳ፤ ቃሲ ቶኪ ሽምፔዳ።  
34 ኡንቱንታ፡ «ሃቃን ሞጌዲቲ?» ያጌዴ ኦቲና፡ «ጎዳው፡ ያዴ ቤዓ» ያጌዴ ዛሬዲና።

35 ዬሱሲ አፎጻዳ። 36 ሄዎ ዲራው፡ አዪሁዳቱ፡ «አለዓዛሪ ኢ አይ ከና ሲቁንቶ ቤዒቲ!» ያጌዲና።

37 ሺን ኡንቱንቱፔ ኢቱ ኢቱ፡ «ሃዌ ቆቃ ቢታኒያ ጻሊሴዳዌ ሃ ቢታኒ ሃይቁናዳን ኡዳናው ዳንዳዬ?» ያጌዲና።

**ዬሱሲ አለዓዛሪ ሃይቁዎፔ ዳንፍዳ**

38 ዬሱሲ ቃሲካ ዎዛናፔ ቃሬቲዳ፡ አለዓዛር ሞጌቲዳ ዲፋዎኮ ቤዳ፤ ሄ ዲፋ ጎንጎሉዎ ጊዲዳ ሹቻን ቁምዔቲ ኡቲዳ።

39 ዬሱሲ፡ «ሹቻ ዲጊቲ!» ያጌዴ አዛዜዳ።  
ሃይቁዳ ቢታኒያ ሚቻታ ማርታ፡ «ጎዳው፡ ኢ ሃይቆዴፔ ኦይዲ ገላሳ ጊዴዳ ዲራው፡ ሃዒ ጃንቃናዎ!» ያጋዲ።

40 ዬሱሲ ማርቶ፡ «አማኒያዎ ጊደፔ፡ ኔኒ ያሳ ቦንቹዎ ቤዓናዎ ታኒ ኔው ኦዳቤይኪታ?» ያጌዳ። 41 ኡንቱንቱ ሹቻ ዳንፍዲና፤ ዬሱሲ ሳሉዎ ፑዴ ጻሊዳ፡ «አዎ፡ ታኒ ጊያዎ ኔኒ ሲሴዳ ዲራው፡ ኔና ገላታይ። 42 ኔኒ ኡባ ዎዴ ሲሲያዎ ታኒ ኡራይ፤ ሺን ሃዎን ዩዩ አጵዴ ኤቁዳ አሳይ ኔኒ ታና ኪቲዳዎ አማናና ማላ፡ ሃዎ ታኒ ኡንቱንቱ ዲራው ገይ» ያጌዳ። 43 ዬሱሲ ሄዎ ጌዳዎፔ ጉዩያን፡ ባሬ ቃላ ቶቁ ኡዲዳ፡ «አለዓዛሪ፡ ሃ ከሳ!» ያጌዳ። 44 ሃይቁዳ አለዓዛሪ ኩሺኔ ጌዲ ሻሉዎን ቃሺቲ ኡቲዳ አ ዴሙካ አፊላን ካሜቲ ኡቲዳዌ ከሲና ዬሱሲ ኡንቱንታ፡ «ቢሊ አጊቲ! ቦ!» ያጌዳ።

**ኪሪሰቶሳ ቦላ ማቁቲዲኖ**

(ማጥ 26:1-5፤ ማር 14:1-2፤ ሉቅ 22:1-2)

45 ሄዎ ዲራው፡ ማይራሚኮ ዬዳ አዪሁዳቱዎፔ ጮራቱ ዬሱሲ ኦፊዳዎ ቤዒዳ፡ አ አማኔዲና። 46 ሺን ኡንቱንቱፔ ኢቱ ኢቱ ፓሪሳዎቱዎኮ ቢዳ፡ ዬሱሲ ኦፊዳዎ ኡንቱንቱሲ ኦዴዲና።  
47 ሄዎፔ ጉዩያን፡ ቁሳቱዎ ካፓቱኔ ፓሪሳዎቱ ያዓ ሺሺዳ፡ «ሃ ቢታኒ ዳሮ ዎልቃማ ማላታ ኦሊያ ዲራው፡ አያ ኦሳኔ?» 48 ኦኒ አ ጮዑ ጊዳ፡ አጎፔ፡ አሳይ ኡባይ አ አማናናዎ፤ ቃሲ ሮሜ ገዲያ አሳቱ ዩዴ፡ ኦ ጌሻ ጎሊያኔ ኦ አሳ ጳዩሳና» ያጌዲና።

49 ኡንቱንቱፔ ኢቱ ቃያፋ ጊያ፡ ሄ ላይሊ ቁሳቱዎ ኡባቱዎ ካፖ ጊዴዳዌ፡ «ሃንቱንቱ አይኔ ኤሪኪታ! 50 አሳይ ኡባይ ጳዩያዎፔ አሳ ኡባ ዲራው፡ ኢቲ አሳይ ሃይቁያዌ ሎዓ ጊዲያዎ



ሂንቱንቱ አኩከቱ?» ያጌዳ። 51 ኢ ሄዋ ባሬፔ ጊቤና፤ ሺን ሄ ላይሌ ቁሳቱዋ ኡባቱዋ ካፖ ጊዲያ ዲራው። ዬሱሲ አዪሁዳ አሳ ዲራው ሃይቃናው ቤሲያዋ ናቢ ኦዴዳ። 52 ቃሲ ዬሱሲ አዪሁዳ አሳ ፃላላው ሃይቁና፤ ሺን ላሌቲ ዳዲያ ፃሳ ናና ኢቱዋ ኡዲ ሺሻናው ሃይቃናው።

53 ሄ ጋላሳፔ ደሚዳ፣ ኡንቱንቱ አ ዎታናው ማቄቲዲኖ። 54 ሄዋ ዲራው፣ ዬሱሲ አዪሁዳቱ ጊዲያን ቆንጨያን ያ ሃ ሃሚቲቤና፤ ሺን ማላ ቢታ ጋፃን ዳዲያ ጋዲያ፣ ኤፊሬማ ጌቲቲያ ካታማ ቤዳ። ባሬና ካሊያዋንቱና ሄዋን ታኩዳ።

55 አዪሁዳቱ ፓሲጋ ቦንቹያ ጋላሳይ ማቲዳ፤ ቃሲ ዳሮ አሳይ ባሬና ጌሻናው፣ ፓሲጋ ቦንቹያ ጋላሳይ ጋካናፔ ካሴ ዲማ ዲማ ሳፔ ዬሩሳላሜ ቤዳ። 56 ኡንቱንቱ ዬሱሳ ኮዪና፤ ጌሻ ጎሊያን ኤቁዳ፣ «አያ ቆጊቱ? ፓሲጋ ቦንቹያሳ ዬሱሲ ዬኔ?» ያጌዳ ኢቱ ኢቱዋ ኦቹዲኖ። 57 ቃሲ ቁሳቱዋ ካፓቲኔ ፓሪሳዋቱ ዬሱሳ ቃቻናው፣ ኢ ዳዲያሳ ኤሪያዌ ኦኒኔ ባሬንቶ ኦዳና ማላ አዛዜዲኖ።

# 12

## ዬሱሳ ሺቱዋ አኩዳ ሚሺራቶ (ማት 26:6-13፤ ማር 14:3-9)

1 ፓሲጋ ቦንቹያ ጋላሳፔ ኡሱቱን ጋላሳ ካሴቲዳ፣ ዬሱሲ ኢ ሃይቁዋፔ ዳንሌዳ አሊዳዛር ዳዲያ ቢታኒያ ጊያ ካታማ ቤዳ።  
2 ሄ ሳዓን ኡንቱንቱ አው ካዉዋ ካሌዲኖ፤ አሊዳዛር አናና ኡቲዳ ኢቲፔ ሚያዋንቱ ጊደን ኡቲ ዳዲሺን፣ ማርታ ካዉዋ ጊሻ ሚዛዲ።  
3 ማይራማ ዳሮ ሻሉዋን ዛሊዳቲያ ኢቲ ፃሪውሲያ ጊዲያ ናርዶሳ ጌቲቲያ ጌሻ ሺቱዋ አሃዳ፣ ዬሱሳ ጌዲያ ኦካዳ ባሬ ቢናናን አ ጌዲያ ቁጫዲ፤ ጎሊያ ኡባይ ሺቱዋ ሳዉዋን ቶሺኩ ጌ።

4 ሺን ዬሱሳ ካሊያዋንቱፔ ኢቱ፣ ዬሱሳ አሌ አማናዌ፣ ዪሁዳ አሰቆሮቱ፣ 5 «ሃ ሺቱ ሄዙ ጌቱ ዲናሪያኒ ዛሊዳቲና፣ አያሲ ሄዋ ሂዬሳው አሚቴኔ?» ያጌዳ። 6 ኢ ካዪሱዋ ጊዳዳ ዲራው፣ ሄዋ ጌዳፔ አቲን፣ ሂዬሳው ቃሬቲዳ ጊቤና፤ ኢ ሚሻ ቃርጨቲያ ኦይቁያዋ ጊዲያ ዲራው፣ ኡባ ዎዳ አፔ ባሬው አኩዳ።

7 ዬሱሲ፣ «ሃ ሺቱዋ ታኒ ሞጌቲያ ጋላሳይ ጋካናው ኢዛ አያው ሚንጃኔ? ኢዞ አጊቱ። 8 ሂዬሳቱ ኡባ ዎዳ ሂንቲናና ዳዓና፤ ሺን ታኒ ኡባ ዎዳ ሂንቲናና ዳዒኬ» ያጌዳ።

9 አዩሁዳቱዋፔ ዳሮ አሳይ ዩሱሲ ቢታኒያን ዳዒያዎ ሲሲዳ፣ ያ ቤዳ፤ ኡንቱንቱ ዩሱሳ ቤዳና ገሻ ፃላላው ጊዳናን፣ ኢ ሃይቁዋፔ ዳንጮዳ አለዓዛራካ ቤዳናው ቤዲኖ። 10 ሄዋ ዲራው፣ ቁሳቱዋ ካፓቱ አለዓዛራካ ቃሲ ዎቆናው ማቄቲዲኖ። 11 አዩሲ ጎፔ፣ አለዓዛራ ጋሱዋን ዳሮ አዩሁዳቱ ባሬና ካሌጲያዋንታ አጊዳ፣ ዩሱሳ አማኒኖ።

ዩሱሲ ቦንቹዋን ዩሩሳላሜ ጌሌዳ  
(ማጥ 21:1-11፤ ማር 11:1-11፤ ሉቅ 19:28-40)

12 ዎንቱላ ጋላሲ ፓሲጋ ቦንቹያሳ ዩዳ ዳሮ አሳይ ዩሱሲ ዩሩሳላሜ ቢያዎ ሲሴዳ። 13 ያቲዳ ዛምባ ሃይላ ኦይቂዳ፣ \* አ ሞካናው ኬሴዲኖ። ባሬንቱ ኮሻ ቶቁ ኡዲዳ። «ያሳይ ጋላቲቶ!

ያሳ ሱንላን ዩያ ኢሰራዔሊያ ካቲ አንጃቴዳዋ! » ያጌዲኖ።

14-15 ያሳ ማፃፋይ፣  
«ደዮኔ ካታማው፣ ያዮፓ!

ቤዳ፣ ኔ ካቲ ሃሬ ማራ ቦላ ኡቲዳ ዩ» ጊያዋዳን፣ ዩሱሲ ሃሬ ማራ ዳሚዳ፣ አ ቶጌዳ።

16 ዩሱሳ ካሊያዋንቱ ሄዋ ካሴ አኬኪቤይኪኖ፤ ሺን ዩሱሲ ቦንቹቲዳዋፔ ጉዪያን፣ ያሳ ማፃፋይ ሄዋ ኡባ ጌዳዋኔ ቃሲ ኡንቱንቱካ ሄዋ ኡባ ዩሱሳው ኦጮዳዋ ሃሳዬዲኖ።

17 አለዓዛር ሞጌቲዳ ጎንጎሉዋፔ ዩሱሲ አ ፃሲዳ፣ ሃይቁዋፔ ዳንጮዳ ዎዳ፣ ዩሱሳና ዳዒያ ዳሮ አሳይ ዩሱሳው ማርካቲዳ።

18 ዳሮ አሳይ አ ሞካናው ኬሴዳዌ፣ ኢ ሄ ዎልቃማ ማላሊያዎ ኦጮዳ ዲራሳ። 19 ሄዋ ዲራው፣ ፓሪሳዋቱ ኢቱ ኢቱዋ፣ «ሂንቲንቱ አይኔ አላናው ዳንዳዬናዋ ቤዒቲ! ቤዒቲ፣ ጋዳ ኡባይ አ ጌዳዋ ካሌዳ» ያጌዲኖ።

20 ፓሲጋ ቦንቹያ ጋላሲ ጎዪናናው ዩሩሳላሜ ቤዳዋንቱ ጊደን ኢቲ ኢቲ ጊሪኬ አሳቱ ዳዒኖ። 21 ኡንቱንቱ ጋሊላ ጋዲያን ቤቲሳይዳ ጌቲቲያ ካታማፔ ዩዳ ፒሊጳሳኮ ቢዳ፣ «ጎደው፣ ኑኒ ዩሱሳ ቤዳናው ኮዬቶ» ያጊዳ ዎሴዲኖ። 22 ፒሊጳሲ ቢዳ፣ ኢንዲራሳው ኦዲና ላዓቱካ ቢዳ፣ ዩሱሳው ኦዳዲኖ።

23 ዩሱሲ ኡንቱንቱሲ ሃዋዳን ያጌዳ፤ «ታኒ፣ አሳ ናዓይ፣ ቦንቹቲያ ሳቲ ጋኬዳ። 24 ታኒ ሂንቲንቱሲ ቱሙዋ ኦዳይ፤ ኢቲ ዛርጋ አይፋታ ቢታን ዎቆዳ ዎቃና ቆዮፔ፣ ባሬካ አታው። ሺን ሄ

\* 12:13 ዛምባ ሃይላ ኦይቂዳ፣ ሃዌ አዩሁዳ አሳይ ኤሬቲዳ አሳ ሞኪያ ዎጋ።  
12:13 ማዝ 118:25

ዘርጋ አይፋታ ዋቆፔ፣ ዳር አይፊያ አይፋው። 25 ባሬ ሸምጥዋ ሰቂያ ኮኔኔ ባዪዜ፤ ቃሲ ባሬ ሸምጥዋ ሃ ሳዓን ኢዲያ ኮኔኔ ሜዲና ዴያ አሼ። 26 ኦኔኔ ታው ኦፊፔ፣ ታና ካላናው ቤሴ፤ ቃሲ ታኒ ዴዲያ ሳዓን ታው ኦሊያዌካ ዴዳናዋ። ታው ኦሊያ ኦናኔ፣ ታ ኦቡካ ኦ ቦንቻናዋ።

27 «ሃዒ ታ ሸምጥ ዳር ኡንዔቴዳ፤ ያተና ዋጎ? ታኒ፣ ታ ኦቦ፣ ታና ሃ ሳታተፔ አሻርኪ» ያጎ? ቱይተ፣ ታኒ ሃ ሳተያን ዬዳዋ ሃዋ ዲራሳ። 28 ታ ኦቦ፣ ኔ ሱንሳ ቦንቻ» ያጌዳ።

ሄ ዋዴ ሳሉዋፔ፣ «ታኒ ታ ሱንሳ ቦንቻዲ፤ ቃሲካ ጉጃዴ ቦንቻና» ያጌያ ቃላይ ዬዳ።

29 ሄ ሳዓን ኤቁዳ ጮራ አሳይ ሄ ቃላ ሲሲዴ፣ «ሄዌ ጉጉንሳ» ያጌዳ።

ሃራንቱ ቃሲ፣ «ኪታንቻይ አው ሃሳዬዳ» ያጌዳና።

30 ዬሱሲ ዛሬዴ አንቱንታ፣ «ሃ ቃላይ ሂንቱንቱ ዲራው ዬዳዋፔ አተን፣ ታ ዲራሳ ጌዴና። 31 ሃ ሳዓይ ፐርዴቲያ ዋዲ ሃዓ፤ ሃ ሳዓ ተ ሞዲያዌ ሃዒ ካሬ ኦሌታናዋ። 32 ቃሲ ታኒ ማሰቃሊያ ቦላ ካቁቲያ ዋዴ፣ አሳ ኡባ ታኮ ጎቻና» ያጌዳ። 33 ኢ ሄዋ ጌዳዌ አይ ማላ ሃይቁዋ ኢ ሃይቃኔንቶኔ አንቱንታ ኤሪሳናሳ።

34 ዳር አሳይ ዛሬዴ ዬሱሳ፣ «ኑ ሃጊ ኪሪሰቶሲ ሜዲናው ዴዲያዋ ኦዴ። ያተና፣ ኔኒ ዋጋዴ፣ ኦሳ ሳዓይ ማሰቃሊያ ቦላ ካቁታና ጋይ? ሄ አሳ ሳዓይ ኦኔ?» ያጌዳና።

35 ዬሱሳ፣ «ፖው ሂንቱናና ጉላ ዋዲያ ጋሚዳናዋ። ሂንቱንቱሲ ጳሚና ማላ፣ ፖው ዴዲሸን፣ ፖውዋን ሃሜቲቴ። ጳሚኒ ሃሜቲያ ኡራይ ሃቃ ቢንቶኔ ኤሬና። 36 ፖውዋ አሳ ጌዳና ማላ፣ ሂንቱንቱሲ ፖው ዴዲሸን፣ ፖውዋ አማኒቴ» ያጌዳ።

**አዪሁዳቱ አማኔናን ኢጄዳ ሃናታ**  
ዬሱሳ ሄዋ ሃሳዬዳዋፔ ጉዪያን፣ ቢዴ አንቱንቱፔ ጌሜቲዳ። 37-38 ኢ ሄዋ ከና ዋልቃማ ማላታ አንቱንቱ ሲንሳን ኦፊፔካ፣ ናቢያ ኢሳያሴ፣  
«ጎዳው፣ ኑ ማርካቴላ ኦኒ አማኔዴ?  
ጎዳይ ባሬ ዋልቃ ኦና ቤሴዴ?»  
ጌዳዌ ቱማ ጌዳና ማላ፣ አንቱንቱ ኦ አማኒቤይኪና።

---

† 12:31 ሃ ሳዓ፣ ጉሳይ ሃ አላሚያ ጌዲዴ ሃ ዮሀንሳ ሚሺራቹዋን ዴዲያ ሃ ሳዓ ጌያዌ ሃ ሳዓ ቦላ ዴዲያ አሳኔ አንቱንቱ ካሃ ባሬሳ ኡዲዴ ዋዲያ ኢታ አያና ዋልቃ ቤሴ። 12:34 ማዝ 110:4፤ ኢሳ 9:7፤ ሂዝ 37:25፤ ዳን 7:14 12:37-38 ኢሳ 53:1

39-40 ኢሳያስ ቃሲካ፡  
 «ኡንቱንቱ ኣይፊ ያሌና ማላ፡  
 ኡንቱንቱ ዋዛናይካ ኣኸኸና ማላ፡  
 ኡንቱንቱ ያሳኮ ሲሚና፡ ኢ ኡንቱንታ ፓሌና ማላ፡  
 ያሳይ ኡንቱንቱ ኣይፊያ ቆቂሴዳ፡፡  
 ኡንቱንቱ ዋዛና ዳሚሴዳ»  
 ጌዳ ዲራው፡ ኡንቱንቱ ኣማናናው ዳንዳደቤደኪኖ፡፡  
 41 ኢሳያስ ዩሱሳ ቦንቹዋ ቤዔዳ ዲራውኔ ቃሲ ኣባ ሃሳዬዳ ዲራው፡ † ሃዋ ጌዳ፡፡  
 42 ሃዋ ጌዲናካ፡ ሃራይ ኣቶ ኣደሁዳቱ ካፓቱዋፕካ ጮራቱ ዩሱሳ ኣማኔዲኖ፡፡ ሺን ፓሪሳዋቱ ባሬና ኣደሁዳቱ ዋሳ ጎሊያፕፕ ከሴኖ ጌዴ ያዬዳ ዲራው፡ ኣማኔዳ ጌዴ ማርካቲቤይኪኖ፡፡  
 43 ኣዩሲ ጎፕ፡ ኡንቱንቱ ያሳ ሳባፕ ኣሊዴ፡ ኣሳ ሳባ ሲቆዲኖ፡፡  
 44 ዩሱሲ ባሬ ቃላ ቆቂ ኡዲዴ ያጌዳ፤ «ታና ኣማኒያ ኦኒኔ ታና ኪቱዳዋካ ኣማኒያዋፕ ኣቲን፡ ታ ያላላ ኣማኔና፡፡ 45 ታና ቤዔያ ኦኒኔ ታና ኪቱዳዋካ ቤዔ፡፡ 46 ታና ኣማኒያ ኡባይ ቆማኒ ዴዔና ማላ፡ ታኒ ፖዑዋ ጌዳዴ ሳባ ያዲ፡፡ 47 ታ ቃላ ሲሲዴ ኣዛዜቴና ኡራ ኦናኔ ታኒ ፐርዲኬ፤ ኣዩሲ ጎፕ፡ ታኒ ኣላሚያ ኣሻናው ዩዳዋፕ ኣቲን፡ ፐርዳናው ያቤይኬ፡፡ 48 ታና ኢዲያ ኦናኔ ቃሲ ታ ቃላ ኣኸና ኦናኔ ፐርዲያዌ ዴዔ፡፡ ታኒ ኦዴዳ ቃላይ ወርሴላ ፓላሲ ሄ ኡራ ፐርዳና፡፡ 49 ኣዩሲ ጎፕ፡ ታኒ ሃዋ ታፕ ሃሳያቤይኬ፤ ሺን ታና ኪቱዳ ታ ኣቡ ታኒ ፓናዋኔ ሃሳያናዋ ታና ኣዛዜዳ፡፡ 50 ቃሲ ኣ ኣዛዙ ሜዲና ዴዑዋ ኣሃያዋ ታኒ ኡራይ፤ ሃዋ ዲራው፡ ታኒ ኦዲያዌ ታ ኣቡ ታና ኦዳ ጌዴ ኦዴዳዋ» ያጌዳ፡፡

# 13

ዩሱሲ ባሬ ካሊያዋንቱ ጌዲያ ሜጩዳ  
 1 ፓሲጋ ቦንቹያ ፓላሳይ ጋካናፕ ካሴቲዴ፡ ሃ ሳባፕ ሻኬቲዴ፡ ኣወዋኮ ቢያ ዋዲ ጋኬዳዋ ዩሱሲ ኤራዳ፤ ሃ ሳባን ዴዔያ ባሬዋንታ ኡባ ዋዴ ሲቆዳ፤ ወርሴላይ ጋካናው ኡንቱንታ ሲቆዳ፡፡  
 2 ዩሱሲኔ ካሊያዋንቱ ካወዋ ሚሺን፡ ሲሞና ናባ ዩሁዳ ኣሰቆርቱ ዩሱሳ ኣሊ ኢማናዳን፡ ፃላሂ ኣ ቆፊሲ ዋሴዳ፡፡ 3 ዩሱሲ ባሬ ኣወ ኡባባ ኣ ኩሺያን ዋሴዳዋ፡ ቃሲ ያሳ ማታፕ ኢ ዩዳዋኔ፡

---

12:39-40 ኢሳ 6:10 † 12:41 ኢሳያስ ዩሱሳ ቦንቹዋ ቤዔዳ ዲራውኔ ቃሲ ኣባ ሃሳዬዳ ዲራው፡ ዋይ ኢሳያስ ያሳ ቦንቹዋ ቤዔዳ ዲራውኔ ቃሲ ዩሱሳ ሃሳዬዳ ዲራው፡

ሲሚዳ እኮ ባናዋ ኤራዳ። 4 ዩሱሲ ሚያሳፔ ዳንዲ ኤቂዳ፣ ቦላ ባጋ ማዩዋ ቃሪ ዋሊዳ፣ ፖፃ ባሪ ያሳን ዳንጩዳ። 5 ሄዋፔ ጉዲያን፣ ሃላ ሜቻ ሚሻን ቲጊዳ፣ ባሪና ካሊያዋንቱ ጌዲያ ሚቻን ባሪ ያሳን ዳንጩዳ ፖፃን ቁጩሳ ደሚዳ።

6 ዩሱሲ ሲሞኒ ጳዲሮሳኮ ዩና ጳዲሮሴ፣ «ጎዳው፣ ኔኒ ታ ጌዲያ ማጩናው ሃናዩዬ?» ያጌዳ።

7 ዩሱሲ ዛሪዳ አ፣ «ታኒ ኦሊያዋ ኔኒ ሃዲ ኤራካ፤ ሺን ጉዬፔ ኤራናሳ» ያጌዳ።

8 ጳዲሮሴ፣ «ኔኒ ታ ጌዲያ ኡባካ ማጩካ!» ያጌዳ።

ዩሱሲ አ፣ «ታኒ ኔ ጌዲያ ማጩና ጳዮፔ፣ ኔዉኔ ታዉኔ ኢቲፔቴላይ ባዋ» ያጌዳ ዛሪዳ።

9 ሲሞና ጳዲሮሴ ዩሱሳ፣ «ጎዳው፣ ያቶፔ፣ ታ ጌዲያ ፃላላ ማጩፓ፤ ታ ኩሺያካ ታ ሁጲያካ ማጩ!» ያጌዳ።

10 ዩሱሲ ዛሪዳ፣ «ቦላ ማጩቲዲጌዳ ኡራይ ኦኒኔ ጌዲያፔ ሃራባ ማጩታናው ኮሼና፤ አው ኡባሳይካ ጌሻ። ቃሲ ሂንቲንቱካ ጌሻ፤ ሺን ኡባይ ጌሻ ጊዲኪታ» ያጌዳ። 11 አዩሲ ጎፔ፣ ዩሱሲ ባሪና አሊ ኢማና ኡራይ ኦኒንቶኔ ኤራዳ፤ ኢ፣ «ሂንቲንቱ ኡባይ ጌሻ ጊዲኪታ» ጌዳዌ ሃዋሳ።

12 ኡንቲንቱ ጌዲያ ማጩዳዋፔ ጉዲያን፣ ዩሱሲ ባሪ ማዩዋ ማዩዳ፣ ባሪሳ ጉዬ ሲሚ ቢ ኡቲዳ ኡንቲንታ ያጌዳ፤ «ታኒ ሂንቲንቱሲ ኦሊዳዋ አኩኪቱ? 13 ሂንቲንቱ ታና፣ ታማሪሲያዋ ነጎዳው ጌታ፤ ታኒ ሄ ሂንቲንቱ ጌያዋ ጌዲያ ዲራው፣ ሎይሌዲታ።

14 ታኒ ሂንቲንቱሲ ጎዳኔ ሂንቲንታ ታማሪሲያዋ ጌዳዳ፣ ሂንቲንቱ ጌዲያ ማጩያዋ ጌዳፔ፣ ሂንቲንቱካ ኢቱ ኢቱዋ ጌዲያ ማጩናው ቤሴ። 15 አዩሲ ጎፔ፣ ታኒ ሂንቲንቱሲ ኦሊዳዋዳን፣ ሂንቲንቱካ ኦላና ማላ፣ ሂንቲንቱሲ ሌሚሱዋ ጌዳዲ። 16 ታኒ ሂንቲንቱሲ ቱሙዋ ኦዳይ፤ ቆማይ ባሪ ጎዳፔ አዳና። ቃሲ ከቲቴዳ ኡራይካ ባሪና ከቲዳዋፔ አዳና። 17 ሂንቲንቱ ሄዋ ኤሪዳ ኦሊያዋ ጌዳፔ አንጃቴዳዋንታ።

18 «ታኒ ሂንቲንቶ ኡባባ ሃሳዩኬ። ታኒ ደራዳዋንታ ኡራይ፤ ሺን ያሳ ማፃፋይ፣ (ታኒ ባርሴዳዌ ታ ኩሺያ ሳዔዳ) ጌዳዌ ቱማ ጌዳናው ቤሴ። 19 ሃዌ ሃኒያ ዋዳ ታኒ ታና \* ጌዲያዋ ሂንቲንቱ አማናና ማላ፣ ሃዌ ሃናፔ ካሴታዳ ሂንቲንቱሲ ሃናናዋ ኦዳይ። 20 ታኒ ሂንቲንቱሲ ቱሙዋ ኦዳይ፤ ታኒ ከቲያ ኦናኔ ሞኪያ ኡራይ ታናካ ሞኬ፤ ቃሲ ታና ሞኪያ ኦኒኔ ታና ከቲዳዋ ሞኬ» ያጌዳ።

13:18 ማዘ 41:9 \* 13:19 ታኒ ታና፣ ዮሀ 8:24 ያሊቱ።

ዮሱሲ ባሬና አሊ ኢማናዌ ኦኔንቶ ካሴቲዳ ኦዴዳ  
(ማጥ 26:20-25፤ ማር 14:17-21፤ ሉቃ 22:21-23)

21 ዮሱሲ ሄዋ ሃሳዬዳዋ፤ ጉዩያን፣ ባሬ ዋዛናን ዳር ማቶቲዳ፣ «ታኒ ሂንቴንቲሲ ቱሙዋ ኦዳይ፤ ታና ሂንቴ፤ አቱ አሊ ኢማናዋ» ጊዳ ቆንጨያን ኦዴዳ።

22 ኢ ኦና ሃሳዩንቶኔ፣ ካሊያዋንቲሲ ኡባካ ኤሬቴናን ኢዳና፣ አቱ አቱዋ ያሌዲኖ። 23 ዮሱሳ ካሊያዋንቲ፤ አቱ፣ ዮሱሲ ሲቁያዋ፣ ዮሱሳ ማታን ኡቴዳ። 24 ሄዋ ዲራው፣ ሲሞና ጳዊሮሴ ሄ ካሊያዋ ሲሚዲዳ፣ «ኢ ኦና ጊንቶ፣ ኦኔ ኦ ኦቻ» ያጌዳ።

25 ሄዋ ዲራው፣ ሄ ካሊያዋ ዮሱሳ ሃይላኮ ሸቂዳ፣ «ጎዳው፣ ኢ ኦኔ?» ያጌዳ።

26 ዮሱሲ ዛሬዳ፣ «ታኒ ኡኪላን ጫባ ቱሻዳ አሚያዋ ኦ» ያጌዳ። ቃሲ ኡኪላ ማንሳ አኪዳ፣ ጫባ ቱሸዳ፣ ሲሞና ናዳ፣ ዩሁዳ አሰቆርቲሲ አሜዳ። 27 ዩሁዳይ ኡኪላ ማንሳዋ አኮዋ፤ ጉዩያን፣ ሴፃናይ ኤሌካ ዩሁዳን ጌሌዳ። ዮሱሲ ኦ፣ «ኔኒ ኦላናዋ ኤሌላ ኦላ!» ያጌዳ። 28 ሺን ሄ ሳዳን ኡቴዳዋንቲ፤ ኦኔኔ ዮሱሲ ሄዋ ኦ አዩሲ ጌዳንቶኔ ኤሪቤና። 29 ዩሁዳይ ሚሻ ቃርጨቲያ ኦይቂያ ዲራው፣ ካሊያዋንቲ፤ አቱ አቱ ዮሱሲ ዩሁዳ፣ «ፓሲጋ ቦንቲያ ጋላሳው ባሬና ከሺያዋ ባዳ ሻማ ዋይ ሂዬሳው ሚጠዋታ አማ ጌዳ» ያጌዳ ቆፕዲኖ።

30 ዩሁዳይ ኡኪላ ማንሳዋ አኪዳ፣ ኤሌካ ካሬ ኬሴዳ፤ ሄ ዋይ ሳዳይ ቃማ።

**ኦራሳ አዛዙዋ**

31 ዩሁዳይ ካሬ ኬሴዳዋ፤ ጉዩያን፣ ዮሱሲ ያጌዳ፤ «ሃዲ ታኒ ኦሳ ናዳይ ቦንቲታዲ፣ ያሳይካ ታ ባጋና ቦንቲቲዳ። 32 ያሳይ ታ ባጋና፣ ኦሳ ናዳ ባጋና ቦንቲቶ፤ ኢ ባሬ ሁጹው ታና ኦሳ ናዳ ቦንቲናዋ፤ ቃሲ ኢ ታና ኤሌካ ቦንቲናዋ። 33 ታ ናቶ፣ ታኒ ሂንቴናና ዳር ዋዲያ ጋሚሲኬ። ሂንቴንቲ ታና ኮያና፤ ሺን ታኒ ኦዩሁዳቱዋ፣ ታኒ ቢያሳ ሂንቴንቲ ባናው ዳንዳዩኪታ፤ ጌዳዋዳን፣ ሂንቴወካ ሃዲ ኦዳይ። 34 ታኒ ሂንቴንታ ኦራሳ አዛዙዋ አዛዛይ፤ አቱ አቱዋ ሲቂቴ። ታኒ ሂንቴንታ ሲቂዳዋዳንካ፣ ሂንቴንቲ አቱ አቱዋ ሲቃና ቤሴ። 35 ሂንቴንቲ አቱ አቱዋና ሲቂቶ፤ ታና ካሊያዋንታ ጊዲያዋ ኦሳይ ኡባይ ኤራና» ያጌዳ።

ጳዊሮሴ ካዳናዋ ዮሱሲ ካሴቲዳ ኦዴዳ  
(ማጥ 26:31-35፤ ማር 14:27-31፤ ሉቃ 22:31-34)

36 ሲሞኒ ጳዊሮሴ ዮሱሳ፣ «ጎዳው፣ ኔኒ ሃቃ ባይ?» ያጌዳ።

ዬሱሲ ዛሪዴ፣ «ታኒ ቢያሳ ኔኒ ሃዒ ታና ካላናው ዳንዳያካ፤ ሺን ጉዬፔ ካላና» ያጌዳ።

37 ጳጳርሴ፣ «ጎዳው፣ ታኒ ኔና ሃዒ ካላናው አዪሲ ዳንዳዪኪታ? ታኒ ኔ ዲራው፣ ሃይቃናውካ ጊጋ ኡታዲ!» ያጌዳ።

38 ዬሱሲ ዛሪዴ፣ «ታ ዲራው ሃይቃናው ሃዒ ቱሙ ጊጋ ኡታዲ? ታኒ ኔው ቱሙዋ ኦዲይ፤ ኩቱ ዋሳናፔ ካሴ፣ ኔኒ ታና ሄዙ ጌዴ ካዳናሳ» ያጌዳ።

# 14

ዬሱሲ፣ አዉዋኮ አፊያ ኦጊያ

1 ዬሱሲ ካሊያዋንታ «ሂንቴንቱ ዋዛናይ ሂርጎፕ፤ ያሳን አማኒቱ፤ ታናንካ አማኒቱ። \* 2 ታ አቡ ጎሌን ዳር ሳዓይ ዴዔ። ሄዋ ጊዴኔንቶ፣ ታኒ ሂንቴንቱሲ ሄዋ ኦዲኬ፤ ታኒ ሂንቴንቱሲ ሳዓ ጊጊሳናው ባይ። 3 ታኒ ባዴ ሳዓ ጊጊሴዳዋፔ ጉዬያን፣ ታኒ ዴዒያ ሳዓን ሂንቴንቱካ ዴዓና ማላ፣ ሲማ ያዴ ሂንቴንታ ታኮ አካ አፋና። 4 ቃሲ ሂንቴንቱ ታኒ ቢያ ኦጊያ ኤሪታ» ያጌዳ።

5 ቶማሲ፣ «ጎዳው፣ ኔኒ ቢያሳ ኑኒ ኤሮኮ፤ ኦጊያ ዋኒዴ ኤራናው ዳንዳዬቶ?» ያጌዳ።

6 ዬሱሲ ዛሪዴ፣ «ኦጊ፣ ቱሙኔ ዴዐ ታና፤ ታ ባጋናፔ አቲን፣ አኒኔ ታ አቡኮ ባናው ዳንዳዬና። 7 ሂንቴንቱ ታና ኤሪያዋ ጊዲንቶ፣ ታ አባካ ኤራና፤ ሃዒፔ ዶሚዴ፣ ሂንቴንቱ አ ኤሪታኔ ቃሲ አ ቤዔዲታ» ያጌዳ።

8 ፒሊጶሲ ዬሱሳ፣ «ጎዳው፣ አዉዋ ኑና ቤሳ፤ ሄዌ ኑሲ ጊዳናዋ» ያጌዳ።

9 ዬሱሲ ዛሪዴ ያጌዳ፤ «ፒሊጶሳ፣ ታኒ ሃዋ ከና ዋዲያ ሂንቴናና ዴዒናካ ታና ኤሪኪ? ታና ቤዔዳ ኡራይ አዉዋካ ቤዔዳ፤ ያቲና፣ ኔኒ ዋጋዴ፣ አዉዋ ኑና ቤሳ፤ ጋይ?» 10 ታኒ አዉዋ ጊደን ዴዒያዋ ቃሲ አዉካ ታ ጊደን ዴዒያዋ ኔኒ አማኒኪ? ታኒ ሂንቴንቱሲ ኦዲያ ቃላ ታኒ ታፔ ኦዲኬ፤ ሺን ታ ጊደን ዴዒያ አዉ ባሬ ኦሱዋ ኦሉ። 11 ታኒ አዉዋ ጊደን ዴዒያዋኔ ቃሲ አዉካ ታ ጊደን ዴዒያዋ ታና አማኒቱ፤ ሄዌ ጳዮፔ፣ ታ ኦሱዋባው ታና አማኒቱ።

12 «ታኒ ሂንቴንቱሲ ቱሙዋ ኦዲይ፤ ታና አማኒያ ኡራይ ታኒ ኦሊያ ኦሱዋ ኦላና። ታኒ አዉዋኮ ቢያ ዲራው፣ ሄ ኡራይ ሃዋፔ አዲያ ኦሱዋ ኦላና። 13 አዉ ናዓ ጋሱዋን፣ ታ ባጋና ቦንቼታና

\* 14:1 ያሳ አማኒቱ፤ ታናንካ አማኒቱ። ያሳን አማኑ ሂንቴው ዴዔ ጉሳይ፣ ታናንካ አማኑ ዴዔ ጉሳ።

ማላ፡ ታ ሱንላን ሂንቴንቱ ዋሲያ ኡባባ ታኒ ሂንቴንቱሲ ፖላና።  
14 ሂንቴንቱ ታ ሱንላን ታና አያኔ ኦቾፔካ፡ ታኒ ፖላና።

ዩሱሲ አያና ጌሻ ኪታናው አሜዳ ሂዶታ

15 «ሂንቴንቱ ታና ሲቋያዋ ጊዶፔ፡ ታ አዛዙዋ ናጋና። 16-17 ታኒ አዉዋ ዋሳና፤ ሂንቴናና ሜጲናው ደዓና ማላ፡ ቱማቴላ አያና፡ ሃራ ሜንሌሊያዋ ሂንቴንቱሲ ኢ አማና። ሃ ሳዓይ ሄ ቱማቴላ አያና ቤዔናዋኔ ኤሬናዋ ጊዲያ ዲራው፡ አ አካናው ዳንዳዩና፤ ሺን ኢ ሂንቴናና ደዓና ዲራውኔ ሂንቴንቱ ጊዶን ደዓና ዲራው፡ ሂንቴንቱ አ ኤሪታ።

18 «ታኒ ሂንቴንታ አዉኔ አታ ባይና ዪያ ናናዳን ሂንቴሬካ አጋባሺኬ፤ ታኒ ሲማዳ ሂንቴንቱኮ ያና። 19 ጉላ ዋዲያፔ ጉዪያን፡ አላሚ ታና ላዕንሱዋ ቤዔና፤ ሺን ሂንቴንቱ ታና ቤዓና፤ ታኒ ደዑዋን ደዓና ዲራው፡ ሂንቴንቱካ ቃሲ ደዑዋን ደዓና። 20 ታኒ ታ አዉዋ ጊዶን ደዓናዋኔ ሂንቴንቱ ታ ጊዶን ደዓናዋ፡ ቃሲ ታኒ ሂንቴንቱ ጊዶን ደዓናዋኔ ሂንቴንቱ ሄ ጋላሲ ኤራና።

21 «ታ አዛዙ አ ማታን ደዓና አሳይ፡ ቃሲ ሄ አዛዙዋካ ናጊያዋ፡ ኢ ታና ሲቋያ አሳ። ታና ሲቋያ አሳ ታ አቡካ ሲቋ፤ ታኒካ አ ሲቃይ። ታኒ አው ቆንጫና» ያጌዳ።

22 ዪሁዳ አስቆርታ ጊዶና ዪሁዳይ ዩሱሳ፡ «ጎዳው፡ ኔኒ ኔ ሁጲያ አላሚያ ቤሴናን፡ ኑና ቤሳና ጊያዋ ዋጋይ ጋይ?» ያጌዳ።

23 ዩሱሲ፡ «ታና ሲቋያ ኦኒኔ ታ ቃላ ናጌ፤ ታ አቡ አ ሲቃናዋ፤ ቃሲ ታ አቡኔ ታኒኔ አኮ ዪዳ፡ አናና ደዓና። 24 ታና ሲቋና ኡሪይ ኦኒኔ ታ ቃላው አዛዙቴና፤ ሂንቴንቱ ሲሲያ ቃላይ ታና ኪቴዳ አዉዋፔ አቲን፡ ታዋ ጊዶና።

25 «ታኒ ሂንቴናና ኢቲፔ ደዓዳ ሃዋ ሂንቴንቱሲ ኦዳዲ፤ 26 ሺን ጌሻ አያናይ፡ ሜንሌሊያዋ፡ አዉ ታ ሱንላን ኪታናዋ፡ ሂንቴንታ ኡባባ ታማሪሳናዋ። ታኒ ሂንቴንቱሲ ኦዳዳ ኡባባካ ሂንቴንታ ሃሳዪሳናዋ።

27 «ታኒ ሳርቴላ ሂንቴናና ዋላይ፤ ታ ሳርቴላ ሂንቴንቱሲ አሚይ። ታኒ አላሚ አሚያ ሳርቴላ ማላ አሚከ። ሂንቴንቱ ሂርሳፒቴኔ ያዮፒቴ። 28 ታኒ ሂንቴንቱሲ፡ ታኒ ባይ፤ ሺን ሲማዳ ሂንቴንቱኮ ያና፡ ጌዳዋ ሲሴዲታ፤ ሂንቴንቱ ታና ሲቋዳዋ ጊዲንቶ፡ ታፔ አዉ ዳሪያ ዲራው፡ ታኒ አዉዋኮ ቢያዋን ሂንቴንቱ ናሺታኒታ። 29 ሄዌ ሃኒያ ዋይ ሂንቴንቱ አማናና ማላ፡ ሄዌ ሃኔናን ደዒሺን፡ ሃናና ካሴታዳ ታኒ ሂንቴንቱሲ ኦዳዲ።

30 «ሃ አላሚያ ሞዲያዌ ዪያ ዲራው፡ ታኒ ሃዋፔ ሲንላን ሂንቴናና ሎይላ ሃሳዪኬ። ታና ኢ አይኔ ኦላናው ዳንዳዩና። 31 ሺን



ታሲ አዉዋ ሲቁያዋ አላሚ ኤራናው ቤሴ፤ ቃሲ ታሲካ አዉ ታና አዛዜዳዋዳን ኦላይ። ዴንዲ ኤቁቲ፤ ሃዋፔ ቦይቲ።

# 15

ዎዪኒያ ገያ ቱራው ቱሙ እኑ ዬሱሳ

1 «ታሲ ዎዪኒያ ገቲቲያ ቱራው ቱሙ አኖ፤ ጎሻንቻይ ታ አባ።  
2 ታ ገደን ዴኒያ አይፊያ አይፊና ቱራ ማራ ኡባ ኢ ካሪ፤ አይፊያ ቱራ ማራ ኡባይ ካሲዋፔ ሎይሊ አይፋናዳን፤ ሄ ማራ ዪራ ኢ ጪጊዴ ገሻና። 3 ታሲ ሂንቴንቲሲ ሃሲ ኦዴዳ ቃላ ጋሱዋን፤ ሂንቴንቲ ገሻ። 4 ታ ገደን ዴኒያ፤ ታሲካ ሂንቴንቲ ገደን ዴኒያ። ዎዪኒያ ቱራ ማራይ እኑዋና እቲፔ ዴዔናን ጳዮፔ፤ ሄ ማራይ ባሪካ አይፊያ አይፋናው ዳንዳዬናዋዳን፤ ሂንቴንቲካ ታ ገደን ዴኒያን ጳዮፔ፤ አይፊያ አይፋናው ዳንዳዪኪታ።

5 «ታሲ ዎዪኒያ ቱራው አኖ፤ ሂንቴንቲ ሄ ቱራ ማራቱዋ። ታ ገደን ዴኒያ ኡራይ፤ ታሲካ አ ገደን ዴኒያ ኡራይ፤ ዳር አይፊያ አይፋና፤ አዪሲ ጎፔ፤ ታሲ ባይናን ሂንቴሬካ አይኔ ኦላናው ዳንዳዪኪታ። 6 ታ ገደን ዴኒያ ኡራይ ቱራ ማራዳን፤ ካሪን ዬገና ሜሌዳዋ ሺሺዴ ታማን ዎሊና፤ ኢ ኤፃናዋ። 7 ሂንቴንቲ ታ ገደን ዴኒያ፤ ቃሲ ታ ቃላይካ ሂንቴንቲ ገደን ዴኒያ፤ ሂንቴንቲ ኮዬዳዋ አያ ገደናካ ዎሲቲ፤ ሂንቴንቲ አካሲታ። 8 ሂንቴንቲ ዳር አይፊያ አይፎፔኔ ቃሲ ታና ካሊያዋንታ ገደፔ፤ ሄዋን ታ አቡ ቦንቼታናዋ። 9 አዉ ታና ሲቁዳዋዳን፤ ታሲካ ሂንቴንታ ሲቃዲ፤ ታ ሲቁዋን ዴኒያ። 10 ታሲ ታ አቡ አዛዙዋ ናጋዴ አ ሲቁዋን ዴዔዳዋዳን፤ ሂንቴንቲካ ታ አዛዙዋ ናጎፔ፤ ታ ሲቁዋን ዴዒኒታ።

11 «ታ ናሼቻይ ሂንቴናና ዴዒና ማላኔ፤ ሂንቴንቲ ናሼቻይ ኩሚንላ ገደና ማላ፤ ታሲ ሃዋ ሂንቴንቲሲ ኦዳዲ። 12 ታ አዛዙ ሃዋ፤ ታሲ ሂንቴንታ ሲቁያዋዳን፤ ሂንቴንቲካ እቲ አቲዋና ሲቁቲቲ። 13 ባሪ ሸምፑዋ ባሪ ላጌው አሊዴ አሚያዋፔ አዲያ ሲቁ አሲኔካ ባዋ። 14 ታሲ ሂንቴንታ አዛዜዳዋ ኡባ ኦሎፔ፤ ሂንቴንቲ ታ ላጌቱዋ።

15 «አይሊ ባሪ ጎዳይ ኦሊያዋ ኤሪና ዲራው፤ ታሲ ሂንቴንታ ሃዋፔ ሰንላው አይላቱዋ ገሴ፤ ሺን ታሲ ሂንቴንታ ታ ላጌቱዋ ጋዲ። አዪሲ ጎፔ፤ ታ አዉዋፔ ሲሴዳ ኡባባ ታሲ ሂንቴንቲሲ ኦዳዲ። 16 ታሲ ሂንቴንታ ደራዳዋፔ እቲን፤ ሂንቴንቲ ታና ደሪቤይኪታ። ሂንቴንቲ ቢዴ አይፊያ አይፋና ማላኔ ዴኒያ ማላ፤ ታሲ ሂንቴንታ ሱንላዲ። ቃሲ አዉካ ሂንቴንቲ ታ ሱንላን \*

\* 15:16 ታ ሱንላን፡ ዎይ «ታና ካሊያዋንታ ገዲያ ዲራው»

ዎሴዳዎ ኡባ ኢማና። 17 ታኒ ሂንቴንታ ኣዛዚያዌ ሃዋ፤ ኢቱ ኢቱዋና ሲቄቲቱ።

**ዬሱሲ ሃ ኣላሚ ኢዲያዎ ኦዴዳ**

18 «ኣላሚ ሂንቴንታ ኢያ፡ ካሴቲዳ ታና ኢዲያዎ ኣኩኪቱ።  
19 ሂንቴንቱ ኣላሚያሳ ጊዴዴንቶ፡ ኣላሚ ባሬዋዳን ሂንቴንታ ሲቃና፤ ሺን ታኒ ሂንቴንታ ኣላሚያ፡ ዶሬዳዋ፡ ኣቲን፡ ሂንቴንቱ ኣላሚያሳ ጊዴኪታ፤ ኣላሚ ሂንቴንታ ኢዲያዎ ሃዋሳ። 20 ኣይሊ ባሬ ገዳ፡ ዳሬና፡ ጋዴ ታኒ ሂንቴንቱሲ ኦዴዳዎ ሃሳዩቱ። ኡንቴንቱ ታና ዬዳርሴዳዎ ጊዶ፡ ሂንቴናካ ዬዳርሳና። ኡንቴንቱ ታ ቃላ ናጌዳዎ ጊዶ፡ ሂንቴንቱ ቃላካ ናጋናዋንታ። 21 ሺን ኡንቴንቱ ታና ኪቲዳዎ ኤሬና ዲራው፡ ሃ ኡባ ታ ጋሱዋን ኡንቴንቱ ሂንቴንቱ ቦላ ኣላናዋንታ። 22 ታኒ ያዴ ኡንቴንቱሲ ኦዴናዎ ጊዲንቶ፡ ኡንቴንቱሲ ናጋራ ጊዳና፤ ሺን ሃዲ ኡንቴንቱ ኦሲያ ናጋራ ጋሶዲያዎ ባዋ። 23-24 ታና ኢዲያዎ ታ ኣወዋካ ኢዲያ። ኦኒኔ ኦሲቤና ኦሱዋ ኡንቴንቱ ጊዶን ታኒ ኦሲቤና ባ ጊዲንቶ፡ ኡንቴንቱሲ ናጋራ ጊዳናን ኣታናዎ፤ ሺን ሃዲ ኡንቴንቱ ታኒ ኦሲዳ ኦሱዋ ቤዲዴ፡ ታናካ ታ ኣወዋካ ኢዲያና። 25 ሺን ኡንቴንቱ ሂጊያን፡ ታና ጮ ኢዲያና፡ ጌቲቲዴ ፃፊቲዳዎ ፖሌታና ማላ፡ ሃዋ ሃኔዳ።

26 «ሺን ኣወዋ፡ ዩያ ቱማቲላ ኣያናይ ሜንሌሊያዊ ያናዎ። ታኒ ኣወዋ፡ ሂንቴንቱሲ ኣ ዬዳና፤ ቃሲ ኢ ታባ ማርካታናዎ።  
27 ሂንቴንቱ ቃሲ ካሴ፡ ዶሚዴ፡ ታናና ዴዲያ ዲራው፡ ታባ ማርካታና።

# 16

1 «ታኒ ሃዋ ሂንቴንቱ ቆቤቲና ማላ፡ ሂንቴንቱሲ ኦዴዲ።  
2 ኡንቴንቱ ሂንቴንታ ባሬንቱ ኣዩሁዳ ዋሳ ጎሊያ፡ ኩሲ ዬዳናዋንታ። ሂዋ ቦላ ቃሲ ሂንቴንታ ዋዲያ ኡራይ ያሳው ኦሲያዎ ኣው ማላቲያ ዋዲ ያናዎ። 3 ኡንቴንቱ ሂዋ ሂንቴንቱ ቦላ ኦሲያዎ ታናኔ ኣወዋ ኤሬና ዲራሳ። 4 ሺን ኡንቴንቱ ሂዋ ሂንቴንቱ ቦላ ኦሲያ ዋዲ ጋኪያ ዋዴ፡ ታኒ ሂንቴንቱሲ ኦዴዳዎ ሂንቴንቱ ሃሳያና ማላ፡ ታኒ ሂንቴንቱሲ ሃዋ ኦዴዲ።

**ጌሻ ኣያና ኦሱዋ**

«ታኒ ሂንቴናና ዴዲያ ዲራው፡ ኮይሮ ሂዋ ሂንቴንቱሲ ኦዴቤይኬ። 5 ሺን ሃዲ ታኒ ታና ኪቲዳዋኮ ባይ፤ ሺን ሂንቴ፡ ኦኒኔ፡ «ሃቃ ባይ?» ጊዴ ታና ኦቲያዎ ባዋ። 6 ሺን ታኒ ሃዋ

---

15:25 ማዝ 35:19፤ 69:4

ኦዲ ዲራው፡ ሂንቴንቱ ዋዛናን ዳር ካዩ ዳዔ። 7 ሺን ታኒ ሂንቴንቱሲ ቱሙዋ ኦዲይ፤ ታኒ ቢያዌ ሂንቴንቱሲ ሎዓ። አዪሲ ጎፔ፡ ታኒ ባና ጳዮፔ፡ ሜንጮሊያዌ ሂንቴንቱሮ ዬና፤ ሺን ታኒ ቦፔ፡ ኣ ሂንቴንቱሮ ዬዳና። 8 ቃሲ ሜንጮሊያዌ ዪዳ፡ ኡንቴንቱ ናጋራባ፡ ያሳ ያሎቴላባኔ ፒርዳባ ሃ ሳዓ አሳይ ባዪዜዳዋ ቤሳናዋ። 9 ናጋራባይ አሳይ ታና አማኔና ዲራሳ። 10 ያሎቴላባይ ቃሲ ታኒ አዉዋሮ ቢያ ዲራው፡ ሂንቴንቱ ታና ላዒንሱዋ ቤዒኪታ። 11 ያሳ ፒርዳባይ ቃሲ አላሚያ ሞዲያዌ ፒርዳቴዳ ዲራሳ።

12 «ታኒ ሂንቴንቱሲ ኦዲያባይ ዳርባይ ዳዔ፤ ሺን ሃዒ ሂንቴንቱሲ ጌሌና። 13 ቱማቴላ ኣያናይ ዪያ ዋዳ፡ ሂንቴንታ ቱማቴላ ኡባኮ ካሌላናዋ። አዪሲ ጎፔ፡ ኢ ባሬ ሲሴዳዋ ኦዳናፔ አቲን፡ ባሬፔ አይኔ ኦዳና። ቃሲ ሲንሳፔ ያናባ ሂንቴንቱሲ ኢ ኦዳናዋ። 14 ኢ ታና ቦንቻናዋ፤ አዪሲ ጎፔ፡ ኢ ታው ዳዒያዋፔ አኪዳ፡ ሂንቴንቱሲ ኦዳናዋ። 15 አዋ ዳዒያባይ ኡባይ ታዋ፤ ሜንጮሊያዌ ታው ዳዒያባፔ አኪዳ፡ ሂንቴንቱሲ ኦዳናዋ ታኒ ጌዳዌ ሃዋሳ።

**ዬሱሳ ካሊያዋንቱ ካዩ ናሼቻው ላሚታና**

16 «ጉላ ዋዲያፔ ጉዪያን፡ ሂንቴንቱ ታና ቤዒኪታ፤ ቃሲ ጉላ ዋዲያፔ ጉዪያን፡ ሂንቴንቱ ታና ቤዓና» ያጌዳ።

17 ዬሱሳ ካሊያዋንቱፔ አቱ አቱ ባሬንቱ ጊደን፡ « ጉላ ዋዲያፔ ጉዪያን፡ ሂንቴንቱ ታና ቤዒኪታ፤ ቃሲ ጉላ ዋዲያፔ ጉዪያን፡ ሂንቴንቱ ታና ቤዒኪታ፤ አዪሲ ጎፔ፡ ታኒ አዉዋሮ ባይ) ጊያዌ ሄዌ ዋጊያዌ?» ያጌዲኖ። 18 « ጉላ ዋዲያፔ ጉዪያን) ጊያዌ ዋጊያዌ? ኢ አዪሲ ሃሳዪንቶኔ ኑሲ ኤሬቴና» ያጌዲኖ።

19 ኡንቴንቱ ባሬና ኦቻናው ኮዪያዋ ዬሱሲ ኤሬዳ፡ ኡንቴንታ ያጌዳ፤ «ታኒ፡ ጉላ ዋዲያፔ ጉዪያን፡ ሂንቴንቱ ታና ቤዒኪታ፤ ቃሲ ጉላ ዋዲያፔ ጉዪያን፡ ሂንቴንቱ ታና ቤዓና) ጌዳዋ ሂንቴንቱ አቱ አቱዋ ኦቺቴ? 20 ታኒ ሂንቴንቱሲ ቱሙዋ ኦዲይ። ሂንቴንቱ ዬዛናኔ ካዮታና፤ ሺን ሃ አላሚ ናሼታና። ቃሲ ሂንቴንቱ ካዮታና፤ ሺን ሂንቴንቱ ካዮቶዌ ናሼቻ ጊዳናዋ። 21 አቲ ሚሺራታ ናዓ ዬላና ሃኒያ ዋዳ፡ ባሬ ዬሊያ ዋዲ ጋኬዳ ዲራው፡ ኦይቄታው፤ ሺን ናዓይ ዬሌቴዳዋፔ ጉዪያን፡ ናዓይ ሃ ሳዓን ዬሌቴዳ ናሼቻ ዲራው፡ ባሬ ኦይላ ሃሳዪኩ። 22 ሄዋ ዲራው፡ ሂንቴንቱካ ሂንቴንቱ ዋዛናን ካዮቲታ፤ ሺን ታኒ ላዒንሱዋ ሂንቴንታ ቤዓና፤ ቃሲ ሂንቴንቱ ዋዛናይ ሎይሊ ናሼታና፤ ሂንቴንቱ ናሼቻ ኦኒኔ ሂንቴፔ አከና።

23 «ሄ ጋላሲ ሂንቴንቱ ታና አይኔ ዋሲኪታ። ታኒ ሂንቴንቱሲ ቱሙዋ ኦዳይ፤ ሂንቴንቱ ታ ሱንሳን ዋሲያዋ ኡባ አዉ ሂንቴንቱሲ ኢማናዋ። 24 ሃዒ ጋካናሲ ታ ሱንሳን አይኔ ዋሲቤይኪታ፤ ሂንቴንቱ ናሼቻይ ፖሌታና ማላ፣ ያሳ ዋሲቴ፤ ሂንቴንቱ አካና።

25 «ሃዋ ታኒ ሂንቴንቱሲ ለሚሱዋን ኦዳዲ፤ ሺን ታኒ ለሚሱዋን ኦዳና ዋዲ ያናዋ፤ ሺን አዉዋባ ታኒ ሂንቴንቱሲ ቆንጪያን ኦዳና። 26 ታኒ ሄ ጋላሲ፣ ሂንቴንቱ ታ ሱንሳን አዉዋ ዋሳና፤ ቃሲ ሂንቴንቱ ዲራው፣ ታኒ አዉዋ ዋሳና ጊኬ። 27 አዪሲ ጎፔ፣ አዉ ባሬ ሁጵው ሂንቴንታ ሲቄ፤ ሂንቴንቱ ታና ሲቄያ ዲራውኔ ታኒ አዉዋ ማታፔ ዬዳዋ አማና ዲራው፣ ኢ ሂንቴንታ ሲቄ። 28 ታኒ አዉዋ ማታፔ ሃ አላሚያ ያዲ፤ ቃሲ ሃ አላሚያ አጋዴ አዉዋኮ ባና» ያጌዳ።

29 ዬሱሳ ካሊያዋንቱ ዛሪዴ ዬሱሳ፣ «ቤዓ፣ ሃዒ ኔኒ ቆንጪያን ሃሳያሳ፤ ለሚሱዋን አይኔ ሃሳያካ። 30 ኔኒ ኡባባ ኤሪያዋ ኩኒ ሃዒ ኤሪቶ፤ ቃሲ ኔና ኦኒኔ ኦቻና ማላ፣ ኔኒ ኮዬናዋ ኤሪቶ። ሃዌ ኩና ኔኒ ያሳፔ ዬዳዋ አማንሌ» ያጌዲኖ።

31 ዬሱሳ ዛሪዴ ኡንቱንታ፣ «ሃዒ አማኒቴ? 32 ቤዒቴ፣ ሂንቴንቱ ሂንቴንቱ ጎሌ ጎሌ ላሌቲያ ዋዲኔ ታ ፃላላ ዬጊ ባሺያ ዋዲ ያናዋ፤ ሃዒካ ዬዲጌዳ። ሺን አዉ ታናና ዴዒያ ዲራው፣ ታ ፃላላ ጊዲኬ። 33 ሂንቴንቱ ታ ጊደን ዴዒዴ፣ ሳሮ ዴዒና ማላ፣ ታኒ ሃዋ ሂንቴንቱሲ ኦዳዲ። አላሚያን ሂንቴንቱ ዋዬታና። ሺን ሚኒቴ፤ ታኒ አላሚያ ያናዲ» ያጌዳ።

# 17

## ዬሱሳ ዋሳ

1 ዬሱሲ ሄዋ ሃሳዬዳዋፔ ጉዩያን፣ ፑዴ ሳሉዋ ያሊዴ፣ ሃዋዳን ያጌዳ፤ «ታ አቦ፣ ዋዲ ጋኬዳ፤ ኔ ናዒይ ኔና ቦንቻና ማላ፣ ኔኒካ ኔ ናዒ ቦንቻ። 2 አዪሲ ጎፔ፣ ኔኒ አው አሜዳ ኡባው ሜጲና ዴዐዋ ኢ ኢማና ማላ፣ አሳ ኡባ ቦላን አው ማታ ኢማዳ። 3 አሳይ ኔና አቲ ቱሙ ያሳ ጊዴዳዋ ኤራና ማላኔ፣ ቃሲ ኔኒ ኪቴዳ ዬሱሲ ኪሪሰቶሳ ኤራና ማላ፣ ሃዌ ሜጲና ዴዐዋ። 4 ኔኒ ታው ኦላናው አሜዳ ኡሱዋ ፖላዴ፣ ኔና ሳዒን ቦንቻዲ። 5 ሃዒካ ቃሲ አዎ፣ አላሚ ሜጴታናፔ ካሴ ኔ ማታን ታው ዴዒያ ቦንቹዋን ኔ ሲንሳን ታና ቦንቻ።

6 «አላሚያ አሳፔ ኔኒ ታው አሜዳዋንቶ ኔ ሱንሳ ኤሪሳዲ፤ ኡንቱንቱ ኔዋንታ፤ ቃሲ ኔኒ ኡንቱንታ ታው አማዳ። ኡንቱንቱ ኔ ቃላዉካ አዛዜቴዲኖ። 7 ሃዒ ኔኒ ታው አሜዳ ኡባባይ ኔፔ

ዬዳዋ ከንቱንቱ ኤሪኖ። 8 አዪሲ ጎፔ፣ ኔኒ ታው ኢሜዳ ቃላ ታኒ ከንቱንቱሲ ኢማዲ፤ ከንቱንቱካ ሄ ቃላ አኬዲኖ። ታኒ ኔ ማታፔ ዬዳዋ ቱማ ጊዲያዋ ኤሪዴ ኔኒ ታና ከቱዳዋካ አማኔዲኖ።

9 «ታኒ ከንቱንቱሲ ዋሳይ፤ አላሚው ኔና ዋሲኬ። ሺን ኔኒ ታው ኢሜዳ አሳው ዋሳይ፤ አዪሲ ጎፔ፣ ከንቱንቱ ኔዋንታ። 10 ታው ዳዒያ ኡባባይ ኔባ፤ ቃሲ ኔው ዳዒያ ኡባባይካ ታባ። ታኒ ከንቱንቱ ባጋና ቦንቼታዲ። 11 ታኒ ሃዋፔ ጉዪያን፣ አላሚያን ዳዒኬ፤ ከንቱንቱ አላሚያን ዳዒኖ፤ ታኒ ሃዒ ኔኮ ባይ። ገሻ አዎ፣ ሃ ኔኒ ታው ኢሜዳዋንቱ ኔኒኔ ታኒ ኢቱዋ ጊዲያዋዲን፣ ከንቱንቱ ኢቱዋ ጊዳና ማላ፣ ከንቱንታ ኔ ሱንላን ናጋ። 12 ታኒ ከንቱንቱና አላሚያን ዳዒዳ፣ ኔኒ ታው ኢሜዳ ኔ ሱንላ ዋልቃን ከንቱንታ ናጋዲ። ታኒ ከንቱንታ ናጋዲ፤ ፆሳ ማፃፋይ ጌዳዌ ፖሌታና ማላ፣ ባሻይ ቤሲያ ኡራፔ አቲን፣ ከንቱንቱፔ ሃራይ ኦኒኔ ባይቤና።

13 «ሃዒ ታኒ ኔኮ ባይ፤ ከንቱንቱ ዋዛናን ታ ናሼቻይ ፖሌታና ማላ፣ ሃዋ ታኒ አላሚያን ሃሳያይ። 14 ታኒ ከንቱንቱሲ ኔ ቃላ ኢማዲ፤ ታኒ አላሚያሳ ጊዳናዋዲን፣ ከንቱንቱካ አላሚያሳ ጊዳና ዲራው። አላሚ ከንቱንታ ኢፆዳ። 15 ኔኒ ፃላሂያፔ ከንቱንታ ናጋና ማላ ዋሲያዋፔ አቲን፣ አላሚያፔ ከሳና ማላ ዋሲኬ። 16 ታኒ አላሚያሳ ጊዳናዋዲን፣ ከንቱንቱካ አላሚያሳ ጊዲከና። 17 ኔኒ ቱማቱላን ከንቱንታ ኔዋንታ ኦላ፤ ኔ ቃላይካ ቱማቱላ። 18 ኔኒ ታና አላሚያ ከቱዳዋዲን፣ ታኒካ ከንቱንታ አላሚያ ከታዲ፤ 19 ቃሲ ከንቱንቱ ቱማቱላን ኔው ዲማታና ማላ፣ ከንቱንቱ ዲራው፣ ታኒ ታ ሁጲያ ኔው ዲማያዲ።

20 «ታኒ ከንቱንቱ ፃላላው ዋሲኬ፤ ሺን ከንቱንቱ ቃላ ኦዲና፣ ታና አማኔዳዋንቱካ ዋሳይ። 21 ከንቱንቱ ኡባይ ኢቱዋ ጊዳና ማላ፣ ታኒ ዋሳይ። አዎ፣ ኔኒ ታ ጊደን ዳዒያዋዲን፣ ቃሲ ታኒካ ኔ ጊደን ዳዒያዋዲን፣ ከንቱንቱ ኑ ጊደን ዳዒኖ። ቃሲ ኔኒ ታና ከቱዳዋ አላሚ አማናና ማላ፣ ከንቱንቱ ኢቱዋ ጊዲኖ። 22 ኔኒኔ ታኒ ኢቱዋ ጊዲያዋዲን፣ ከንቱንቱ ኢቱዋ ጊዳና ማላ፣ ኔኒ ታና ቦንቼዳዋዲን፣ ታኒካ ከንቱንታ ቦንቻዲ። 23 ታኒ ከንቱንቱ ጊደን ዳዒና፣ ኔኒ ታ ጊደን ዳዒና፣ ቃሲ ኔኒ ታና ሲቁያዋዲን፣ ከንቱንታካ ሲቆዋኔ ኔኒ ታና ሃ አላሚያ ከቱዳዋ አላሚ ኤራናዲን፣ ከንቱንቱ ኡባ ኢቱዋ ጊዲኖ።

24 «አዎ፣ ሳዒይ ሜጴታናፔ ካሴ ኔኒ ታና ሲቁዳ ዲራው፣ ታው ኢሜዳ ታ ቦንቼዋ ከንቱንቱ ቤዓና ማላ፣ ኔኒ ታው ኢሜዳዋንቱ ታኒ ዳዒያ ሳዒን ታናና ዳዒና ማላ ኮያዲ።

25 «ዲሎ አዎ፣ አላሚያ አሳይ ኔና ኤሪና፤ ሺን ታኒ ኔና ኤሪያ። ቃሲ ኔኒ ታና ኪቱዳዎ ሃዋንቱ ኤሪኖ። 26 ኔኒ ታና ሲቁዳ ሲቁ ኡንቱንቱ ጊደን ደዓና ማላ፣ ቃሲ ታኒካ ኡንቱንቱ ጊደን ደዓና ማላ፣ ታኒ ኔ ሱንሳ ኡንቱንታ ኤሪሳዲ፤ ሲንሳዉካ ኤሪሳና» ያጌዳ።

# 18

ዩሱሲ ባሬ ሞርኬቱዎ ኩሺያን ኦይቄቲዳ  
(ማጥ 26:47-56፤ ማር 14:43-50፤ ሉቅ 22:47-53)

1 ዩሱሲ ሄዋ ጊዳ፣ ያሳ ዎሴዳዎፔ ጉዩያን፣ ባሬና ካሊያዎንቱና ቄዲሮና ጊያ ዛንጋራ ፒኔዳ። ሄ ሳዓን ኣቲኪልቲያ ሳዓይ ደዔ፤ ዩሱሲኔ ዩሱሳ ካሊያዎንቱ ጌሌዲኖ። 2 ዩሱሳ አሊ ኢሜዳ ዩሁዳይ ሄ ሳዓ ኤሪዳ፤ አዩሲ ጎፔ፣ ዩሱሲ ኡባ ዎዴ ባሬና ካሊያዎንቱና ሄዋን ሺቄ። 3 ሄዋ ዲራው፣ ካሌሊያ ቄሳቱዎ ካፓቱኔ ፓሪሳዎቱ ዩሁዳና ባናዳን ኢሜዳ ሮማ ዎታዳራቱኔ ጌሻ ጎሊያ ናጊያዎንቱ ኩራዚያ፣ ያቢያኔ ቶራ ኦይቄዴ ሄ ሳዓ ቤዲኖ።

4 ዩሱሲ ባሬና ጋካናው ሃኒያ ኡባባ ኤሪዴ፣ ጋዖ ኬሲዴ፣ «ኦና ኮዩቲ?» ያጌዳ

5 ኡንቱንቱ ዛሬዴ፣ «ናዚሬቲያ ዩሱሳ ኮዩቶ» ያጌዲኖ።

ዩሱሲ ዛሬዴ፣ «ታኒ ኣ» ያጌዳ።

ዩሱሳ አሊ ኢሜዳ ዩሁዳይካ ሄዋን ኡንቱንቱና ኤቄዳ፤

6 ዩሱሲ፣ «ታኒ ኣ» ጌዳ ዎዴ፣ ኡንቱንቱ ጉዩኮ ሺቄዴ፣ ሳዓን ኩንዴዲኖ። 7 ዩሱሲ ቃሲካ፣ «ኦና ኮዩቲ?»

ያጊ ኦቲና ኡንቱንቱ፣ «ናዚሬቲያ ዩሱሳ» ያጌዲኖ።

8 ዩሱሲ ዛሬዴ፣ «ታኒ ኣ ጊዲያዎ ሂንቱንቱሲ ኦዳዲ፤ ሲሚ ሂንቱንቱ ታና ኮዩያዎ ጊደፔ፣ ሃዋንታ ዩዲቲ» ያጌዳ። 9 ኢ፣ «ታ ኣቦ፣ ኔኒ ታው ኢሜዳዎንቱፔ ሃራይ ኣቶ፣ ኢቱዋካ ባዩዛቤይኬ» ጌዳዎ ፖሌታና ማላ፣ ሄዋ ጌዳ።

10 ሲሞኒ ጳዒሮሳው ማሻይ ደዔ፤ ኢ ሄ ማሻ ሸዲኔ ቄሳቱዎ ኡባቱዎ ካፑዎ ቆማ ኡሺቻ ሃይላ ሸጪዴ፣ ቃንዒ ዩጌዳ። ሄ ቆማ ሱንሳይ ማልኮሳ። 11 ዩሱሲ ጳዒሮሳ፣ «ኔ ማሻ ሸኩዋን ዛራዴ ዎላ! ታ ኣቡ ታው ኢሜዳ ሜቱዎ ፀዓ ታኒ ኡሺኪታ?» ያጌዳ።

ዩሱሲ ቄሳቱዎ ካፑዎ ሃና ሲንሳ ሺቄዳ

12 ሻላቃይ፣ ዳሮ ዎታዳራቱኔ ቃሲ ጌሻ ጎሊያ ናጊያዎንቱ ዩሱሳ ኦይቄዴ ቃቼዲኖ። 13 ኮይሮ ዩሱሳ ሃናኮ ኣፌዲኖ፤ ሃኒ ሄ ላይሊ ቄሳቱዎ ካፓቱዎ ጊዴዳ ቃያፋ ቦሉዎ። 14 «ኣሳ ኡባ ዲራው፣ ኢቲ ኣሳይ ሃይቂንቶ ሎዓ» ጊዴ ኣዩሁዳቱዎ ዘሬዳዎ ቃያፋ።

ጳጳሮሴ ዩሱሳ ካዳዳ  
(ማጥ 26:69-70፤ ማር 14:66-68፤ ሉቃ 22:55-57)

15 ሲሞኒ ጳጳሮሴን ሃራ አቲ ካሊያዌ ዩሱሳ ካሊዳ ቤዲና። ሄ ሃራ ካሊያዌ ቁሳቱዋ ካፑ ኤሬዳ፤ ሄዌ ዩሱሳና ቁሳቱዋ ካፑዋ ዲርሳ ጋርሳ ጌሌዳ። 16 ሺን ጳጳሮሴ ካሬና ዲርሳ ፔንጊያን ኤቁዳ። ቁሳቱዋ ኡባቱዋ ካፑ ኤሬያ ሃራ ካሊያዌ ካሬ ኬሲዳ። ፔንጊያ ናጊያ ናቲው አዲዳ። ጳጳሮሳ ዲርሳ ጋርሳ ጌሊሴዳ። 17 ፔንጊያ ናጊያ ናታ ጳጳሮሳ። «ኔኒ ሃ ቢታኒያ ካሊያዋንቱፔ አቱዋ ጊዲኪዬ?» ያጋዲ።

አ። «ቱይቲ፣ ታኒ ጊዲኪ» ያጌዳ።

18 ሳዓይ ማጊያ ዲራው። አይላቱኔ ጌሻ ጎሊያ ናጊያዋንቱ ታማ ኤዲዳ። ቦንቁዳዋ ዩዩ አዲ ኤቁዳ ካሺኖ፤ ጳጳሮሲካ ኡንቱንቱና ኤቁዳ። ሄ ታማ ካሺ።

ቁሳቱዋ ካፑ ዩሱሳ ኦቾ ኦሻ  
(ማጥ 26:59-66፤ ማር 14:55-64፤ ሉቃ 22:66-71)

19 ቁሳቱዋ ኡባቱዋ ካፑ፣ ዩሱሳ ካሊያዋንቱባኔ አ ቲሚርቲያባ አቸዳ። 20 ዩሱሲ አው ዛሬዳ። «ታኒ አሳ ኡባው ቆንጨያን ኦዳዳ። ታኒ አዩሁዳ ኡባይ ሸቁያ አዩሁዳ ዋሳ ጎሊኔኔ ጌሻ ጎሊያን ኡባ ዋዳ ታማሪሳዲ፤ ጌማን አዩኔ ሃሳያቤይኬ። 21 ያቲና። ኔኒ ታና አዩሲ አቻይ? ታኒ ኦዳዳዋ ሲሴዳ አሳ አቻ፤ ሄ አሳይ ታኒ ኦዳዳዋ ኤሬዳ» ያጌዳ።

22 ዩሱሲ ሄዋ ጌዳ ዋዳ። ሄዋን ኤቁዳ ዋታዲራቱዋፔ አቱ ዩሱሳ ባቂዳ። «ቁሳቱዋ ኡባቱዋ ካፑዋ ቦላ ሃዋዳን ዛሬይ?» ያጌዳ።

23 ዩሱሲ ዛሬዳ። «ታኒ ባላባ ሃሳዬዳዋ ጊደፔ፣ ሃዋን ዳዒያ አሳ ኡባው ኦዳ፤ ሺን ታኒ ቱሙዋ ሃሳዬዳዋ ጊደፔ፣ ታና አዩሲ ባቃይ?» ያጌዳ።

24 ሄዋ ዲራው። ሃኒ፣ ቃሼቲ ኡቱዳ ዩሱሳ፣ ቁሳቱዋ ኡባቱዋ ካፑዋ፣ ቃያፋኮ ዩዳዳ።

ጳጳሮሲ ዩሱሳ ላዒንሉዋ ካዳዳ  
(ማጥ 26:71-75፤ ማር 14:69-72፤ ሉቃ 22:58-62)

25 ጳጳሮሲ ሄዋን ኤቁዳ፣ ታማ ካሺ፤ ሃራንቱ አ። «ኔኒ ሃ ቢታኒያ ካሊያዋንቱፔ አቱዋ ጊዲኪዬ?» ያጌዳ።

ጳጳሮሴ። «ቱይቲ፣ ታኒ ጊዲኪ» ያጊዳ ካዳዳ።

26 ቄሳቱዋ ኡባቱዋ ካፑዋ ቆማቱዋ፤ ኢቱዋ፡ ጳጳሮሴ ሃይላ ቃንጭዳ ቢታኒያ ዳቡ ጳጳሮሳ፡ «ታኒ ኔና ኣናና ዳሮ ኣታኪልቲያ ጊድን ቤዓቤይኪታዬ?» ያጊዳ ኦቹዳ።

27 ጳጳሮሴ ቃሲካ ካዴዳ፤ ኤሌካ ኩቱ ዋሲ ኣጌዳ።

**ዬሱሲ ጲላዖሳ ሲንላ ሸቄዳ**

(ማጥ 27:1-2፣ 11-14፤ ማር 15:1-5፤ ሉቅ 23:1-5)

28 ኡንቱንቱ ዬሱሳ ቃያፋ ጎሌፔ ሮሜ ኣሳ ኣዪሲያዋ ኦሶ ጎሊያ ኣፌዲኖ። ሳዓይ ዋንታ ጉራ፤ ኣዪሁዳቱ ፓሲጋ ቦንቲያ ጋላሳ ቁማ ማናው፡ ባሪንቱ ሁጲያሲ ቱኔና ማላ፡ ሮሜ ኣሳ ኣዪሲያዋ ኦሶ ጎሊያ ጌሊቤይኪኖ። 29 ሄዋ ዲራው፡ ጲላዖሲ ኡንቱንቱኮ ካሬ ኬሲዳ፡ «ሃ ቢታኒያ ሂንቱንቱ ኣያኒ ሞቲቱ?» ያጌዳ።

30 ኡንቱንቱ፡ «ኢ ኢታባ ኦሲቤናዋ ጊዲንቶ፡ ኑኒ ኣ ኔኮ ኣሆኮ» ያጌዲኖ።

31 ጲላዖሲ ዛሪዳ ኡንቱንቱሲ፡ «ሂንቱንቱ ኣ ኣፊዳ፡ ሂንቱንቱ ሂጊ ጊያዋዳን፡ ኣ ቦላ ፒርዲቱ» ያጌዳ።

ኣዪሁዳቱ፡ «ኦና ነ ዋጺያ ማታይ ኑሲ ባዋ» ያጌዲኖ። 32 ሃዊ ሃኔዳዊ ዬሱሲ ኣይ ማላ ሃይቁዋ ሃይቃኔንቶ ኤሪሳናው ሃሳዬዳዊ ፖሌታናሳ።

33 ጲላዖሲ ባሬ ኦሱዋ ጎሌ ላዔሉዋ ጌሊዳ፡ ዬሱሳ ጻሲዳ፡ «ኔኒ ኣዪሁዳ ካቱ?» ያጊዳ ኣ ኦቹዳ።

34 ዬሱሲ ጲላዖሳ፡ «ሃ ኦሻ ኔኒ ኔፔ ኦቻዪዬ ዋይ ሃራ ኣሳይ ኔው ታባ ኦዴዳ?» ያጌዳ።

35 ጲላዖሲ ዛሪዳ፡ «ታና ኣዪሁዳ ኣሳ ጋይ? ኔ ዛሬቱኔ ቄሳቱዋ ካፓቱ ኔና ታው ኣሊ ኢሜዲኖ፤ ኔኒ ኣያ ኦላዲ?» ያጌዳ።

36 ዬሱሲ፡ «ታ ካወቱላይ ሃ ኣላሚያና ጊዴና። ታ ካወቱላይ ሃ ኣላሚያና ጊዴዳንቶ፡ ታና ኣዪሁዳቶ ኣሊ ኢሜናዳን፡ ታው ኦሊያዋንቱ ታው ኦሌታና፤ ሺን ታ ካወቱላይ ሃ ኣላሚያና ጊዴና» ያጌዳ።

37 ሄዋ ዲራው፡ ጲላዖሲ ዬሱሳ፡ «ያቲና፡ ኔኒ ካቱዬ?» ያጊዳ ኦቹዳ።

ዬሱሲ ዛሪዳ፡ «ኔኒ ታና ካቲያ ጋዳ። ታኒ ቱማ ማርካታና ዲራው ዬሌታዲ፤ ቃሲ ሄዋ ዲራው፡ ሃ ኣላሚያ ያዲ። ቱሙዋ ባጋ ጊዴዳ ኦኒኔ ታኒ ጊያዋ ሲሴዳ» ያጌዳ።

38 ጲላዖሲ፡ «ቱሙ ኣዬ?» ያጌዳ።

ጲላዖሲ ሄዋ ጌዳዋፔ ጉዪያን፡ ኣዪሁዳቱዋኮ ካሬ ኬሲዳ፡ «ታኒ ኣኒ ኣይ ባላኔ ዳማቤይኬ። 39 ሺን ፓሲጋ ቦንቲያ ጋላሲ፡



ኢቲ አሳ ታኒ ሂንቲንቲሲ ቃሹዋፔ ቢሊያ ደያይ ዴዔ፤ ታኒ ሂንቲንቲሲ አዩሁዳቱ ካቲያ ቢሊያዋ ኮዩቲ?» ያጌዳ።

40 ኡንቲንቲ ዛሪዴ፣ ባሬንቲ ኮሻ ቶቄ ኡዲዴ፣ «ባርባና ቢላፔ አቲን፣ አ ጌዴና!» ያጌዲኖ። ሺን ባርባኒ ፓኑዋ።

# 19

ዎታዳራቱ ዩሱሳ ቦላ ቂሊጩዲኖ  
(ማጥ 27:27-32፤ ማር 15:15-21)

1 ሄዋፔ ጉዩያን፣ ጲላዖሲ ዩሱሳ ኦይቂዴ፣ ሊሱዋን ሾጩዳ።

2 ዎታዳራቱ አጉንሳፔ አኪሊሊያ ገገሲዴ፣ አ ሁጲያን ዋፊዲኖ፤ ቃሲ ዘዖ ማዩዋካ አ ማዩዜዲኖ። 3 አኮ ሸቂዴ፣ «አዩሁዳ ካቲው፣ ሸምቸዋ ጋሚሳ!» ያጌዴ አ ሻዩያ ባቂዲኖ።

4 ጲላዖሲ ቃሲካ ካሬ ኬሲዴ አዩሁዳቱዋ፣ «ቤዒቲ፣ ታኒ አኒ አይ ባላኔ ዴማቤናዋ ሂንቲንቲ ኤራና ማላ፣ አ ሂንቲንቲኮ ካሬ ኬሳና» ያጌዳ። 5 ሄዋፔ ጉዩያን፣ ዩሱሲ አጉንሳ አኪሊሊያ ባሬ ሁጲያን ዋፊዴ፣ ዘዖ ማዩዋ ማዩዴ፣ ካሬ ኬሴዳ፤ ጲላዖሲ አዩሁዳቱዋ፣ «ቢታኒያ ሃዋ ቤዒቲ» ያጌዳ።

6 ቂሳቱዋ ካፓቲኔ ዎታዳራቱ አ ቤዒዳ ዎዴ፣ ባሬንቲ ኮሻ ቶቄ ኡዲዴ፣ «ማሰቃሊያ ቦላ ሚሲማሪያን ጲሻዴ አ ሱላ! ሱላ!» ያጌዲኖ።

ጲላዖሲ ኡንቲንታ፣ «ሂንቲንቲ አ አፊዴ፣ ማሰቃሊያ ቦላ ሚሲማሪያን ጲሻዴ ሱሊቲ፤ አዩሲ ጎፔ፣ ታኒ አይ ባላኔ ዴማቤይኬ» ያጌዳ።

7 አዩሁዳቱ ዛሪዴ፣ «ኑሲ ሂጊ ዴዔ፤ ኑ ሂጊ ጊያዋዳን፣ ኢ ሃይቃናው ቤሴ፤ አዩሲ ጎፔ፣ ኢ ባሬና ያሳ ናዓ ኦፊዳ» ያጌዲኖ።

8 ጲላዖሲ ሄዋ ሲሴዳ ዎዴ፣ ካሴዋፔ ሎይሳ ያዩዳ። 9 ቃሲካ ጲላዖሲ ባሬ ኦሱዋ ጎሌ ሲሚ ጌሊዴ ዩሱሳ፣ «ኔኒ ሃቃፔ ያዲ?» ያጌዴ ኦቼዳ፤ ሺን ዩሱሲ አው አይኔ ዛሪቤና። 10 ሄዋ ዲራው፣ ጲላዖሲ አ፣ «ታው ኦዲኪ? ኔና ቢላናው ዎይ ማሰቃሊያ ቦላ ሚሲማሪያን ጲሻዴ ካቃናው ታው ማታይ ዴዲያዋ ኤሪከዩ?» ያጌዳ።

11 ዩሱሲ፣ «ያሳይ ኔው ቦላፔ ማታ ኢሚቤናባ ጊዲንቶ፣ ኔው ታ ቦላ ማታይ ዴዒና ሺን። ሄዋ ዲራው፣ ታና ኔው አሊ ኢሜዳዋ አጲያ ናጋራ ኦፊዳ» ያጌዳ።

ዩሱሳ ሃይቆ ፐርዴዲኖ  
(ማጥ 27:15-31፤ ማር 15:6-20፤ ሉቅ 23:13-25)

12 ጲላዎሲ ሄዋ ሲሴዳ ዎዴ፡ ዬሱሳ ቢላናው ኦጊያ ኮዬዳ፤ ሺን አዪሁዳቱ ባሬንቱ ኮሻ ጶቁ ኡዲዳ፡ «ኔኒ ኣ ቢሊያዎ ጊደፔ፡ ካቲያ ቁሳሬ ዳቦ ጊዳካ! ባሬና ካቲያ ጊያ ኦኒኔ ቁሳሬ ዋርኬ!» ያጌዲኖ።

13 ጲላዎሲ ሄዋ ሲሴዳ፡ ዬሱሳ ካሬ ኬሴዳ። ያተዴ ሹቻ ባሱዋ ጊያ ሳዓን ፒርዳ ኦይዲያን ኡቲዳ፤ ኢብራዩስዳ ቃላን ሄ ሳዓይ ጋይታ ጊያዎ። 14 ሄ ጋላሳይ ፓሲጋ ቦንቹያ ጋላሳው ጊሲያ ጋላሳ፤ ሳዓይ ኡሱቱን ሳቲያ ሄራ ጊዳናዎ። ጲላዎሲ አዪሁዳቱዎ፡ «ሂንቴንቱ ካቲያ ሃዋ ቤዒቲ!» ያጌዳ።

15 አዪሁዳቱ ባሬንቱ ኮሻ ጶቁ ኡዲዳ፡ «ዲጋ! ዲጋ! ማስቃሊያ ቦላ ሚሲማሪያን ጲሺዳ ሱላ!» ያጌዲኖ።

ጲላዎሲ ዛሬዳ፡ «ሂንቴንቱ ካቲያ ታኒ ማስቃሊያ ቦላ ሚሲማሪያን ጲሺዳ ሱሊያዎ ኮዩቲ?» ያጌዳ ኦቹዳ።

ቁሳቱዋ ካፓቱ፡ «ቁሳሬፔ ሃራ ካቲ ኦሲ ባዋ!» ያጌዲኖ።

16 ሄዋፔ ጉዩያን፡ ኡንቴንቱ ማስቃሊያ ቦላ ሚሲማሪያን ጲሺዳ፡ ዬሱሳ ካቃና ማላ፡ ጲላዎሲ ኡንቴንቱሲ አሏ አሜዳ።

**ዬሱሳ ሱሌዲኖ**

(ማጥ 27:32-44፤ ማር 15:21-32፤ ሉቅ 23:26-43)

ኡንቴንቱ ዬሱሳ ኦይቂዳ፡ አፌዲኖ። 17 ዬሱሲ ባሬ ማስቃሊያ ቶኪዳ፡ ጉጊያሳ ጌቴቲያሳ ቤዳ። «ጉጊያሳ» \* ጊያዌ ኢብራዩስዳ ቃላን «ጎልጎላ» ጊያዎ። 18 ኡንቴንቱ ሄ ሳዓን ማስቃሊያ ቦላ ሚሲማሪያን ጲሺዳ፡ ዬሱሳ ካቂዲኖ፤ ቃሲ አናና ሃራ ላዑ አሳቱ፡ ኢቱዋ ያ ባጋና ቃሲ ኢቱዋ ሃ ባጋና ዬሱሳ ጊዲዋን ዎሌዳ፡ ማስቃሊያ ቦላ ሚሲማሪያን ጲሺዳ ካቂዲኖ። 19 ጲላዎሲ ዓፋቲያ ዓፊዳ፡ ማስቃሊያ ቦላ ዎሌዳ። ኢ ዓፊዳዎ፡ «አዪሁዳቱ ካቲያ፡ ናዚሬቲያ ዬሱሳ» ያጌ። 20 ዬሱሲ ማስቃሊያ ቦላ ሚሲማሪያን ጲሺቲዳ ሱሌቲዳ ሳዓይ ካታማ ማታን ዴዒያ ዲራው፡ ዳር አዪሁዳቱ ሄ ዓፋቲያ ናባቤዲኖ። ዓፋቲ ኢብራዩስዳ ቃላን፡ ርማይስዳ ቃላኒኔ ገሪኬ ቃላን ዓፊቲዳ። 21 ሄዋ ዲራው፡ አዪሁዳ ቁሳቱዋ ካፓቱ ጲላዎሳ፡ « ሃ ቢታኒ ባሬና አዪሁዳ ካቲያ ያጌዳ» ጋይ ዓፋፔ ኦቲን፡ «አዪሁዳ ካቲያ» ጋይ ዓፎፓ» ያጌዲኖ።

22 ጲላዎሲ፡ «ታኒ ዓፊዳዎ ዓፋ ዲጋዲ» ያጌዳ ዛሬዳ።

23 ዎታዳራቱ ማስቃሊያ ቦላ ሚሲማሪያን ጲሺዳ፡ ዬሱሳ ካቂዳዎፔ ጉዩያን፡ አ ማዩዋ ኦኪዳ፡ ኦይዲ ኬሲ ሻኬዲኖ፤ ኢቲ

\* 19:17 «ጉጊያሳ» ሄዋን ኣሳ ጉጊያ ማላቲ ሜዴቲዳ ዎጋ ሹቻይ ዴዒያ ዲራው፡ «ጉጊያሳ ጌቴቲዳ»።

ኢቲ ዋታዳራ ኢቲ ሻኩ ጋኬዳ። ኣ ኣዲሳ ማዩዋካ ኣኬዲኖ፤ ኣዲሳ ማዩ ሃሺያፕ ደሚዳ። ዲጌ ጋካናው ዩዲ ማዩቲያዋፕ ኣቲን። ቃንፀቲዳ ሲኬቲቤና። 24 ዋታዳራቱ ኢቱ ኢቱዋ። «ኣና ጋካኔንቶ። ሳማ ዋይ ኤፃ ዩጋናፕ ኣቲን። ማዩዋ ፔጶኮ» ያጌዲኖ። ሄዌ ሃኔዳዌ ፆሳ ማፃፋይ። «ታ ማዩዋ ሻኪ ኣኬዲኖ፤ ታ ኣዲሳ ማዩዋን ሳማ ዩጌዲኖ» ጊያዌ ፖሌታናሳ። ሄዋ ዲራው። ዋታዳራቱ ሄዋ ኦሌዲኖ።

25 ሺን ዩሱሳ ማስቃሊያ ማታን ኣ ዳያ። ኣ ኣቲ ሚቻታ። ቃሊዮጳ ማቻታ ማይራማኔ ማግዳላ ጌቲቲያ ካታማፕ ዩዳ ማይራማ ኤቁዲኖ። 26 ዩሱሲ ባሬ ዳያኔ ኢ ሰቂያ ካሊያዌ ሄዋን ኤቁዳዋንታ ቤዒዳ። ባሬ ዳዮ። «ሃ ሚሺራቲ። ኔ ናዓ ሃዋ ቤዓ!» ያጌዳ።

27 ሄዋፕ ጉዩያን። ሄ ካሊያዋ «ኔ ዳዮ ሃኖ ቤዓ!» ያጌዳ። ሄ ካሊያዌ ኢዞ ሄ ሳቲያፕ ደሚዳ። ባሬ ሶይ ኣፊዳ።

**ዩሱሳ ሃይቁዋ**

(ማት 27:45-56፤ ማር 15:33-41፤ ሉቅ 23:44-49)

28 ሄዋፕ ጉዩያን። ዩሱሲ ኡባባይ ሃዒ ፖሌቲዳዋ ኤሪዳ። ፆሳ ማፃፋይ ጌዳዌ ፖሌታና ማላ። «ታና ሳሜ» ያጌዳ።

29 ሄ ሳዓን ኢቲ ፀጋ ኩሜዳ ጫላ ዋዩኒያ ኤሳይ ዳዔ። ኡንቱንቱ ኢሰፖንጂያ ሄ ዋዩኒያ ኤሳን ዩጌዳ። ሂሶጲያ ጌቲቲያ ሚላ ፀሪን ዋሊዳ። ዩሱሳ ደናኮ ሺሺዲኖ። 30 ዩሱሲ ዋዩኒያ ኤሳ ጋንፂ ቤዔዳዋፕ ጉዩያን። «ፖሌቲዳ» ያጌዳ።

**ዩሱሳ ሚዩያ ቶራን ጫዳዲኖ**

ቃሲ ሄዋፕ ጉዩያን። ባሬ ሁጲያ ቶቺዳ። ባሬ ሸምፕዋ ኢሜዳ።

31 ሄ ጋላሳይ ኣዩሁዳቱዋሲ ጊጌቲያ ጋላሳ † ጊዲያ ዲራዉኔ ቃሲ ሄ ሳምባታይ ዳሮ ቦንቾ ጊዲያ ዲራው። ሳምባታን ኣሳቱዋ ኣኃይ ማስቃሊያ ቦላ ፔሺና ማላ። ሱሌቲዳ ኣሳቱዋ ሱዩሊያ ሜንሊዳ። ‡ ማስቃሊያፕ ዋላና ማላ። ኣዩሁዳቲ ጲላፆሳ ዋሱዲኖ። 32 ሄዋ ዲራው። ዋታዳራቱ ዩዳ። ዩሱሳና ሱሌቲዳ

---

19:24 ማዝ 22:18    19:28 ማዝ 69:21፤ 22:15    † 19:31 ኣዩሁዳቱዋሲ ጊጌቲያ ጋላሳ። ፓሲጋይ ሳሚንታፕ ኢቲ ጋላሳ ኣዉዴኔ ጊዳና ዳንዳዬ፤ ሺን ጥሃኒሳ ሚሺራቹ ታማሪሲያዋዳን። ፓሲጋ ዋዲ ሃናናው ቤሲያዌ። ላይላ ላይላን ዩሱሲ ማስቃሊያን ካቂቲ ሃይቁዳ ሳምባታና ጊዳና ኮሺ።    ‡ 19:31 ሱሌቲዳ ኣሳቱዋ ሱዩሊያ ሜንሊዳ። ሃ ዋጋይ ሮሜ ካዉቲላ ዋጋዳን። ማስቃሊያን ሱሌቲዳ ኣሳቱ ኤሌካ ሃይቃና ማላ ኡዲያ ኦጊያ ጉሳ።

ኮይር ቢታኒያ ሱዩሊያ ማንሌዲኖ፤ ቃሲ ኣናና ሱሌቴዳ ላዔሶ ቢታኒያ ሱዩሊያካ ማንሌዲኖ። 33 ሺን ዩሱሳኮ ዩዳ ዎዴ ኢ ሃይቂዲጌዳዎ ቤዒዴ፥ ኣ ሱዩሊያ ማንሌቤይኪኖ። 34 ጊደፔኔ፥ ዎታዳራቱዎፔ ኢቱ ኣ ሚዩያ ቶራን ጫዴዳ። ኤሌካ ሱሳይኔ ሃሳይ ጎጊ ኣጌዳ። 35 ሂንቴንቴ ኣማናና ማላ፥ ሃዎ ቤዒዳዎ ማርካቲዳ፤ ኢ ማርካቲያዎካ ቱሙዎ፤ ቃሲ ባሬ ሃሳያይ ቱማ ጊዲያዎ ኢ ኤሬዳ። 36 ሄዌ ሃኔዳዌ ያሳ ማፃፋይ፥ «ኣ ማቂሳቱዎፔ ኢቱኔ ማዕና» ጌዳዌ ፖሌታናሳ። 37 ቃሲካ ያሳ ማፃፋይ ሃራይ፥ «ኣሳይ ባሬ ጫዴዳዎ ቤዒናና» ያጌ።

**ዩሱሲ ሞጌቲዳ**  
(ማት 27:57-61፤ ማር 15:42-47፤ ሉቅ 23:50-56)

38 ሄዎፔ ጉዩያን፥ ኣርማቲያሳ ጌቲቲያ ካታማፔ ዩዳ ዮሴፎ ዩሱሳ ኣኃ ኣኪዴ ኣፋናው ጲላያሳ ዎሴዳ፤ ዮሴፎ ኣዩሁዳቶ ያዩዳ ዲራው፥ ኣሳይ ኤሬናን ዩሱሳ ካሊያዎ።

ዮሴፎ ዎሲና ጲላያሲ፥ «ኣፋ» ያጌዳ። ሄዎ ዲራው፥ ዮሴፎ ቢዴ፥ ዩሱሳ ኣኃ ኣፊዳ። 39 ቃሲ ኒቆዲሞሲ ሄዎፔ ካሴ ዩሱሳኮ ቃማ ዩዳዎ፥ ካዎራናኔ ጎዳሬ ኡላና ዎላኬቴዳ ኦይታማኔ ኢቼሹ ኪሎ ጊራማ ጊዲያዎ ከና ሺቱዎ ኦይቂ ኣኪዴ፥ ዮሴፎና ዩዳ። 40 ሄ ላዑ ኣሳቱ ዩሱሳ ኣኃ ኣኪዴ፥ ኣዩሁዳቱ ኣኃ ፃዲያ ዎጋዳን፥ ሺቱዎና ጋሴዴ፥ ሞጉዎ ኣፊላን ፃዲዲኖ። 41 ዩሱሲ ማሰቃሊያ ቦላ ሚሲማሪያን ጲሹቴዴ ሱሌቴዳ ሳዒን ዳር ኣቲኪልቲያ ሳዒይ ዴዒ፤ ሄ ኣቲኪልቲያ ሳዒ ጊደን ሹቻ ዎጪ ከሴዳ ቢር ኦኒኔ ሞጌቲቤና ኦራሳ ዲፋ ዴዒ። 42 ሄ ዲፋ ማታን ዴዒያ ዲራዉኔ ቃሲ ኣዩሁዳቱ ሳምባታው ጊጌቲያ ጋላሳ ጊዲያ ዲራው፥ ዩሱሳ ያኒ ዎሌዲኖ።

## 20

**ዩሱሲ ሃይቂዎፔ ዴንዴዳ**  
(ማት 28:1-8፤ ማር 16:1-8፤ ሉቅ 24:1-12)

1 ዎጋ ጋላሲ ጉራን፥ ቢር ዳቢዳቢያዎን፥ ማግዳላ ጌቲቲያ ካታማፔ ዩዳ ማይራማ ዩሱሲ ሞጌቲዳ ዲፋዎኮ ባዴ ሹቻይ ሄ ጎንጎሉዎ ዶናፔ ዴንዲኪቹዳዎ ቤዒዲ። 2 ሲሞኒ ጳይርሳኮኔ ዩሱሲ ሲቂያ ዮኮ ካሊያዎኮ፥ ኢዛ ዎፃዴ ባዴ፥ «ዲፋዎፔ ጎዳ ኣፊዲጌዲኖ፤ ሃቃን ኣ ዎሌዲኖንቶኔ ኦኒ ኤርኮ» ያጋዲ።

---

19:36 ኬስ 12:46፤ ፓይ 9:12፤ ማዝ 34:20      19:37 ዛክ 12:10፤ ሳፅ 1:7

3 ሄዋ ዲራው፡ ጳጳርሴኔ ዮኮ ካሊያዌ አገዳ፡ ዲፋዋኮ ቤዲኖ። 4 ላዑካ ኢትፔ ዋጭዲኖ፤ ሺን ዮኮ ካሊያዌ ጳጳርሳፔ አጲ ካሴቲዳ፡ ሄ ዲፋዋኮ ጋኬዳ። 5 ሄ ካሊያዌ ሆኪዳ፡ ሞጉዋ አፊላ ቤዔዳ፤ ሺን ገደ ጌሊቤና። 6 ሲሞኒ ጳጳርሴ አ ካሊ ዪዳ፡ ዲፋዋ ገደ ጌሌዳ። ያቲዳ ሞጉዋ አፊላይ ሄዋን ዴዒያዋ ቤዔዳ፤ 7 ቃሲ ዩሱሳ ሁጲያን ፃፃቲ ኡቲዳ አፊላይ ሄ ፃፃቲዳዋዳንካ ዲማ ኢቲ ሳዓን ዴዒያዋ ቤዔዳ፤ ሄ አፊላይ ዲማ ዴዔፔ አቲን፡ ሞጉዋ አፊላና ኢትፔ ዴዔና። 8 ሄ ዋዳ፡ ካሴቲዳ ጎንጎሉዋኮ ጋኬዳ ዮኮ ካሊያዌ ጌሊ ቤዒዳ አማኔዳ። 9 ዩሱሲ ሃይቁዋፔ ዴንዳናው ቤሲያዋ ኦዲያ ያሳ ማፃፋ ኡንቲንቲ ቢር አኬኪቤይኪና። 10 ሄዋፔ ጉዪያን፡ ካሊያዋንቲ ባሬንቲ ጎሌ ሲሚዳ ቤዲኖ።

ዩሱሲ ማግዳላ ማይራሚው ቤቲዳ  
(ማት 28:9-10፤ ማር 16:9-11)

11 ሺን ማይራሚ ሄ ዲፋዋ ደናን ኤቃዳ ዩካዳ ሆካዳ ዲፋዋ ገደ ፃላዲ። 12 ቦላ ማዩዋ ማዩዳ ላዑ ኪታንቻቲ ዩሱሳ አጎይ ጌሴዳ ሳዓን ኢቲ ሁጲሳና ኢቲ ጌዲሳና ኡቲዳዋንታ ቤዒዳ። 13 ኡንቲንቲ ኢዞ፡ «ሚሺራቲ፡ አዪሲ ዩካይ?» ያገዳ ኦቼዲኖ። ኢዞ፡ «አሳቲ ታ ጎዳ አፊዲጌዲኖ፤ ኡንቲንቲ ሃቃን ዋፊዲኖንቶኔ ታኒ ኤሪኬ» ያገዳ።

14 ሄዋ ጌዳዋፔ ጉዪያን፡ ጉዩ ሲማ ፃላዳ፡ ዩሱሲ ኤቁዳዋ ቤዒዳ። ሺን ኢ ዩሱሳ ገዴዳዋ አኬካቤይኪ። 15 ዩሱሲ ኢዞ፡ «ሚሺራቲ፡ አዪሲ ዩካይ? ኦና ኮያይ?» ያገዳ ኦቼዳ።

ማይራሚ አቲኪልቲያ ናገያዋ ጋዳ፡ «ጎዳው፡ ኔኒ አኬዳዋ ገደፔ፡ አ ሃቃን ዋላዲንቶ፡ ታው ኦዳሪኪ፤ ታኒ አ አካና» ያገዳ።

16 ዩሱሲ ኢዞ፡ «ማይራሚ» ያገዳ። አ አኮ ሲማዳ፡ ኢብራዩሰፃ ቃላን «ራቡኒ» ያገዳ፤ ሄዋ ቢሌላይ «ታማሪሲያዋ» ገያዋ።

17 ዩሱሲ ኢዞ፡ «ታኒ ቢር ታ አዉዋኮ ባቤና ዲራው፡ ታና ቦቾፓ፤ ሺን ታ ኢሻቲዋኮ ባዳ፡ ታኒ ታ አዉዋኮኔ ሂንቲንቲ አዉዋኮ፡ ታ ያሳኮኔ ሂንቲንቲ ያሳኮ፡ ፑዳ ባይ ጌዳ) ጋዳ ኡንቲንቲሲ ኦዳ» ያገዳ።

18 ማግዳላ ጌቲቲያ ካታማፔ ዩዳ ማይራሚ ጎዳ ቤዔዳዋኔ ኢዚው ኢ ሄዋ ኦዴዳዋ ባዳ ካሊያዋንቲሲ ኦዳዲ።

ዩሱሲ ባሬ ካሊያዋንቶ ቤቲዳ  
(ማት 28:16-20፤ ማር 16:14-18፤ ሉቅ 24:36-49)

19 ሄ ዋጋ ጋላሲ አማርሲ፡ ካሊያዋንቱ አዪሁዳቱው ያዬዳ ዲራው፡ ፔንጊያ ጎርዲዳ፡ ሸቂ ኡቲ ዳዒሺን፡ ዬሱሲ ዪዳ፡ ኡንቱንቱ ጊዲዋን ኤቂዳ፡ «ሳርቴላይ ሂንቱንቱሲ ጊዳ» ያጌዳ።  
 20 ሄዋ ጌዳዋፔ ጉዪያን፡ ባሬ ኩሺያኔ ባሬ ሚዪያ ኡንቱንታ ቤሴዳ፤ ካሊያዋንቱ ጎዳ ቤዔዳ ዋዴ ሎይሊ ናሼቱዲኖ።  
 21 ዬሱሲ ላዔንሉዋ ኡንቱንቱሲ፡ «ሳርቴላይ ሂንቱንቱሲ ጊዳ፤ ታ አቡ ታና ከቲዳዋዳን፡ ታኒካ ሂንቱንታ ከታይ» ያጌዳ። 22 ሄዋ ጌዳዋፔ ጉዪያን፡ ኡንቱንቱ ቦላ ኡፋ ጊዳ ሸምፔዳ፤ ቃሲ፡ «ጌሻ አያና አከቲ። 23 ሂንቱንቱ አቶ ጌዳ አሳ ናጋራይ አቶ ጌቲታናዋ፤ ሂንቱንቱ አቶ ጌናዋንቱ ናጋራይ አቶ ጌቲቲና» ያጌዳ።

**ዬሱሳኔ ቶማሳ**

24 ሺን ታማኔ ላዐ ካሊያዋንቱፔ አቲ፡ ማንቲያ ጊያ ቶማሲ፡ ዬሱሲ ዬዳ ዋዴ ኡንቱንቱና ባዋ። 25 ሄዋ ዲራው፡ ዮኮ ካሊያዋንቱ ቶማሳው፡ «ኦኒ ጎዳ ቤዔዳ!» ያጌዲኖ።

ሺን ቶማሲ ኡንቱንቱሲ፡ «ሚሲማሪያን ኢ ጫዴቲዳ አ ኩሺያን ዳዒያ ማላ ቤዔናኒኔ ሄ ማላ ታ ቢራዲያን ቦቼናን፡ ቃሲ ታ ኩሺያ አ ሚዪያን ዬዳ ቤዔናን ታኒ አማኒኬ» ያጌዳ።

26 ሳሚንታፔ ጉዪያን፡ ዬሱሳ ካሊያዋንቱ ቃሲካ ጎሌን ሸቂ አቲዲኖ፤ ቶማሲካ ኡንቱንቱና ዳዔ። ፔንጊ ቃሸቲ ኡቲ ዳዒሺን፡ ዬሱሲ ዪዳ፡ ኡንቱንቱ ጊዲዋን ኤቂዳ፡ «ሳርቴላይ ሂንቱንቱሲ ጊዳ» ያጌዳ። 27 ሄዋፔ ጉዪያን፡ ዬሱሲ ቶማሳ፡ «ኔ ኩሺያ ሃ አሃዳ፡ ታ ኩሺያ ቤዓ፡ ቃሲ ኔ ኩሺያ ሃ አሃዳ፡ ታ ሚዪያን ዬዳ ቤዓ፡ ኔኒ አማኒያዋ ጊዳፔ አቲን፡ አማኔናዋ ጊዳፔ!» ያጌዳ።

28 ቶማሲ ዛሬዳ፡ «ታ ጎዳው፡ ታ ያሳው!» ያጌዳ።

29 ዬሱሲ፡ «ኔኒ ታና ቤዔዳ ዲራው አማናዳ፤ ቤዔናን አማኔዳዋንቱ አንጃቲዳዋንታ» ያጌዳ።

**ሃ ማፃፋ ቆፋ**

30 ዬሱሲ ሃ ማፃፋን ፃፌቲቤና ሃራ ዳር ማላታቱዋ ባሬና ካሊያዋንቱ ሲንላን አሌዳ። 31 ሺን ዬሱሲ፡ ኢ ከሪሰቶሳ፡ ያሳ ናዓ ጊዲያዋ ሂንቱንቱ አማናና ማላኔ፡ ቃሲ አ አማኒዴ አ ሱንላን ዴዐ-ዋ ሂንቱንቱ ዳማና ማላ፡ ሃዌ ፃፌቲዳ።

**21**

**ዬሱሲ ላፑ ካሊያዋንቶ ቤቲዳ**

1 ሄዋፔ ጉዪያን፡ ዬሱሲ ጂቢሪያደሳ ጌቲቲያ አባ ጋፃን ባሬ ካሊያዋንቱሲ ላዔንሉዋ ቤቲዳ። ኢ ኡንቱንቱሲ ሃዋዳን ቤቲዳ።

2 ሲሞኒ ጳጳርሴ ከማንቲያ ጌቲቲያ ቶማሲ፣ ቃና ጋሊላፔ ዬዳ ናቲናዔሊ፣ ዛቢዲዮሳ ናናይኔ \* ዬሱሳ ካሊያዋንቱፔ ሃራ ላዓቱ ኢቲፔ ዳዒኖ።

3 ሲሞኒ ጳጳርሴ ኢንቲንቲሱ፣ «ታኒ ሞሊያ ኦይቃናው ባይ» ያጌዳ።

ኢንቲንቲ፣ «ኦኒካ ኔናና ባና» ያጌዳ። ከሴዴ ዋንጊሪያ ጊዶ ጌሌዲኖ፤ ሺን ኢንቲንቲ ሄ ጋላሲ ቃማ ሞሊያ ኣይኔ ኦይቁቤይኪኖ።

4 ዋንቲያ ዎዴ ኣዋይ ኬሳናፔ ካሴ፣ ዬሱሲ ኣባ ጋፃን ኤቁዳ፤ ሺን ኣ ካሊያዋንቲ ዬሱሳ ጊዴዳዋ ኤሪቤይኪኖ። 5 ዬሱሲ ኢንቲንታ፣ «ናቶ፣ ሞሊያ ኦይቁቤይኪቲዬ?» ያጌዳ።

ኢንቲንቲ ዛሪዳ፣ «ኣይኔ ኦይቁቤይኪኖ» ያጌዲኖ።

6 ኢ ዛሪዳ፣ «ሂንቲንቲ ዳባ ዋንጊሪያፔ ኡሼቻ ባጋኮ ዬጌቲ፤ ኣማራዳዋ ሂንቲንቲ ኦይቃና» ያጌዳ። ሄዎ ዲራው፣ ዳባ ኡሼቻ ባጋኮ ዬጌና፣ ሞሊ ዳራዳ ዲራው፣ ጎቺ ኬሳናዊ ኢንቲንታ ጾኔዳ።

7 ዬሱሲ ሰቁያ ኣ ካሊያዊ ጳጳርሳ፣ «ሃዌ ጎዳቲኔ!» ያጌዳ። ሲሞኒ ጳጳርሴ ጎዳ ኢ ጊዴዳዋ ሲሴዳ ዎዴ፣ ካሎ ዳዒያ ዲራው፣ ባሪ ማዩዎ ማዩዳ፣ ኣባ ጊዶ ጉፒ ጌሌዳ። 8 ሺን ዮኮ ካሊያዋንቲ ሞሊ ኩሚ ኡቲዳ ዳባ ጎቺዳ፣ ዋንጊሪያን ኣባፔ ጋፃ ኬሴዲኖ፤ ኢንቲንቲ ኣባፔ ላዑ ዌቱ ዎቶ ኬና ሃኪዴ ዳዒኖፔ ኣቲን፣ ሎይሉ ሃኪዴ ዳዒኪኖ። 9 ኢንቲንቲ ኣባፔ ጋፃ ኬሴዳ ዎዴ፣ ዲፀንሳ ቦንቁዋን ሞሊ ዳዒያዎኔ ኡኪሳ ቤዔዲኖ።

10 ዬሱሲ ኢንቲንታ፣ «ሃዒ ሂንቲንቲ ኦይቁዳ ሞሊያፔ ኣማራዳዋ ሃሚቲ» ያጌዳ።

11 ሲሞኒ ጳጳርሴ ዋንጊሪያን ጌሊዳ፣ ዌታኔ ኢሻታማኔ ሄዙ ዎጋ ሞሉቱ ኩሚ ኡቲዳ ዳባ ጎቺዳ፣ ኣባፔ ጋፃ ኬሴዳ፤ ሞሊ ሄዎ ኬና ዳሮ ጊዲናካ ዳባይ ዳኬቲቤና።

12 ዬሱሲ ኢንቲንታ፣ «ሃ ዪዳ፣ ቃንዒያ ቃንዒቲ» ያጌዳ። ዬሱሳ ካሊያዋንቲ ኢቲኔ፣ «ኔኒ ኦኔ?» ጊዴ ኣ ኦቻናው ፃሊቤና፤ ኣዪሲ ጎፔ፣ ጎዳ ኢ ጊዴዳዋ ኢንቲንቲ ኤሪዲኖ።

13 ዬሱሲ ዪዳ፣ ኡኪሳ ኣኪዳ፣ ኢንቲንቲሱ ኢሜዳ፤ ሞሊያካ ሄዎዳን ኢሜዳ።

14 ዬሱሲ ሃይቁዋፔ ዳንዴዳዋፔ ጉዪያን፣ ባሪ ካሊያዋንቲሱ ቤቲሺን ሃዌ ሄዘንሉዎ።

ዮሱሳኔ ጳጳርሳ

\* 21:2 ዛቢዲዮሳ ናና፣ ኢሻቱዎ ጊዴዳ ያዪቆባኔ የሃኒሳ።

15 ኡንቱንቱ ቁማ ሜዳዋፔ ጉዩያን፣ ዩሱሲ ሲሞኒ ጳዊርሳ፣ «ዮሀንሳ ናዓ ሲሞና፣ ታና ሃዋንቱፔ አላዴ ሲቃይ?» † ያጌዳ። ሲሞኒ ጳዊርሳ፣ «ኤ ጎዳው፣ ታኒ ኔና ደሲያዋ ኔኒ ኤራሳ» ያጌዳ።

ዩሱሲ አ፣ «ታ ደርሳ ማራቱዋ ሄማ» ያጌዳ።

16 ዩሱሲ ቃሲካ፣ «ዮሀንሳ ናዓ ሲሞና፣ ታና ሲቃይ?» ያጌዳ። ሲሞኒ ጳዊርሳ፣ «ኤ ጎዳው፣ ታኒ ኔና ደሲያዋ ኔኒ ኤራሳ» ያጌዳ።

ዩሱሲ፣ «ታ ደርሳቱዋ ሄማ» ያጌዳ።

17 ዩሱሲ ሄዘንሉዋ፣ «ዮሀንሳ ናዓ ሲሞና፣ ታና ደሳይ?» ያጌዳ።

ዩሱሲ ሄዘንሉዋ ሲሞኒ ጳዊርሳ፣ «ታና ደሳይ?» ያጌዳ ኦቹዳ ዲራው፣ ጳዊርሳ አዛኒዴ፣ «ጎዳው፣ ኔኒ ኡባባ ኤራሳ፤ ታኒ ኔና ደሲያዋ ኔኒ ኤራሳ» ያጌዳ።

ዩሱሲ፣ «ታ ደርሳቱዋ ሄማ። 18 ታኒ ኔው ቱሙዋ ኦዳይ፤ ኔኒ ዋዳላቱሳን ዴዒያ ዋዴ፣ ኔ ፃሳን ሳቂያ ኔሬካ ዳንጫዴ፣ ኔኒ ኮዩዳሳ ባሳ። ሺን ጨሚዳዋፔ ጉዩያን፣ ኔ ኩሺያ ሚጫ ቤሳሳ፣ ኔና ሃራ ኡራይ ዳንጨሳናዋ፤ ኔኒ ደሲናሳካ አፌ» ያጌዳ። 19 ዩሱሲ ሄዋ ጳዊርሳ አይ ማላ ሃይቁዋ ሃይቁዴ፣ ያሳ ቦንቸሳንንቶኔ ኤሪሳናው ጌዳ፤ ቃሲ ሄዋ ጌዳዋፔ ጉዩያን፣ ዩሱሲ ጳዊርሳ፣ «ታና ካላ» ያጌዳ።

**ዩሱሳኔ ዮኮ ካሊያዋ**

20 ጳዊርሳ ጉዩ ሲሚዴ፣ ዩሱሲ ሲቂያ ካሊያዋ ባሬፔ ጉዩና ዩያዋ ቤዒዳ፤ ሄ ካሊያዋ ካዉዋ ሚያ ሳዓን ዩሱሳኮ ሸቂዴ አ፣ «ጎዳው፣ ኔና አሊ ኢማናዌ ኦኔ?» ያጌዳዋ። 21 ጳዊርሳ ሄ ካሊያዋ ቤዒዴ ዩሱሳ፣ «ጎዳው፣ ሃ ቢታኒ ቃሲ ዋና?» ያጌዳ።

22 ዩሱሲ አ፣ «ታኒ ያና ጋካናው ኢ ዴዓና ማላ ታኒ ኮዮፔ፣ ሄዌ ኔና አያ ሜቲ? ኔኒ ታና ካላ» ያጌዳ።

23 ሄዋ ዲራው፣ ሄ ካሊያዋ ሃይቁና ጊያ ሃሳያይ አሻቱዋ ኡባኮ ጋኬዳ፤ ሺን ዩሱሲ፣ «ታኒ ያና ጋካናው፣ ኢ ዴዓና ማላ፣ ታኒ ኮዮፔ፣ ኔና አያ ሜቲ?» ጌዳዋፔ አቲን፣ «ሃይቁና» ጊቤና።

24 ሄ ዩዉዋባ ማርካቲዳዌኔ ቃሲ ሄዋ ፃፌዳዌ ሄ ካሊያዋ አ ማርካቲሳይ ቱማ ጌዲያዋ ኦኒ ኤራቶ።

---

† 21:15 « ... ታና ሃዋንቱፔ አላዴ ሲቃይ?» ሃዋ ጉሳይ፣ «ታና ሃ ዩዋቱዋ ሲቂያዋፔ አላዴ ሲቃይ?» ጉሳ።



25 ዩሱሲ ኦሴዳ ሃራ ዳሮባይካ ደዔ፤ ኡባባይ ሁጲያን ሁጲያን ፃፊቲንቶ፣ ፃፊቲያ ማፃፋቶ ሃ ሙሌ ኣላሚ ጊዳናዎ ታው ማላቴና።

**Ooratha Caaquwaa**  
**New Testament in Dawro (ET:dwr:Dawro)**

copyright © 2011 Wycliffe Bible Translators, Inc.

Language: Dawro

Translation by: Wycliffe Bible Translators, Inc.

**Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Dawro

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

---

PDF generated using Haiola and XeLaTeX on 11 Nov 2022 from source  
files dated 29 Jan 2022

585b63ca-b8e6-55c8-bfef-10bdc95ad69c